

671.3443
085
13

光山縣志約稿

卷三

人物志

仕賢傳

舊志列志有仕賢一門前通志局頒發縣志編纂大綱稱爲歷代名臣惟名臣二字于今義未適故仍從舊名凡邑中歷代之公卿大夫爵位顯榮與德望事功彪炳史冊有事實可記者就採訪所及取而錄之士君子流覽邑乘可以開風興起矣

田益宗 光城人也身長八尺雄果有將畧貌狀舉止異常世爲四山蠻帥受制於齊北魏孝文帝太和十七年遣使張超奉表與兄興祖同歸魏興祖卒官征虜將軍江州刺史十九年拜益宗員外散騎常侍都督光城弋陽汝南新蔡宋安五郡諸軍事冠軍將軍南司州刺史光城縣開國伯食邑一千戶所統守宰任其銓置後以益宗旣渡淮北不可仍爲司州乃於新蔡立東豫州以益宗爲刺史尋改封安昌縣伯食實邑五百戶廿二年進號征虜將軍世宗景明初梁遣將主吳子陽率衆寇三關益宗遣光城太守梅興之領步騎四千進至陰山關南八十餘里據長風城逆擊子陽大破之斬獲千餘級梁建寧太守黃天賜築城赤亭復遣其將黃公賞屯於滌城與長風相持益宗命安蠻太守梅景秀爲之犄角擊天賜等斬首數百獲其二城上表曰臣聞機之所在聖賢

弗之疑兼弱攻昧前王莫之捨皆拯羣生於湯炭盛武功於方來竊惟江外州鎮中分爲兩東西抗峙已淹歲時民庶窮於轉輸甲兵疲於戰鬥事救於目前力盡於麾下不乘機電掃恐後之經畧未易於此且壽春雖平三面仍梗鎮守之宜實須預設義陽差近淮源利涉津要朝廷行師必由此道若江南一平有事淮外須乘夏水汎長列舟長淮師赴壽春須從義陽之北便是居我喉要在慮淵深義陽之滅今實時矣度彼衆不過須精卒一萬二千然行師之法貴張形勢請使兩京之衆西擬隨雍陽州之卒頓於建安得捍三關之援然後二豫之軍直據南關對抗延頭遣一都督總諸軍節度季冬進師迄於春末弗過十旬尅之必矣世宗納之道鎮南將軍元英攻義陽益宗遣其子魯生領步騎八千斷梁糧運并焚其鈞城積聚梁戍主趙文舉率衆拒戰魯生破之獲文舉及小將胡建興古皓莊元仲等斬五千餘級溺死千五百人倉米運舟焚燒蕩盡後梁寧朔將軍楊僧遠率衆二千寇逼蒙籠益宗命魯生與戍主奇道顯逆擊破之追奔十里斬俘千餘進號平南將軍又詔益宗率其部曲并州鎮文武與假節征虜將軍太僕少卿宇文福綏防蠻楚加安南將軍增封一百戶賜帛二千匹白早生反於豫州

詔益宗曰懸瓠要藩密邇崧穎南疆之重所寄不輕而羣小猖狂忽搆僣逆殺害鎮主規成反判此而可忍孰不可容卽遣尙書邢蠻總精騎五萬星馳電驅征南將軍中山王英統馬步七萬絡繹繼發量此蟻寇唯當逃奔知將軍志剪豺狼以清邊境節義慷慨良在可嘉非蹇蹇之至何以能爾深哉誠歎方相委託故遣中書舍人趙文相具宣朕懷往返之規口別指授便可善盡算畧隨宜追掩勿令此豎得有鼠逸遲近清盪更有別旨時自樂口以南郢豫二州諸城皆沒於梁唯有義陽而已梁武帝招益宗以車騎大將軍開府儀同三司五千戶郡公當時安危在益宗去就而益宗守節不移郢豫克平益宗之力也益宗年稍衰老諸子及孫競規賄貨部內苦之咸言欲叛世宗慮焉遣中書舍人宣旨慰諭庶以安之桃符還啓益宗侵掠之狀世宗詔曰風聞卿息魯生淮南貪暴擾亂細民又橫殺梅伏生爲爾不已損卿誠效可令魯生與使赴闕當加任使如欲外祿便授中畿一郡魯生未久至延昌詔曰益宗先朝耆艾服勤邊境不可以地須其人遂令久屈可使持節鎮東將軍濟州刺史常侍如故世宗慮其不受代遣後將軍李世哲與桃符率衆襲之出其不意奄入廣陵益宗子魯生魯賢等奔於關南招

引梁兵襲逐諸戍光城以南皆爲梁所保世哲擊破之復置郡戍而以益宗還授征南將軍金紫光祿大夫加散騎常侍改封曲陽縣開國伯益宗生長邊地不願內榮雖位秩崇高猶以爲恨上表曰臣昔在南仰叨王化擁率部曲三千餘家棄彼邊榮歸投樂土兄弟塗炭繫結南朝高祖孝文皇帝錄臣乃誠授以藩任方欲仰憑國威冀雪冤恥豈容背寵向讐就險危命昔郢豫紛擾臣躬率義兵擁絕賊路竊謂臣心仰簡朝野但任重據邊易招塵謗致使桃符橫加讒毀說臣恒欲投南暴亂非一乞檢事原以何爲驗復云虐害番兵殺賣過半如其所言未審損失之家所訟有幾又云耗官粟帛倉庫傾盡御史覆驗曾無損折初代之日二子魯生魯賢從子超秀等並在城中安然無二而桃符密遣積射將軍鹿永固私將甲士打息魯生僅將存命唱云我被面敕若能得魯生魯賢首者各賞本郡士馬圍繞騰城唱殺二息戰布實由於此殘敗居業爲生蕩然乃復毀發墳墓露泄枯骸存者罹生離之苦亡魂遺粉骨之痛昔歲朝廷頻遣桃符數加慰勞而桃符凶奸擅生禍福云唯我相申致降恩旨及返京師復欺朝廷說臣父子全無忠誠誣陷貞良惑亂朝聽乞攝桃符與臣並對若臣罪有狀分從憲網如桃符

是謬坐宜有歸詔曰既經大有不容方更爲獄熙平初益宗又表乞東豫以招二子靈
太后不許二年卒年七十三贈征東大將軍郢州刺史諡曰莊少子纂襲封位至征虜
將軍中散大夫卒贈左將軍東豫州刺史益宗長子隨興冠軍將軍平原太守隨興情
貪邊官不願內地改授弋陽汝南二郡太守（魏書）

贊曰南北割據雙方對峙益宗起爲帥而南則南重降北則北強數十年方面自專生殺銓置之權擬於王者男兒得志樹

功名於當世亦可謂豪矣物盛則衰人滿則退知進而不知退卒以子孫喪敗愚矣哉

孫 奉 字彥舉樂安人世寒賤少勵志勤學自檢校御史再遷國子助教太保崔光引
修國史歷行臺郎後預崔祖螭反逃於王元景家遇赦乃出孫騰以宗情荐之齊神武
未被知也會神武西征登鳳陵命中外府司馬李義深相府城局李士畧共作檄文皆
辭請以奉代神武引奉入帳自爲吹火催促之奉神色安然援筆立就其文甚美神武
大悅即署相府主簿專典文筆又能通鮮卑語兼宣傳號令當煩劇之任大見賞重賜
妻章氏既士人子女又兼色貌時人榮之女襄初欲之鄴摠知朝政神武以其年少未
許奉爲致言乃果行恃此自乞特進文襄但加散騎常侍時大括人爲軍士逃隱者身

及主人三長守令罪以大辟沒其家於是所獲甚衆。奉之計也。邢邵嘗謂之曰：「更須讀書。」奉曰：「我精騎三千，足敵君羸卒數萬，少與溫子昇齊名，嘗謂子昇：『卿文何如我？』子昇謙曰：『不如卿。』」要其爲誓，子昇笑曰：「但知劣於卿，便是何勞？且且奉悵然曰：『卿不爲誓，事可知矣。』」奉常服荊刺，凡李諧調之曰：「卿應自足，何假外求？」坐者皆笑。司馬子如與季高式召奉飲酒，醉甚而卒。神武親臨之曰：「折我右臂，贈吏部尚書、青州刺史。」（北史）

贊曰：孫奉出其聰明材力，博取人間富貴，自許稱騎其簡練，操學之功，固自有其人。故能以文章入幕，見賞於高歡，然考其爲人，適足以爲高歡之良佐耳。既得人爵而棄其天爵，讀書亦奚以爲。

廬祖尙 字季良，光州樂安人。家饒財，好施，以俠聞。隋大業末，募壯士捕盜，時年十九。善御衆，所向有功，盜畏不敢入境。宇文化及之亂，據州稱刺史，敵血誓衆，士皆感泣。越王侗立，遣使歸地，因署本州總管，封沈國公。王世充僭位，以州歸高祖，授刺史，封弋陽郡公。從趙郡王孝恭討輔公祏，爲前軍總管。下宣歙，進擊賊帥馬惠亮、陳正通，破之。歷蔣州刺史。有能名，貞觀二年，交州都督以賄敗，太宗方擇人任之，咸以祖尙才備文武可用也。召見內殿，謂曰：「交州去朝廷遠，前都督不稱職，公爲我行，無以道遠辭也。」祖尙頓首奉詔，既而託疾自解，帝遣杜如晦等諭意曰：「匹夫不負然諾，公既許朕矣，豈得悔三。」

年當召不食吾言對曰嶺南瘴癘而臣不能飲當無還理遂固辭帝怒曰我使人不
何以爲天下命斬朝堂既而悔之詔復其官（唐書）

贊曰海內鼎沸盜賊蜂起祖尚節財聚衆割據州郡保衛人民擇明主而歸之爵列上公名垂竹帛非偶然也暮年不幸觸
帝王之怒不得其死命也夫

張次賢 字子齊仙居人宋嘉祐四年知上高三年政成始營卒不屬邑轄次賢入朝首
言及之反以論去未幾入爲正言貽書新令趙汝笈請於朝乞重彈壓之次賢主其事
於是邑宰權遂兼兵馬邑人德之（上高縣志）

贊曰縣令爲親民之官民向之利病惟縣令能知之惟縣令之賢者能興之革之賢者宰是邑視地方之痛苦如疾病之在身
必午必思去之而極已卒不屬邑轄其爲害於地方也大矣宜次賢之除其弊而邑人德之也

龔友福 字伯達元順帝至正十七年狀元及第授翰林學士拜中書參政兼丞相事以
學行著人稱爲淮南夫子元亡從順帝北去著有龔伯達集今不傳（舊志）

按元朝一代丞相非蒙古色目人不得爲志何以云龔友福兼丞相事蓋時中書省有左右丞相有平章政事有左右丞
相有參知政事皆稱宰相故馬亨上疏有宰相十七失之冗雜宜加省汰之言龔友福蓋參知政事之宰相而非丞相也又
滿清咸豐間僧格林沁統兵剿捻匪駐節光山徧勸龔友福先代墳墓父老遂隨僧格林沁係龔友福後裔然不可考矣

程世昌 號章菴戶部主事純四世孫明天啓丁卯舉於鄉崇禎辛未成進士授刑部主事轉員外郎讞獄多所平反出知廣平府力革津梁保馬驛遞派擾民得以甦再知平陽值營卒噪世昌躬諭之變乃息擢按察副使備兵九江左良玉自武昌東下舳艫蔽江泊池口世昌規方示略披以誠恫良玉不覺前席爲之斂兵福藩立擢僉都御史巡撫上江威惠並濟民以安以忤阮大鍼歸里獨力勸修學宮清用爲太常寺卿抑鬱而卒

贊曰世昌及福世俗所震肅之狀元宰相也其功烈如是如是程世昌亦甲革大臣卒抑鬱而死哀哉

劉 堉 字從禮明太祖微時常至光山堉遇之於大石橋（後因堉遇太祖於此稱爲遇仙橋）延至其家設食太祖登基遂以賢良辟舉國子監丞累官左司諫左春坊左諭德備帷幄顧問上愛其樸直嘗以老劉呼之而不名上用法嚴堉因事納諷每濟之以寬上念其誠多見聽嘗與議養種馬於各省堉奏河南乃百戰之場民逃土曠又多河患蝗災若復領馬則民益逃亡上可其奏又奏免勾塔補軍伍堉性縝密凡所建白秘不敢洩然天下以是陰受其福在朝三十年囊無餘積致政歸以特牛一負衣衾驅還鄉里上使人問之大喜賜馳驛歲加存問堉歸田自食其力若農夫無仕宦態居數

年一日沐浴冠帶向北稽首妻問故曰主上賓天將隨之矣其日卽卒既而哀謫

贊曰王者之興實有天命攀龍附鳳亦有前緣世傳時遇太祖於微時事屬神奇一孔之任以常理測之恒斥爲荒誕然增過歸甲業已數年胡代知太祖嘗天即沐浴冠帶向北稽首從之而逝耶孔子罕言命誠難與俗士言也

徐環 字世良世以清白傳家宣德五年登進士拜監察御史巡按山東四川遼海畿

內諸郡持法嚴愼所至肅然累官左布政使述職入覲以卓異賜宴進階二品致政歸里年八十二卒

吳崇文 號寨南嘉靖十九年舉於鄉明年登進士授行人累遷郎中出爲四川按察僉事轉陝西布政參議所在俱有政聲

贊曰有明一代言重一而別非其故人情世故之心而往往不免於刑憲考其高前賢之往事大抵可知也徐曰吳崇文歷階而段無災無害其所以信友獲上者或亦有道與

沈愷 初爲縣小吏清潔自矢不受人一錢役滿入都供事吏部尙書馬文紳揭其名於部門曰天下清吏授官倉大使嘉靖十五年修顯陵蒙賚辭金不受遷忠州吏目清敏大著卒於官貧不能斂士紳助之歸葬後祀忠州名宦祠

孫學由椽考爲驛丞捐其俸以活饑者人多德之致仕歸讓產於幼弟自甘淡泊終其

身

嘗曰世人視小吏若微蠱往往不與於人而亦小吏之舉汚苟職官無異天下之蟲也聖朝如沈崇節書其重之小吏非小人在人之自待何如耳委去乘田孔子不取小吏何害焉孫亦小吏中之傑出者

胡智 字尙明勅旌義士熙季子登成化丙戌進士授戶部給事中操履剛介條議時政侃侃直言上多嘉納念親老不能迎養歲日思歸既二親受封卽告終養連遭親喪哀毀骨立幾不能生服闋人勸之出智曰親已逝矣要出何爲扁其堂曰知足自號雲山道人築精舍於城南之白沙關竟日扃扉玩易如此者二十有八年丁巳元旦禮奠先人畢公服端坐而逝自通籍至卒凡俸租所入悉儲以贍宗族之貧者自守先世之業未有尺寸之增亦未有餘貲以貽子孫云

何思 號淮潁性恬澹寡營家貧讀書併日而食弱冠舉嘉靖丙午鄉試年六十始謁選知房山縣蒞事三月歎曰寧爲五斗折腰乎上書乞致仕時王世貞爲巡撫甚高其品歸田一志養靜檢攝放心居南寺二十年足跡不入城市年九十無疾卒

胡嵩 字文嶽宏治甲子舉人任蘇州通判人物奇偉才思敏達值流寇猖獗嵩督士

贊曰知足不辱誠哉是言豪傑之事功與賤丈夫之曠爾相去不能以寸熟讀明清一代之史而後知胡何二子之過人遠矣

卒及子紹賢追至狼山擒斬渠魁主帥奪其功蘇人惜之解組歸王文恪爲
捷序贈之次子紹良舒城訓導課士有方

劉輔興 嘉靖庚子舉人知黔陽縣守正不撓時守道取沙金民不堪命輔興抗拒之某
曰汝不欲官乎輔興曰寧得罪於上官不取怨於百姓即掛冠歸

贊曰人才之難百石以爲嘆於千萬人中得一二有守之才則居於下位而又爲長官所妒嫉此人民之不幸而非胡劉
之不幸也

王相 字夢弼幼聰敏不羣長登正德戊辰進士授沐陽令值歲大歉相多方撫賑全
活甚衆內豎劉瑾遣官鬻鹽引索價數倍沐陽驟增至萬計相力陳當道罷之山東盜
侵境相治戎兵繕城池與民守之賊不敢近徵拜監察御史論事侃侃無所避清戎湖
湘更飭法令軍伍無缺常以處置捍衛事宜開款條陳言甚懇切事竣入朝適有邊將
掠則丐詐充奸細冒功者相力辨其誣錢寧江彬結黨亂政復指劾之出按山東貪污
者聞風引去時臨清倉廠設太監投托者多奸匪冒糜廩餼歲以萬數相疏聞於朝請
速革之移文屬郡嚴禁其左右捕首惡者悉付於法姦黨畏憚不敢肆爲民害宦寺郡

怒起而中傷之謫高郵州判卒世宗卽位贈光祿寺少卿遣官諭祭

熊榮 字以仁正德丁丑進士初授行人疏諫武宗南幸廷杖降學錄尋擢御史出按

山東平礦賊之亂復按雲南協征岑猛以功遷陝西參政

黃正色 嘉靖庚戌進士任御史奏皇城內不許賣刀劍又奏定房號及奏革宮市遂受

廷杖謫州判後歷官副使致仕弟中色官鞏昌府通判

彭應參 字魯軒光山人寓息縣登萬曆庚辰進士授肥鄉令擢御史性剛介不避權勢

出按浙江以執法杖指揮遂被劾歸秦昌改元贈光祿寺卿弟應捷萬曆丙戌進士官

至大同知府所在皆有惠政

畢佐周 字嵩高萬曆癸丑進士授在平知縣愛士育民歲饑賑濟全活甚衆以治最擢

御史巡視北城奸宄肅清出按廣西振紀綱平蠻有功以執法杖指揮莊烈帝怒將置

重典都御史陳于廷抗言陛下赫然留意武功欲激諸介冑臣即薄譴御史未爲過然

天下將驕卒悍紀綱不立尾大之勢已見萌芽又摧挫法吏以長其焰恐益潰廢不可

收拾將貽聖明之憂方是時天子意有所向佐周同于廷并被斥佐周性至孝少失恃

事繼母卒得其歡心歸田後植善類扶困窮同里悉化其德邑南潑陂河每漲發行者莫渡捐建萬金橋行者便之

贊曰有名之士以名節相尚光邑之有言路者咸稱厥職王相之風采輒令內之宦豈有所憚而不敢肆外之汚吏聞風引去允爲一代直臣之冠彭應參舉周執法杖指確亦可謂剛亦不吐矣

羅田 字汝獲其先麻城人明初徙光山田生而穎異髫年通周易嘉靖癸丑舉進士除知襄陵縣政崇博大不爲苛削調知聞喜縣悉計撫摩建樹爲諸邑冠晉戶部主事督餉百萬馳赴遼左時敵騎擁道田部衛整刷卒以無虞明年權崇文門稅監太倉平準節縮以羨餘給邊糧以常數處官俸朝貴多啣之監兌湖廣故事司府首領厚有餽贈田悉裁革楚境肅然未幾出知萊州府清操自勵力行鄉約以勞動卒於官卒後四日擢遼東行太僕寺少卿萊州諸生毛煦等列治狀以上與漢太守楊震合祀焉

胡孟清 字汝揚曾祖嵩祖紹良見前傳父錠嘉靖四年舉於鄉知壺關縣性豪放自以不任簿書引歸優游林下三十餘年萬曆十七年孟清舉進士知長治縣內艱服闋起知任邱縣前後歷二令俱著治聲考滿以最績被薦擢戶部貴州司主事督權九江九江有鈔關始自宣德中景泰初始差主事監收其稅然所任非人輒滋吏弊部臣以孟

清才素著清節故有是命孟清刷蠹蝕絕常例事以便民爲先會姦人馮萬善因解物入京耗蠹無抵陰誘中人以利語上聞遂設小池口稅廠遣御馬監李道董其事孟清抗疏力爭不能得李道至萬善等爲之羽翼初止料船分溷關額鈔既而奏請征商搜括無遺商民苦之孟清力相鈐制道恃勢愈肆因憤鬱成疾卒

贊曰孟子有「今之爲國者以爲富則代已遠其詳不可得聞矣滿清之季非貴戚大臣不能得崇文門監督一席各省重要關稅公言調濟實以其爲屬也固宜然時勢變遷國家費用浩繁不計蠹仰給於正稅關稅之收入斷不可少倘得羅田胡孟清輩而任之格爾便民何爲賦之有而無則小人不顧也羅田之不容割實孟清之困於字道何足怪哉

廖逢節 字應時光山淨居里人寓固始嘉靖丙辰進士授戶部主事再遷郎中督儲永平別創新規以清夙弊尋知永平府四十五年擢朔州兵備副使以病告歸旋以遼警起補口北道副使併力防禦邊人倚爲長城當遷去民赴闕奏留乃以參政仍舊任隆慶四年擢都察院僉都御史巡撫甘肅甘肅爲漢酒泉張掖郡地以番爲蔽番數被兵邊將坐視不救遂與他部連且爲之鄉導逢節內撫番人外却勁敵恩威互施開闢五年增築邊牆邊人安堵萬歷三年以夏歸屢荐不起一日浴畢衣冠端坐而卒

劉學曾 萬曆庚辰進士歷知曲周長垣二縣皆有惠政擢吏部主事歷考功文選二司

奏定掣籤之法以絕私謁避權璫歸後進南京光祿寺少卿轉大理寺少卿公
擢僉都御史巡撫保定察吏安民心力交瘁卒於官賜祭一壇

贊曰選節於法事以舉 除能內撫番人外以勸敏爲卓著再補遠鄉詩曰价人維藩逢節有焉劉學曾察吏安民心力交

瘁亦庶乎不素終矣

張德恭 字子安天性醇篤有學行嘉靖二十二年舉鄉試以才名受知郡守巨商雷煥
被誣訟餉金求援德恭力却之陰爲白其枉三十八年登進士中貴黃錦者當時用事
或邀之干謁謝不往授河間府推官平恕明允執法不避豪貴遷戶部主事舊多弊孔
力爲搜剔闈正寺鄭謙欺隱之罪謙黨羣搆之謫下邳丞下邳土城久圯德恭曲爲調
度有軍卒犯法者責之鳩工庀材城成不費民間一縷當道者以爲能擢蘇州通判力
却織局餽遺轉瀘州同知瀘接壤番夷實難之也德恭曰吾爲其易孰當其難策騎而
往生聚教訓民皆向方番寇侵瀘境勢甚熾衆惶怖欲棄城走德恭曰弱不可恃也若
進據都邑則貽朝廷憂決計帥師渡江而前賊望見果遁走臺使以德恭有文武才荐
章上轉河間府同知尋補順天府侍中時宰相攝事食客有謂參政常卿可力得者德

恭正色拒之遷河東鹽運副使德恭曰士君子欲行其志何往不可奚其爲爲政遂致仕歸悉以腴產推致伯兄宗族有貧不自給者輸數百金以贍之所著有易解岐黃諸書

張庸字子登父如軫見儒林庸舉嘉靖己未進士授揚州推官有定遠令致饋匿金於甌庸曰余性不喜飲可將去然不以是語人也擢刑部主事恤讞江西得疑獄百八十人疏請矜釋太吳姓豪者欲以賄脫罪懷千金抵其里趨起未投已聞其生平行誼遂夜遁去里人爲之語曰定遠懷金令江干抱璧囚廉平聲播中外歷本部郎中萬曆丁丑陞延安兵備副使聞有變單騎之任練兵伍修堡垣敵聞之解去明年遷陝西行太僕寺卿以母老乞歸因承歡膝下母年九十餘終庸年亦六十有二不勝毀瘠卒孫號琳成弋少孤家貧力學性廉潔嘗得白金於廁反之失者其人願剖之曰有是哉反子之金而酌我以貧也如其利之何若不子知揮而去萬曆丙辰成進士授崑山知縣自守清儉事惟便民安靜不擾以疾辭官邑民赴闕請留臥治不可書劍蕭然以歸曾曰唯字竟稔萬曆戊戌進士歷知無極溜川二縣愛士育民政聲大著陞刑部主事

疑獄多得矜釋四十二年差挺擊事起刑部會十三司司官嚴審貴家輩賄賂
已獨懼曰唯性慙直苞苴不敢入上廉知筆御屏曰曾某執法秉公從不受賄擢
知府有政聲後致仕歸

贊曰二張之人品如蓮花出水不染絲毫泥滓其存心超乎名利之外而居官任事如不得已故夷險無所動於中由學問而
見爲事功有其本也贊曰唯之不受賄賂亦庶幾近之

扶克儉 字趨儆登萬曆丙戌進士授庶吉士改御史巡按山東遼東其所轄也時李成
梁使副將李寧襲板升於鎮夷堡獲老弱二百八十餘級師旋爲別部所遮寧先走將
士數千人失亡大半成梁飾功邀叙巡撫郝杰具奏草直言其故要總督蹇達共上達
匿其草自爲奏論功克儉大憤馳疏發成梁達隱蔽狀成梁罷職先是十八年冬海州
被掠副將孫守廉不戰成梁亦弗救克儉既劾守廉申時行許國庇之止令聽戡克儉
乃言臣初劾守廉時行以書沮臣及劾寧又與國諭臣寬其罪徇私背公將壞邊事並
歷詆一鶚達及兵科給事中張應登朋奸欺罔達置杰會稿功罪疏不奏遂追數成梁
前數年冒功狀帝謂成梁前功皆由巡按勘報克儉懸度妄議卒置不問遂爲要人所

固省閱郵其飢寒疾苦兼董兌漕歲轉粟數十萬石盡革倒廩起倉雜費平糶
諸憲弊吉俗貧民生女多不舉虞胄請於上著令檄行所屬溺女者以謀殺子女論罪
全活甚衆課試諸生多所獎勸捐俸修行學繕葺講堂康熙五年分校鄉闈所取士多
一時名宿郡屬被舉者十人皆其平時所獎拔者明年以慮囚欲寬其條投劾去督撫
交章奏留竟歸士民思之請於侍郎李元鼎爲立德政碑虞胄經學深於春秋後研究
心性之理大約本諸新會主靜爲多時學士張貞生退居王山倡明正學虞胄與之往
還貞生謂其道有根源胸無塵擾云著有虛白齋集子坦睢州學正潔已愛士勤於訓
誨睢故無學署捐俸建之

蔡國傑 字子高號青霞爲邑諸生好學能文有智畧順治初孟將軍督師辟國傑參幕
府兵畫以軍功授溫州府推官決讞詳慎郡無冤民間拔知名士皆聯翩獲雋尋攝府
篆才贍肆應當事荐剡交上遷揚州府通判修理船政善於其職調淮安府通判督糧
儲總運以老請歸吟咏自適年八十三別親友坐逝

贊曰明季爽亂光邑日十一二士生其際困苦可知漕清之初如國傑等傑實是學古人官之面目有守
可俸後復可見當日之士風也

陳 睿 字朝侍蔡連河人祖緯康熙初歲貢父元亮康熙戊寅拔貢睿篤學有時譽乾隆六年選拔充貢九年中鄉闈副榜二十二年以直隸州判試用河東攝嶧縣丞尋補內黃管河縣丞專理河工睿爲人平恕以廉自持日巡壩岸惠郵夫役暇則手一編吟嘯不輟不苟營求署庭闕然浩如也嘗奉檄監鹽務官途視鹽職爲腴境睿獨淡然以靜處之歟商引便民食鹽務清恬居內黃二十餘年三經秩滿調佐寧陽所至積俸葺其官署繕治一新又嘗捐俸助修內黃學宮而自給恒匱淡約如貧士四十七年引疾歸尚民及河上役夫感其清德泣送境外

萬士表 字鯤程號樸生城內人性耿直意氣爽豁邑里敬憚之由諸生遵例揀發南河試用補豐縣主簿陞江都縣丞署儀徵縣事歷通州秦州州判陞宿州管河州同所至皆有能名乾隆乙巳歲歛奉檄煮粥以賑士表勞瘁經理民沾實惠時州境多遠方流亡例不預食粥士表憐之額外捐廉按名給錢日二三十文全活甚衆置奉檄署秦州篆卒於官囊橐蕭然不能棺殮宿人哀之賻而送於道

贊曰士君子立身涉世而必有以自見官無論大小其職當任事則一也傳說曰旁招俊又例于虛位虛位得其職而後能其事得其理若居下位而但爲衣食計是官途之乞丐耳國家設官安用此乞丐爲也如陳寒萬士表可謂能敬其事而後其食

者

胡季堂 字升夫號雲坡禮部侍郎煦之季子也七歲而孤撫於長嫂甘氏後貴疏請馳封長嫂至今稱爲美談初由蔭生補順天府通判調刑部員外郎遷郎中乾隆三十一年知慶陽府擢冀寧道遷甘肅按察使三十六年調江蘇署布政使奏定罪犯聞拿投首之例又奏凡繼嗣者應專定一人以息訟端均得旨優獎三十九年擢刑部右侍郎兼管順天府尹四十二年命往興化會同江督高晉讞漕書虞景山之獄究出峻訟之鍾至剛治之復命往山東勘章邱辛存義諸城陳靜文二獄究出峻訟之張元璞治之遂次復命往河南勘獄並察出蘇丕顯峻訟各情四十二年命往河南訊山西民張九錫控河南各官派累工料一案察其誣治之明年擢刑部尙書賜紫禁城騎馬五十五年往濱州按事命暫署山東巡撫奏賑卹事宜請截存漕米十二萬一千九百餘石酌濟被災州縣上報可還朝加太子少保考績優叙五十八年命往樂陵讞獄明年命偕大學士福康安侍郎松筠往吉林審察副都統秀林劾將軍恒秀等虧庫苛歛一案又命偕松筠往成安查勘劣監胡發等抗糧毆官一案反命皆稱旨六十年署兵部尙書

管理戶部三庫事嘉慶三年授直隸總督賞戴孔雀翎疏請清查直屬常平倉穀其因公動用者分限買補以裕民食從之尋偕侍郎特克慎往建昌朝陽二縣鞠獄四年春晉太子太保當是時仁宗親政公首劾大學士和坤廿罪尋伏誅籍其家人呼什圖計米麥雜糧得萬一千六百餘石詔以八成撥給文安縣二成撥給大成縣被水村民從公請也會近郊長辛店被盜有詔切責逾月公奏殲斃長辛店首盜張標係內黃令陶象炳之力諭嘉公據實陳奏不存邀功之念是月續獲長辛店盜夥并滄州逸盜韓四等得旨賞還翎頂又陳川楚軍務事宜力主妥扼要隘派兵防守俾匪衆無路可奔又令築堡清野俾無可掠然後剿撫兼施不至東奔西突手敕報曰所論極是與朕近日諭旨字字相同總之能堵方能剿能勦方能撫大端不外此矣五年十月薨年七十有二溫旨悼惜贈太子太傅賞陀羅經被派御前侍衛公豐仲濟倫帶侍衛十人往奠尋賜祭葬賜諡曰莊敏公承文良公家學居恒無戲豫無疾言遽色子弟定省或饋食必肅衣冠慎容止僕隸皆敬畏雖通下士刺無惰容治官事纖悉皆手定高宗英明每有所記問公對如流前後政令皆畫一領外臺如領部務每晨起理案牘至日晡退食手

執卷如諸生撰古今任子錄以自勉集諸史列傳爲之論贊好杜氏通典司馬氏通鑑故遇大事有斷制尤有知人識不偏聽不輕任愛人而知其所短或試之小事以觀其所忽以是荐拔皆有聲於時子鈺乾隆丁未進士由庶常改部累官清河道鑄由任子官湖南鹽法道

胡鈺 字璞齋一字雲五乾隆乙亥恩科舉人內閣中書丁未科進士翰林院庶吉士吏部文選司主事稽勳司員外郎外放福建漳州府知府洊升山西雁平兵備道貴州糧儲道直隸霸昌道天津兵備道分巡清河道歷署按察使布政使崇祀鄉賢祠著有有竹箴詩文集行世

胡義贊 字石查一字忍翁同治癸酉科舉人歷署太平縣知縣海寧州同知精書畫書宗趙董書法二王著有善古錄古泉滙評註有煙視翁記事詳論金石書畫奧竅待梓孫智功字懋臣山東候補知縣工書畫

戴錫綸 字東堂清乾隆庚子舉人丁未進士以卽用知縣分發廣東歷任南海普寧合浦澄海等縣知縣連山綏貉廳直隸同知羅定嘉應南雄等直隸州知州高州韶州等

府知府履荐卓異以道員存記爲政力主德化而聽訟必廉得其情宰澄海時有林姓寡婦與姑同居平時至孝一日姑夜餐後猝斃家中資族人瞰之遂訟以因奸毒姑及驗姑身青黑遍偵隣里婦平日既孝且貞絕非謀毒姑者反覆推訊知婦殺鷄饗姑午餐後餘羹置竈側夜復食其餘而斃復往勸求見竈側有蜈蚣數頭折之得其巢焉始知蜈蚣入鷄羹毒能殺人驗之犬豕信然獄釋而林姓之資產名節均得保全後數年其子登賢書親至省垣拜謝並求受業居官三十餘年折獄類多如是宰南海時見寺院多豫人歷年寄櫬貧不能歸捐資爲倡一時得歸櫬五十餘具又每至一處必興學課士郡邑志多捐俸重修嘗曰志者文獻之所寄也失修則文化墜故未通藉時於本邑修志事多致力焉七旬後守高州以老告歸士民留之勿得所歷郡邑民感其德競以長生祿位木主奉之著有樂靜軒詩集四卷校刊先德襟溪先生評註東萊博議八卷柘城段氏讀史歷代疆域沿革統計表三十卷七十八歲考終里第粵撫上其生平政績崇祀名宦

戴澤同 字師木錫綸長子清嘉慶甲子科副舉人以同知分發雲南歷署建水等縣知

縣代理寧安府知府著有雲南會城形勢補教說一卷制府阮公雲台奏聞於
初年奉養家居朝旨徵之召見時奏對陰陽一貫之理及三元歲運消長之數甚悉上
深嘉許諭偕穆鶴舫耆介春兩相國前往梁格莊相度萬年吉地既定慕陵以勞動保
知府記名仍諭留京師幫同欽天監考正四庫中歷代堪輿著述真偽分類奏報欽定
成書旋因奉諱返籍服闋入都而卒書未竣也夙負奇氣膂力過人於書無所不讀尤
嫻韜鈴弓馬之學健步日行三百餘里漢川沈丹穀詩集中常稱之爲光黃異人且精
易理工詞翰論堪輿均由周易先後天之理探得非世俗形家可比又本述而不作之
意易學則將周易洗心易聞周易觀彖等書詳加批註發奧抉幽著有梧竹鄰館詩集
八卷珍珠塔希夷夢傳奇各一卷粵東勝傳誦焉

曹登庸 字薌溪登道光庚戌進士選庶吉士散館授編修歷充山西鄉試正考官廣東
鄉試副考官武英殿纂修國史館纂修上書房行走補京畿道監察御史居臺諫十一
年直聲滿朝野以獨上定陵工程毋庸率議變更惟在嚴防浮冒一摺御批不候會奏
有意見長着以六部員外郎降補自此罷職閒居二十餘年卒於京師登庸有奏摺

遺稿數十篇不獨獬豸觸邪而指陳得失尤具特識民國十三年修志局尙有其稿亂後遺失惜之

王德茂 字垓洋舉人考取校錄議敘任廣東石城縣知縣時石城盜風甚熾甫莅任查匪窩四十餘家榜列通衢示與更新旬月之間化賊爲民有控媳毒斃其姑者審得食鷄之故於墻隙涎汁痕內索蜈蚣二頭媳冤以白有兄吞弟產誣控弟兇毆不法者訊得其情婉爲開導兄弟俱感泣而去嘗至山村有夫婦訴子違教者喚至前反覆訓飭後再遇之則率壯穉陳悔改矣時有詩云翁媪漸知官意切自將孝順指兒孫在石城二年審結積案一千三百餘起尤以正人倫端風化爲急務石城濱海無書院捐廉勸修松明書院親主講席生徒日衆添設別院題曰篤志堂又於安舖建同文書院實勵嚴敷昕夕不倦邑人繪廉江課士圖傳爲盛事學使以文風大起奏撥府學二名石邑鄉俗質樸各植木坊頌稱德政值燈節徧製燈綵書官清民樂四字嶺南道許乃濟按至邑見之嘆曰民之愛官至此官之愛民可知矣任滿大記卓異江督奏調江蘇補授丹徒縣莅任凡前任移交枝節叢生累年未結之案無不爲之斷結因之案無留牘門

可張羅適英人滋事調赴崇明協同守禦德茂傳集子侄自備資斧親督巡邏兵民感奮英船甫至長沙欲圖嘗試即率兵擊退江督裕謙專摺明保稱治行爲江南第一升補蘇州總捕廳同知因病引退著有公餘隨錄后益山房詩文集

陳紀麟 字簡齋由進士歷任江西石城大庾貴溪義寧河口清江信豐泰和等縣其任大庾時地界粵東文風僻陋紀麟躬親課士講解不倦廩生高某卽於是科發解爲大庾開科之始邑有富戶墓臨溪被盜發棄污穢衾褥於溪中某孀婦子撈起浣於溪旁失盜主認爲掘墓的讐送案訊知其冤釋之另行緝訪果獲真盜冤乃白任泰和時有孀婦陳氏子甫冠出就外傅午節解館未歸遍尋無踪呈懇查究紀麟訪之中途有尼庵乘夜寄宿令各尼歸房安息親加封鎖暗命幹役伏聽聞有聲息來報夜靜果有一房隱隱作泣歎聲天明啓視乃少尼嚴訊之供稱與陳氏子和姦陳氏子犯急痧而死瘞佛殿後空園牆下現已有身紀麟將少尼交陳氏看管俟分娩後再行核斷至期生男陳氏喜得孫少尼亦願守節撫孤領尸結案上憲嘉其幹畧提補南昌知縣沒於任所歷各縣紳耆來省弔奠者凡數百人聯名懇請撫院劉坤一將歷任事蹟奏明有諫

員操守清廉政聲卓著遺愛在民之稱奉旨崇祀名宦祠有子十一人六子圖七子閔八子侃進士五子鼎元十一子樽舉人科第之盛一時無匹人以爲在官有隱德云

李國廣 字颺軒進士任直隸東鹿縣知爲縣政寬猛相濟釐奸剔弊法行而人知恩懷德畏威兇頑感格邑有郭姓大盜歷三任不獲百姓苦之國廣莅任甫數月盜夥私相謀曰青天在上不忍助一人以擾其循聲陰串壯健班首乘其醉臥械繫到案訊決境內肅然保定府知府李秉衡稱其政績當比公孫僑猶不在東漢循吏之例以勤勞致疾卒年三十九子之釗乙未翰林

呂鍾三 字暄樵咸豐庚申進士授刑部主事歷員外郎郎中通政外授陝西漢中道陝撫薦一刑席周某紹興人少年傲岸自負律文熟悉如流且謂吾紹興派所以在各省能佔勢力者全在於運用文法鍾三曰如若所言國家設官專用法吏足矣何以外而州縣內而刑部所用者盡是讀書人讀書人皆不明法律者也我初到部時見掌科官時將疑而難決之案發之觀政人員令各加說帖以覘其才能指駁雖據條文援引必遵經訓經訓並非印版文字一出於天理人情天理人情一透法律可自我而立若不

講天理不講人情隨意愛憎深文巧抵愚民何所措其手足乎遂取各縣詳來之案親加審定一日夜批判數十起或准或駁於天理國法人情面面俱到周某驚服北面稱弟子鍾三復曉之曰天道好生故聖人慎刑古之賢人君子不願爲刑官良非無故臬陶古之聖人而唐虞五臣惟臬陶之後不得爲天子伯益焚山澤燒殺盡是禽獸而秦祚不永可見就是惡人禽獸殺多了亦有傷天地之和也况我輩作刑官君等作刑幕要不把良心抱定慎之又慎前途何堪設想然俗語說得好衙門人好修行陝西刑幕大概是爾紹興派漢中數十縣爾的故舊最多爾能把我這一片心傳到各縣刑幕俾人人盡心民事則濫獄少矣周再拜受教後陶子方對於周格外垂青亦以此周年已七十猶時時逢人稱道之鍾三治漢中八年卒於任

熊兆姜 字璜波光緒丙子舉于鄉選授中牟縣訓導殷勤訓士一時有師生父子之譽庚寅成進士以卽用知縣分發江蘇歷辦河運治事精勤保加同知銜庚子兩宮西狩奉札冒險出關解軍裝赴行在陝西制軍鹿傳霖一見深獎之旋奉委督辦江蘇徒陽河工昕夕監視費省隄固因積勞成疾除授江浦縣未及赴任卒妻陳氏殉見列女

熊起礪 字再青光緒丁丑進士授刑部主事充提牢廳差汰宿弊歲獲三百餘金爲恤囚經費謹出入禁凌虐囹圄激穆擢員外郎遷郎中提調律例館適倉胥作奸牽涉言官持平擬結公論翕然戊戌由京察一等外授浙江紹興府紹古越州悍雜號難治會上虞江塘潰民蕩析便宜發粟出私財千金以賑復集貲鉅億改築石塘期月而工竣諸暨民教仇鬪單騎諭解之寧紹界有大嵐山亘六七百里爲盜藪偕寧守某名捕殲厥渠魁更度嶮塞增碉堡比戶安堵山陰茅姓爭繼積年援据經訓灑灑千餘言手寫之懸其祠遂各感泣而訟息蠹役潘祥寶暴橫市井重足立峻法鞠治之觀者如墻額首相慶會稽教堂謀侵陳姓地未遂竄附台州教案歎內百計恫喝復欲乾沒顯聖寺產其值數萬並力折之不爲撓乃寢其生平臨事能斷率類此著涉獵筆記四卷年六十三卒于官

胡葆頤 字直卿號芝青臨仙里人生而穎悟幼卽能詩究心性理力行好學光緒辛卯舉于鄉甲午成進士以卽用知縣籤分山西歷宰陽高和順靈邱榆次四縣循聲卓著陽高漢稱白登地接邊塞風俗獷悍庚子以後人心懼外官吏辦理教案率多枉法取

媚先是邑有天主教徒白某恃勢作惡目無法紀葆頤視事後適一內地商民久客口外傾資購千里良驥一匹攜其艾妻返籍路經陽境爲白某所劫狀入亟拘獲其惡羽某方加刑訊白竟公然騎馬咆哮堂下立縛笞數百置諸獄追馬還婦交商領去歡聲雷震人咸以此舉開罪教士代爲惴惴葆頤坦然曰此正賢愚關頭非計得失時也驅車稟謁大同守某守聞言大驚囑白爲計乃見其主教西人鳳氏歷數白某罪惡謂吾已拚却一官必予嚴懲鳳氏知不可犯肅然謝過白知護符已失悔罪哀乞察其情真羈押數月寬釋之白出獄後力改前非卒爲善類并措數百金清繳積年欠賦嘗感泣語人曰蒙官一責得爲良民恩同再造比離任白走送百里慰勉再四揮淚而去自此家後頑民莫不感化邑大治及移篆和順地素陋每逢小考應試之童不敷學額之數俗且好訟至則徧行田畝勸諭父老獎學息訟不朞月而絃誦之聲盈耳一歲接呈不滿二十其宰靈邱赴任時大吏付以密札曰案關奉旨務須鄭重蓋邑有舉人杜君晚清之際種族爲懷世居山中養士蓄械自管其人自講其學久與縣署彼此不相過問風聲所播爲御史揭奏時正奉旨查辦也抵任後策衛入山訪知爲有心人凱切面諭

杜亦帖服旋投縣署自剖因爲之設法呈覆巨獄無形冰釋迨治榆未久老病辭歸由家中賣田寄資始克成行餘書五車林下餘年猶手不釋卷著有穉秋軒詩文集

何重熙 字琳竹生有異稟骨秀神寒善書字體瘦硬類褚河南光緒乙酉秋登賢書乙未成進士授工部主事光緒庚子兩宮幸陝重熙徒步隨蹕遂留陝候補壬寅分校陝西鄉試稱得士陝撫面獎之不喜亦不謝數月後凡同考官俱得美缺重熙獨無聲無臭久之委攝保安縣篆缺瘠苦重熙曰吾聞此地俗儉民樸正好着我腐儒居二年一以安靜爲務民國成立旋里以窮老終

崔壽祺 性篤孝友少肄業涑水書院爲山長熊公起礪入室弟子研精性理敦品勵行光緒戊子舉於鄉家居授徒講學士林奉爲模楷宣統元年選授新鄉縣教諭教士以學行並重文風丕變入民國奉母歸隱不仕卒于家

中華民國

曾士剛 字健齋少穎異詞賦清新書法挺秀光緒乙酉得選拔學使馮文蔚許爲玉堂人物是年秋隨馮學使遊京師考取翰林院孔目供職三月選孟縣教諭中辛卯鄉試

乙未由教諭升知縣分發陝西號爲幹員不數年歷署大缺爲豫人宦陝之冠冕入民國後官甘肅亦以才顯卒於隴

李漢光 字春甫光緒癸卯成進士授戶部主事進士館畢業選甘肅文縣知縣時值變法一切新政皆漢光所樂辦文縣與四川之南坪接壤漢番雜處風氣不開人民多詆誹學堂爲洋教均不肯入漢光到任後多方勸導未及三月而地方高才生亦相率入學文縣人普通嗜鴉片漢光疾惡如仇爲厲禁雖士紳不少貸每聽訟見煙色過重者雖理直亦笞責之謗議頗騰竟有以無情之辭赴省中之者在任未兩年撤省事白署金縣先是首府赴金縣剷煙苗被毆甘督以漢光在文禁煙有聲特委之金民間漢光英明有膽畧不敢力抗托人關說願以十萬金留種一大山溝漢光不許旬月間煙株報淨制軍嘉獎會武昌起義各省解體甘督暨三司俱逃竄漢光回豫任浙川縣知事值白狼困城駐軍統領馬畏匪勢大擬引兵逼漢光不可並激勵士卒盡搜全城壯丁分守雉堞親同幕友輪流巡城稍怠者卽嚴懲歷四晝夜匪退以守城功交政事堂存記四年分發陝西署三原縣巡按使呂調元保荐爲陝西能員第一五年歸里適本縣

會匪破城平定後多事株連漢光力持除爲首者不赦外餘均免究以此得生全者頗多民國十五年宰濟源次年卒於汴

熊先疇 字漢農起礪之長子也入邑庠後研求經世之學以才薦授知縣分發直隸候補民國二年返豫攝新野縣篆新野地界豫鄂向多盜前令不能治蒞任後創立保甲分期清查奸宄無所匿偶有警發兵掩捕鞠實峻治之合境安堵縣城浸滲傾圮廿餘丈歷二年餘未修急謀於衆鳩貲培補甫就事而隣盜號白匪者麇至聞備嚴由邑南迤西而去亟爲南鄙請撫恤其受害者明年復來率民登陣固守匪不得逞乃遁泊將解任猶慮城有未堅處發款尅日營築民尤德焉旋以縣知事保免仍分發直隸七年委署東光其地亦苦盜爲清查保甲如在新野城西濱運河舊有隄不能禦水爲重築之十二年復署陽原縣知事感地貧俗陋增立高等小學數所又捐俸濬海子堰石渠以水利爲民倡前後歷宰三邑惟以利民爲本故所至民咸頌其德卒年六十有五

曾昭文 字可樓生有異稟年十三塾師教之作八比不學塾師解館去隨從一湖北老師學算學光緒癸卯以算學補弟子員林學使提入省城學校旋派往日本留學平日

思想爲舊社會所束縛一到日本與新潮流相接如石灰之火力本足見水自化同聲相應同氣相求遂結海外黨人發願革命昭文寡言笑沉毅有膽畧與黃興深相契辛亥武昌起義從黃興守漢陽充前敵總指揮漢陽失敗跳而走復從黃興到南京充軍需局局長南北統一袁世凱任臨時總統昭文隨中山入京授陸軍少將民國元年同盟會改組爲國民黨國民黨之組織有理事九人參議三十人昭文爲三十參議之一各省組織國民黨河南推昭文爲黨魁二次革命昭文犯病就醫天津袁氏以其爲河南黨魁嚴加防範等於監禁後以抑鬱而沒卒年三十

苗懷新 字凡如弱冠補諸生留學日本早稻田大學政治經濟科畢業見清政日非加入同盟會從事革命民國成立當選河南臨時省議會議員及第二屆第三屆省議會議員于全省及本縣地方公益多所建議號爲會中翹楚其任第二屆省會議員時提議豁免本縣絕糧年額一千一百餘兩及改正第七中學經費每年由省款開支三千元復又增加爲五千元地方至今利賴又講授河南法政專門學校先後十五年成就甚衆性孝友篤于故舊年未六十卒於汴人咸惜之

人物志

儒林傳

夏殷以前有師無儒儒之有自周始周禮天官三曰師以賢得民四曰儒以道得民師與儒人品若分輕重而地官以本俗六安萬民四曰師師儒則師儒者國家所藉以教萬民固二而一而二者也在秋以降君師之義廢而儒教寢衰孔子衣逢掖之衣哀公怪而問之儒行之不講久矣厥後異學爭鳴奉儒教者以孔子爲宗實則衆人之命儒也安常以儒相虧病太史公論六家指要方儒於刑法不足異也史記既成儒林有傳名重之而言輕之歷代史家論列儒林不啻一邱之貉逮元修宋史創爲道學以別之重道尊經士人若增身徵要揆諸口道得民之義儒林道學名自不自相懸隔乎有明之季黃梨洲崛起著明儒學案（并著宋元諸儒學案未成而沒）上自公卿大夫下及處士廣事搜羅合聖功王道爲一途合治己治人爲一事而儒者之前目儒教之成人始大顯於天壤雖其中有見智見仁之或異見深見淺之不同而志在於明德親民超同於利祿功名則一也善讀書者當知余言之不謬已茲本其原作儒林傳

李果明 邑諸生篤志正學不惑於二氏家不焚楮幣病不禱鬼神聞吳康齋倡學豫章將往從之適蔡斌爲光山訓導蔡氏康齋舊友也課諸生以躬行爲教謂學聖之基自小學始果見之喜曰是即爲學之正路矣篤信好學身體力行與同門喻明爲講學之友以轉移士風爲已任出其門者俱崇尚實學果以諸生名重一時成化間以歲貢任訓導尋謝病歸講學終其身

張如軫 邑諸生光邑舊鄗陋學校之士以習舉業爲聖學如軫視彼舉業與聖經賢傳背道而馳奮然有志於古學恨無良師益友聞呂溼野講學於解州徒步千餘里往從之溼野接河東薛瑄之傳學以窮理實踐爲主是時四方學者雲集於解梁書院如軫得明師教誨良友觀摩始嘆聖賢之學自有真傳非俗士所能窺測也歸家後遂篤志古學棄舉業如敝屣士有從之遊者卽以所聞於溼野者教之敦善崇禮力行不忘士風爲之一變年八十餘考終命子庸嘉靖己未進士官至太僕寺卿自有傳

蔡鳳翹 字顯德其先固始人唐末入閩宋理宗時徙居江西之萬年縣父斌明天順間爲光山訓導以正學率士尋占籍爲光山人鳳翹生而誠篤正德庚子舉於鄉修先世之業門下從遊者日衆歷秣陵與陽明遊嘗曰知丈不如行寸以故陽明謂鳳翹以篤行爲宗也嘉靖二年通判順天府理漕有績四年督修興獻廟奏神路不當出太廟觸上怒廷杖禁刑部六年赦出爲平陽府同知時盜渠王英聚衆數萬人僭號霍山銀谷寨屢敗官軍殺指揮齊福破岳陽石隰等城全晉震動部使者檄鳳翹勦之擒其魁黨賊平部使者上其功上嘉之齎金帛叙功會病甚乞休特進一階致仕鳳翹性甘淡泊

俸餘輒以周貧乏歸里簞瓢宴如日與諸弟子講道汝墳之上著有性學解巡撫江西御史景蓁慕其名迂道訪之出語人曰元定西山復出也爲建中州顯德坊置第於萬年縣二十三年病卒閭巷皆哭邑令親執其喪高拱稱之曰先生端方正直若泰山喬嶽仰而不可攀躋粹白縞潔若大河長江望而不可涯涘其事業自學問中來故治河而功成用兵而兵捷隨用輒效有其本也則其爲人豈不足以經世範俗也載有子光

蔡光 字默齋鳳翹季子也生三歲即知問日八歲隨父謁陽明能辨知行合一之旨陽明甚異之性至孝嘉靖四年父鳳翹以監修睿宗廟奏爭神路忤旨廷杖光以舌舐父瘡血人爲感動嘉靖己酉舉於鄉再上春官以五策過激被黜尋除知江華縣江華久被賊擾光悉力殫慮撫流移計軍餉設策防禦遂爲湖南保障邑民素貧生女多不舉光嚴禁之活溺女數千猶俗每以人祭其妖神光假巫諭之令易以牲計擒古田賊渠潘汝泗撫按交荐攝靖州調知甯遠縣以正學率士建濂溪太伯申義三書院以居生徒三月寧遠治最如江華人覲上安邊四事以卓異賜宴丁母憂服闋擢知海州會其子毅中舉於鄉偕往入覲道厲蕭寺中有江陵客請爲內轉地光正言却之未幾轉

山東兗州府同知尋調臨洮遂拂衣歸居東河上扁戶講學曰斯道須靜中參求十餘年不入城市修邑乘以見志萬歷十七年忽語弟子曰予其已矣乃召姻故讌語若將別去者一日衣冠拜家廟坐斗室中與諸子講晉史方罷含笑而逝閭巷爲之罷市有子毅中

蔡毅中字宏甫萬歷二十九年第進士改庶吉士授檢討時礦稅虐民毅中取祖訓會典諸書禁誡礦稅者集爲二卷注釋以上大學士沈鯉於毅中爲鄉先達與首輔沈一貫不相能而溫純參政河南器毅中於諸生至是爲都御史疏侵一貫一貫疑出毅中手爲鯉地銜之遂用計典鑄秩去起麻城丞旋以行人司副召作尙寶丞移疾歸四十五年以浮躁鑄秩天啓初大起廢籍補長蘆鹽運判官屢遷國子監祭酒擢禮部右侍郎仍領祭酒事天啓四年楊漣劾魏忠賢得嚴旨毅中率其屬抗疏言學校者天下公議所從出也臣正與諸生講爲君難一言忽接楊漣劾忠賢疏合監師生千有餘人無不鼓掌稱慶乃皇上下其奏於九卿而謂一切朝政皆親裁以奸璫爲忠代之受過合監師生無不捫心愁嘆不已也臣惟三代以後漢隋唐宋諸君其受權璫之害與處

權璫之法載在通鑑我朝列聖受權璫之害與處權璫之法載在實錄臣皆不必多言但取至近至親如武宗之處劉瑾神宗之處馮保二事願皇上遵之謹在武宗左右言聽計從一聞諸臣劾奏夜半自起擒而殺之神宗臨御方十齡保左右扶持盡心竭力既而少作威福臺省劾奏未聞舉朝公疏神宗遂不動聲色而成保於南京今忠賢無保之功而極瑾之惡二十四罪無一不當悉究舉朝羣臣欲於罷朝跪以候旨忠賢遂邀皇上入宮不禮羣臣今又欲於視學之日羣臣及太學諸生面叩陳請矣而皇上漫不輕意數日以來但有及忠賢者留中不發如此蒙蔽其中寧可測哉乞將漣疏發九卿科道從公究問即不加劉瑾之誅而以處馮保之法懲之則恩威並著與神祖媲美矣疏入忠賢戟手大鉤殺中乃再疏乞歸不許已忠賢嗾其黨劾罷之卒於家贈禮部尚書毅中生五歲通孝經父問讀書何爲曰欲爲聖賢耳萬歷七年己卯舉於鄉公車時聞母沒一慟嘔血數升終喪斷酒肉不入內寢廬居有紫芝白烏千鴉集墓之異母服闋修先人之業聚徒講學十八年創立宏道書院慨然以興起斯文爲己任三十三
年自史垣歸績成邑乘施堯化稱其拓城檄賦兩大議鑿鑿可見施行其爲茲陽紫水

計有仁者無窮之思焉而名法食貨士習徭役之縷縷具載於以登閔化理尤不僅涓埃之助余又何能贊一詞惜乾隆間新志成舊志代遠年湮不可復睹斯吾邑儒者一厄運也居官不負其所學前後在官不及十載屢起屢廢不以窮通得喪動其心孟子曰天下有道以道殉身天下無道以身殉道毅中有焉子琮以恩貢授新興知縣

王家士 字汝希御史相子生四歲卽知孝弟衣冠掛讓有成人之度正德丙子舉於鄉相卒家士居喪力行古禮鄉人則之世宗登極詔卹相忠將予恩廕家士以赴公車力辭性不諧世俗亦不問家人生業獨與蔡鳳翹爲忘年友朝夕講誦人莫窺其蘊也其學以力行爲宗知臨朐縣六年冰蘖之操著聞邇百姓戴之竟以不阿當道量移知州蒞職二年清節如治臨朐時一日有同鄉少年爲巡按御史者惡白鬚家士聞之語人曰寧爲五斗米染鬚髮乎遂引年致仕家居二十年閉門誦讀清約如寒士鄱陽史桂芳得白沙之傳世所稱惺堂先生者也時爲汝寧知府瓶天中書院倡明正學延家士主其講席年已八十矣歸來逾年病篤其子問所遺言家士曰愛身明道修己俟時卒無他語從遊之士有孫翰者篤信好學絕意科舉以講學終其身年八十四卒

官思恕 字守仁嘉靖乙卯舉於鄉初喜任俠赴公車走馬燕山立功萬里之外歸而母沒哀毀幾絕廬母墓側有白鳥冬笋之祥由是勵志讀書百家之言無不涉獵尤喜讀易因而有悟遂絕意仕進構天中山房默坐研思至忘寢食一日遺友人書曰始吾從羣書入茫乎莫得今從靜中討出端倪方信此心與天地無二道其在茲乎士人翕然宗之乃結學社於白沙關講明性命之學白沙關距天臺二十餘里黃安耿定向兄弟講學於此彼此唱和性命之學於以大明光黃之間比於鄒魯教澤所及感格兇頑時柴山保有巨盜四十八人聞思恕之風改惡易行汝寧知府史桂芳聞其事召四十八人者至皆稱願向化因請於兩臺待以不死此隆慶己巳歲也明年兩臺疏荐詔下徵用會病卒弟思憲亦力學篤行

鄭緝修 字心穆少孤家貧力學敦行明季荒亂流離奔走歷盡艱難險阻志操不少變滿清入關天下粗定緝修聚徒講學以身教人口不言家貧足不履公門蓋其教人以此爲學者第一步此一步立不穩則爲貧賤所移者卽爲富貴所淫飢寒一關打不破何能出死生以當天下之重伊尹之任柳下之和未嘗不嚴於一介孔子曰士志於道

而恥惡衣惡食者未足與議也若言家貧是畏飢寒也出入公門是羨富貴也流而不返則去三聖人日遠而無所不爲矣其平生以此自勵即以此立教少與胡三山爲觀摩之友及三山爲吉安司李累書招致絕不覆答後三山歸里謂緝修曰是何罪過而頻年退棄若斯乎答曰我之所望於子者非世俗之所望於子者也吾子之操我所知也我希西江之潤而不念子平昔之操此蹠蹠之心我不忍也康熙丙午舉於鄉從遊者日衆光邑後進半出其門沒之日計聞邑里遠近士子共興泰山梁木之悲焉

胡 煦 字滄曉號紫莖祖母喻殉流寇之難焚樓以死父之杞敦尙德行多隱德先生少學能文章康熙二十三年舉於鄉官教諭五十一年成進士年五十八矣居常究心周易得圖書一貫之旨臚傳後引見澹寧居即自陳所學聖祖扣以河洛理數公條對甚悉選庶吉士自後屢召見問卦爻中疑義命畫圖以講聖祖曰真苦心讀書人也旋以檢討直南書房五十四年分校會試又明年點湖廣鄉試遷洗馬再遷鴻臚寺少卿擢本寺卿雍正元年授內閣學士五年授兵部侍郎調戶部充殿試讀卷官教習庶吉士明年協理左副都御史攝刑部右侍郎八年充明史總裁入直內書房以兵部侍郎

知貢舉九年轉禮部左侍郎六月罷職歸先生爲人正直忠厚平生以厚風俗敦教化爲先務在安陽爲諸生闡明正學文行兼昂俗侈喪事輒傾其家有停棺至十餘年未葬者爲言於有司察邑中士庶一千五百餘柩限日入葬並婚嫁毋犯過費俗因漸革及立朝尤願朝廷重農桑緩刑罰先仁義而後功利其請博舉孝弟也曰十室之邑必有忠信愛親敬長不慮而知彼生員舉監外其有能竭力奉養無忤於二親者稱爲孝子宜也有能公於財和於室累世不析居者稱爲弟悌宜也臣請每州縣歲舉孝子弟悌各一人勅下督撫額其門閭免其徭役見長官如生員禮如此則化行俗美人知自愛又請責成州縣勸課農桑或別設農官專司勸課之任又言近見督撫於命盜獄隱伏難明者止用自行招認四字援以定讞夫奸黠之徒有抵死而不伏者愚懦之夫有畏刑而自誣者然則有罪者倖免而無辜者受禍矣臣請凡遇命盜案必証據確然然後付法司閱實有弗當旋即駁正庶得慎刑之意時方嚴創獲之禁故事每歲秋遣廷臣一人往訊於盛京自春徂冬羈候日久瘦死者多先生至錄囚百五十人其疾病者至五十餘人斃者三人乃請繼自今創後之獄專歸盛京刑部及將軍府尹隨時定讞

俾情輕者得早予未減以廣好生之德得旨俞行著爲例攝戶部時閱漕項行追案自數百兩至萬餘兩不等先生言所追之案遠者五十年近者三十四五年使其人尙存必已家業蕩然或既亡猶復行追必且係累其妻孥過絕其生計徒有行追之名無補實用臣愚以爲免之使其他請廣言路裕積儲汰浮糧省冗官平權量多切於時務人以此覘先生之實用也會河南荒先生據實以奏時上已別有所聞特遣侍郎王國棟往賑切責總督田文鏡文鏡銜先生奏先生嗣子孟基本異姓不當冒官卷中選至是罷歸乾隆元年入覲高宗命復原官廕子入監讀書會疾作卒于京師年八十有二賜白金五百兩治喪賜祭葬如典禮先生所著周易函書列爲四例曰原圖曰原卦曰原爻曰原占凡五十卷又釋經文四十九卷爲正集外有約圖三卷孔朱辨異三傳易學須知三卷籌燈約旨十卷續約旨二卷卜法詳考四卷爲別集又約註十八卷續集十六卷總一百五十八卷自昔言象數者未能若是之詳也而尤以原圖爲獨有心得子四其三早卒次季堂自有傳

戴秉五

字文彝生性冲漠淡遠不染塵俗滿清之季提學試士命題皆割裂經文名之

曰截上截下巧搭牽搭鄉里教讀擅此手法者稱爲宗匠乘五曰此離經畔道也何以學爲雖迫於父兄之命依樣葫蘆學作八比而矢志不作搭題自然不通手法屢試被黜不悔直至廢八比試經義而始列邑庠自幼讀書於游史之外喜看語錄尤喜歷代奏議上自賈董下至滿清之經世文編數千年奏疏中凡有關於國計民生者手抄數千篇斯時閭巷腐生奉八比爲聖學朱註之外不知讀書爲何事有談十三經二十一史者便斥爲狂妄遂大不理於衆口乘五一笑置之有時父兄督責亦默然不應弱冠後閉戶誦讀並不從師講學之友惟胡夢翼晏善政晏洪數人與地方人士往來絕少任謗議充耳若不聞光緒二十七年辛丑李漢光自京師旋里在雙河寺大開絳帳李夙自負文章經濟獨步光山鄙薄鄉曲秀才傲不爲禮嘗曰一事也不知又要人恭敬他天下沒有那好的事乘五聞其教授與衆人特異往謁之執禮甚恭李曰子既是讀書的人我問你一個字能解得否對曰晚生讀書甚少問高遠了怕是不曉得李曰就是眼前的字菽粟的菽字是甚麼乘五笑曰先生以我爲不辨菽麥耶李亦笑曰我問了好幾個秀才他都不懂乘五曰那些秀才是伏案的工夫太大故不暇及此我生長

田間所以辨得清李喜曰子真讀書人也因問在家中所讀何書對曰先人所藏的經書語錄大概也都看過後來買了一部四史若無力買全史只好看看綱鑑其餘則王陽明黃梨洲顧寧人諸儒之書本朝之先正事畧經世文編皆是我親手買的隨便看看但是我生來天資太鈍不能得其要領李曰歷代的書爾既都看過究竟漢儒宋儒明儒孰優孰劣對曰若論立說著書自然是宋儒精於漢唐明儒精於宋儒譬諸作室漢儒立的基唐儒做一層宋儒做一層明儒再做一層自然愈做愈高究竟工力等耳且立說著書十九是空的無論講的如何精微奧妙俱無濟於實用以我私人意見真儒之學問事功除王陽明而外講學的尙在不講學的之下宋儒說如張良黃憲諸葛亮之流天資甚美皆未見道試問此身不能安天下見道又有何用自程朱以後講學儒生個個自詡見道所見之道又皆出於大學一個古本新本打官司打了六七百年尙未打清道果何在況大學一章不過孔門爲學有此一路並非個個學者盡入此門果如程朱之言何以孔子曾子孟子當日皆未教人致知格物此不攻自破者也李曰子何以見不講學儒生在講學儒生之上對曰書自在天下理自在天下讀書人見深

見淺須有自得之妙兩漢儒生自首推賈董賈董未嘗講學其次如兩漢之循吏皆讀書有得者也再次如李膺郭泰黃憲申屠蟠李固杜喬范滂之流亦皆讀書有得者也其人品那一個不在戴聖揚雄馬融鄭康成之上若論真儒學問自無過于諸葛亮事業且不論其下教曰夫參著者集衆思以廣忠益也違覆而得中猶棄敝蹻而獲珠玉然人苦不能盡惟徐元直處茲不惑又董幼宰參著七年事有不至至于十反來相啓告苟能慕元直之十一幼宰之勤渠有忠於國則亮可少過矣曾子曰以能問於不能以多問於寡有若無實若虛其諸葛亮之謂乎程朱自詡見道而洛蜀分黨朱陸相爭其器量比於諸葛亮何如耶就宋代而論范仲淹韓琦皆不講學張載以兵法謁仲淹仲淹曉之曰名教自有樂地何事於兵授以中庸張由是成名儒仲淹善教自出程朱之上王安石文章節行高一世而尤以道德經濟爲己任神宗欲相安石問之韓琦對曰安石爲翰林學士則有餘置之輔弼之地則不足當日博學明辨朝野上下無出安石之右者而卒以亂天下正坐其議論高奇能以辨博濟其說而果於自用也安石且然况後之奉程朱攻陸王奉陸王攻程朱者乎且十九皆口耳之學又豈能真知程朱

陸王之爲人乎竊以爲讀書苟志在用世從程朱入門也可從陸王入門亦可若無濟世之心竊取古人之說欺世盜名恐皆爲程朱陸王所屏棄也李曰以子之意立教究竟當如何教法對曰成周以鄉三物教萬民與諸儒皆不合惟胡瑗爲湖州教授分經義治事二齋庶乎近之孔子教人分爲四科未嘗逢人教以一貫蓋學問不可蹈空也明末遺老孫夏峯黃梨洲李二曲顧寧人爲四大名儒國初名臣大概得力於此數人自我看來要以顧寧人爲切於實用清朝一代能得其遺意者惟陳宏謀一人而已愚妄之見祈先生教正李趨之逢人稱道秉五自是始得不爲俗學所困益肆力於經史而參之以人事每日晨餐罷必明牕淨几書小楷十數行或寫圖畫以遣興朝夕循行隴畝與父老話桑麻每夜或讀書或默坐交三鼓而後寢嘗謂天地之妙須於夜靜求之邵子冬至子之半一詩其味良可玩也春秋佳日喜偕良友登臨山水閒看鳥鳴花放魚躍鳶飛至遊歷到要塞關津論古今興亡成敗則又仰天太息慷慨悲歌而嘆攘攘衆生類遭浩劫唐虞變楚漢歷史數千年爭奪相殺一關不知能再有聖神打破否也二十九年癸卯補縣學生員鄉里後進漸有從之遊者秉五教之規行矩步曰小子

從洒掃應對進退做起然後可不流於傲惰讀書是學爲人並不是學求官學爲人是求諸實用於一衣一食事父母養妻子和親戚接朋友時時皆要留心處處皆是學問而學無實用尤爲數百年之大弊周公多材多藝孔子多能求可足民稱爲政事之才古之聖賢原不仰衣食於流俗顧寧人隨寓饒足自是通儒又曰陸子靜六經註我我註六經之言是讀書的正路爲人與六經不合即讀書萬卷無益也觀此可以占其學問得力之大概甲辰春因事赴江南四月歸道染濕熱病到家旬日而沒年二十八一時俗士肆其非譏曰戴文弁少年老成宜其不壽嗚呼如世俗言少年例應輕薄耶前輩晏立如年已七十聞訃流涕既而曰戴文弁似一神人譴謫者其然與抑命運與乘五後數年講學之友惟晏善政爲最密

晏善政 字少介曾祖承仲進士官江蘇知縣至善政而家勢衰落半耕半讀天資甚鈍他人所一目能了者善政則須半日思索然字字認清不肯絲毫放過每得一解必身體而力行之刻苦自勵未嘗以貧窶動其心弱冠後以訓蒙爲業其教童蒙於讀書寫字之外教之以家事教之以修身處世與學生講書必引之於尋常日用科舉時代每

日教學生照例作文其對待學生於文之工拙不甚措意若踰閑蕩檢督責極嚴曰我教書不能成人子弟亦不敢誤人子弟也故其教讀十數年凡從之遊者以後不問業儒不業儒絕少佻達之習與戴乘五爲講學之友彼此頗獲麗澤之益其往來議論古今之事都從人情世變上切身體驗而出能發先儒所未發尤以論諸葛亮用商韓之法治蜀王安石以周禮誤蒼生二事爲獨有心得可以顯真儒之實用戴乘五最惡商韓善政則以商韓爲應時而出之人是儒教流弊之良藥儒教末流非商韓之法不能救古稱太公治齊尊賢而尚功周公治魯尊賢而親此兩國治道不能有所軒輊周道親親便是儒教在周盛時親親而仁民仁民而愛物自然能化行天下然須知周禮教民全在讀法違法者糾之以八刑極惡大罪親貴亦不能寬宥如周公誅管蔡是也春秋而降止有親親之弊並尊賢之意亦失各國盡是親貴用事而小民盡爲魚肉春秋譏世卿便是救親親之弊有尊賢尚功之意到了戰國親貴盡是民賊焉得不亡國故商韓以法繩之若能善用商韓之法與尊賢尚功是一理惟專任法而不尚賢執法者專以殘酷爲能本身違法不違法人民不得干涉天下始壞亂而不可救諸葛亮存

心似水持法如衡而其一種哀矜之心又能得法外之意此以儒者之心行商韓之法焉得不治總之聖賢法治違法卽用刑先自本身始成湯檢身若不及檢卽刑也孔子云克己復禮克卽刑也書言樹德除惡除卽刑也惟本身之惡於未發見之前先已獨自檢點斬除盡淨本身卽可以爲法然後懸法於象魏以法繩人而人莫敢不服秦用商韓之法專以繩臣庶執法者立於法律之外故一時足以滅六國而國祚不永無他用刑不自本身始而萬惡萃於一身也豈惟秦爲然歷代之國法皆然再以陋儒議親議貴之說文其違法之私而天下愈亂故法非不可用惟如諸葛亮之淡泊明志此身粹然無瑕疵始可用以商韓之法所謂有諸己而後求諸人無諸己而後非諸人也王安石誤國最爲乘五所不喜善政獨謂青苗之法保甲之法免役之法養馬之法苟得其人皆可施行後世儒生但聞青苗之害人云亦云談者色變並未嘗實地考究殊不知青苗放錢與朱子初行之社倉何異青苗錢是二分行息社倉初放何嘗不是二分行息比到倉米已足然後始收耗米三升又任事者俱係朱子門人無剋削之弊久後不得其人固亦不能無弊也青苗放錢春散秋歛安石在鄆縣躬親試辦何嘗有弊惟

輕用喜事之少年以多放取息爲能至於抑配而天下始擾若保甲之法原是善政免役之法亦較勝於助役養馬之法亦可擇地給養惟均輸市易與民爭利近於市儈有傷國體其餘諸法不得因其失敗一筆抹煞但人民未曾經見之事宜徐徐試辦操之過急未有不生亂者司馬光曰人言安石奸邪則毀之大過但不曉事又執拗耳此論極爲平允不曉事是在民間歷練太淺不通人情執拗則過於自用異己者去附己者親與讒諂面諛之人居遂爲所賣毒流天下而不自覺孔子所謂言莫予違而即可以喪邦者也假令行之以漸擇賢任使遲之以歲月未始不可以次第施行若以王安石誤用不更事之少年壞天下而並歸咎於周禮則謬矣善政爲此二事與乘五往復辨論年餘而後定其餘講習有關實用者甚多不能備錄光緒三十四年戊申爲瘕狗所傷瘕狗俗稱瘋狗其中毒者手足狂亂善政至死鎮定不妄語亦可見平日之所養矣卒年三十六

陳保遐 字勉齋幼聰穎事親以孝聞母沒廬墓不去每祭盡哀家富藏書流覽殆遍村有賽山僧寺保遐下幃其間彌自刻苦所爲文有奇氣如學宗程朱論酒權考河防備

覽中州賦役考雖老師宿儒自嘆不及年二十三補博士弟子次年辰廩餼當是時海內以詞華相尚逐文藝之末而不敦實行保遐曰儒者讀書豈終如是而已耶遂棄舉子業篤志聖賢之學於漢儒之經學周張程朱之理學陸王之心學以及宋元明清諸儒之學說無不悉心研究兼收博採而以程朱爲宗設帳授徒戒諸生以程朱爲圭臬遊大梁中丞錢公器重之袁文誠公督餉關中召之入幕皆不願又以恩貢選授儀封鄉學教諭亦辭不赴以著書衛道自娛風雨一廬晏如也咸豐十年光山患流寇保遐家居睦宗族和鄉黨取與不吝人咸樂爲用鳩集鄉人先期修山寨設鄉團朝夕訓練賊不敢犯暮年信道彌篤尤嗜周易與性理精義著有文集詩集九經稗疏仁說義說諸篇惜兵燹散佚現僅存者家訓及家塾訓儒修齊寶訓數卷已耳然卽其家訓中心之本量說公說人說教說諸篇亦足徵其學問之得力於聖賢者爲不少也

人物志

文苑傳

日月星辰麗乎天百穀草木麗乎土此天地自然之文明然草昧未開榛榛莽莽文明何在必有人焉經之紀之書揚而潤色之文明始表見於天壤此文學之士所以可貴也光邑地域在中國處南北之交一阨於六朝之戰爭再阨於金元之蹂躪漢唐以上之文獻掃地而盡與草昧何異元明以後文人學士接踵而起明清兩代詩書之澤漸灌注於里閭滿清季年光邑文名甲於全省亦可謂盛矣然末流之弊華而不實識者憂之昔歐陽修爲一代文宗學者求見所與言未嘗及文章惟談吏事謂政事可以及物文章止於潤身韓琦謂歐陽修亦曰我爲宰相汝爲翰林學士天下文章莫大乎是然則文章之本要自有與天地自然之文明相因而並著者固不僅如草木之榮華鳥獸之好音也明乎此則可以知文苑之聲價矣

常定述 不知何時人嘗在僕公山老君洞洞旁立石刻廢罷明經賦一首其詞云水有涓濁而涇清草有蒼臭而薰馨卒然盛者明法飄爾棄者明經月建寅而建申時有泰否道可行而可止運有升停議於廢歷貢舉益精變自熙寧諸科遂廢一盛一衰或進或退三十年之記誦勞而無功六十卷之研摩明而入晦橫經者掩卷而嘆負耒者鼓腹而歌斯焉取斯且靜觀無足觀矣得之不得曰有命其如命何道不在位德不在年固宜退藏於密慮其所終稽其所斂何必於世求多且夫上以學聖賢雕蟲篆刻是壯

夫不爲下以應明法斬絞徒流非迂儒所識敦詩書者擯厥身舞文法者授之職是則無自而可其亦將何所得吾道非也豈哭阮公窮途歸去來兮庶效陶公食力學貴華銜而實佩士尙行修而經明分科則始德行而末文學言治則先道德而後刑名旣已與世相違難毀方而瓦合但當修身以俟寧苟就以蠅營柏舟歌仁人不遇商辛作遺耆退處孟子歸自齊梁謂仁義非我而誰孔子阨於陳蔡論雅頌各得其在文武而野外無遺逸首陽猶餓夷齊當堯舜而天下無窮人箕山不屈巢許是以達人安命哲士知時令尹懷忠猶遭三已御史供職總是四其覽世運之如此庶身隱之堪宜棲遲於浮光之下徜徉於淮水之湄朝醉暮吟任滄桑之遷變連門圭竇徐歲月以推移林花欲芳村醪自買不合時宜寧須寬解斯已而已末之難無可不可奉爲楛虛舟獨泛將共蒙叟以逍遙抱璞不言寧嗟卞和之休罷也哉賦後書鄉貢明經常定述撰而無年代錢時雍謂宋神宗熙寧中王安石執政更貢舉法罷詩賦明經諸科專以經義論策試進士又因諸科之不能改試進士者別立新科明法試律令刑統大義斷案蓋其時僅罷諸科名目統歸進士且試以經義是究未嘗廢經也考宋登科錄熙寧三年葉

祖洽榜有明經諸科四百七十二人六年余中榜有諸科四十九人九年徐鐸榜有諸科一百九十四人是明經究未嘗廢也不十餘年而進士仍試詩賦是詩賦亦未久廢也惟元初雖仍設學校而盡廢科舉入仕總由吏選諸生居學校中必試吏乃有出身士之抱高節者往往弗樂就之常殆宋末鄉貢而入元者感爲此賦又畏其時之網羅因託於熙寧之罷明經諸科以詭其詞耳時雍可謂知言元以夷狄竊據中夏絕不知六經爲何物悠悠蒼天奈之何哉然天下事以氣類相感召伊川野祭識者知百年之後此其爲戎宋室之衰固自熙寧變法始也春秋之義中國流爲夷狄則夷狄之夫豈待夷狄蹂躪中國而後爲中國淪於夷狄也哉

劉永吉 字岫雪明萬曆間處士也踽踽涼涼不染塵俗詩歌書法皆有獨至之境非他人所能貌襲著有竹園詩集世亂不傳殘鱗剩爪時流播人間其吳振公自武林歸夜話云誼重涉江輕交深置死生俠因知己感名是爲人成把臂還如夢挑燈無限情漏霜催落月忽漫下三更姜綺季移居云問異來尋高士居梅花之外卽圖書春蘇小閣鬚眉靜夜到迴廊筆硯疏霜徑草斜看鳥雀月懸簾捲話樵漁醜欲醉仙人月百斛

大邑縣志卷之九
葡萄好爲儲碧竹西林助遠思一林幽話坐來癡香驚雀夢梅初破詩嫁人愁酒正宜
淡泊論交心可熱縱橫說劍俠堪持耶溪我自天涯客舍子肝腸更向誰讀其詩可以
想見其爲人矣

闕碧霞 字景曙父雲隆持身嚴正里有邪行憚雲隆不敢令其知喜周人困乏有以喪
葬鬻產者濟乃事遂焚券謝之碧霞登清順治戊戌進士授寧都令忠信仁恕民甚戴
之性恬適不汲汲富貴越二載卽退息林泉烟霞之興時露詩歌中精懷素草法并善
寫山水寸箋尺楮得者寶若球琳蓋王維米芾之流亞云

扶世慶 邑諸生工詩爲人和藹有大度好周濟給貧者襟期灑落所著有沔遊草詩集
世亂失傳

甘琮 字玖玉早歲爲諸生端瑾有文望與侍郎胡煦幼相厚善以學行相敦勵工詩
善古文詞邑中碑板文字多出其手又工八法得米南宮董文敏筆意遠近爭來求之
康熙中充貢成均邑令屢延主講涑水書院諸生執經者甚衆

上官師 字誠哉邑南鄉人爲諸生植品勵節淡於榮利力學工文詞獨爲詩與侍郎胡

煦相唱酌最篤嘗有詩云天地容吾嬾榮名不係心倦遊攜稚子燕坐聽山禽犬吠憎
驚夢歸雲喜到林就陰移竹榻煩暑總無侵又云未到傷心淚莫揮遮身猶有舊鶉衣
朝扶筇杖看雲起暮倚庭柯數鳥歸嬾逐啜梁鳧食寧同覆翼鷓鴣飛不驚寵辱悠
然足寂寂深山晝掩扉覽其詩足以知其爲人年八十二卒詩稿多散佚不傳

呂蕭韶 字儒吉父防邑廩生博學工詩蕭韶承家訓嗜古力學亦食餼於學爲人謙和
平易士樂與之遊嘗有詩云恪守寸心培世德頻留夜月讀藏書人以爲不愧斯語云
孫萬億 字松立潑陂河鎮人曾祖自一明季以進士知黃岡縣殉寇難見忠烈傳萬億
有至性幼以孝聞家貧力學聞人有藏書必假歸閱之默識不忘比長爲諸生淹通羣
籍邑中稱博雅無出其右者工詩詞精草法邑里得其翰墨咸珍惜之雍正十三年選
拔充貢以親老不求仕進教授邑中資館穀以備甘毳請業者歲恒數十人因材造就
一本先儒之法嘗立訓曰士貴篤行若華而不實乏身體之功卽文甚工亦浮華無足
觀矣平居以德化人比閭皆相感爲善里市中有忿而爭者衆釋之不能得或有呼者
曰孫先生至矣爭者輒慚而避去性儉約以樸自署學者稱樸齋先生

胡步瓊 字又安向清城保人乾隆八年歲貢十九年授南陽訓導再攝教諭事篤志力學殫心經傳弟子從受業者多所造就所著有四書衷朱解取諸家之疏會通其說而衷之於朱子里中學者多誦習之

胡仁頤 字扶山刑部尚書季堂孫以光祿寺署正中順天鄉試任湖北德安府同知權荊州府知府仕優則學富於典籍書法尤名重一時鐵畫銀鈎其一種剛健之氣能令見者肅然起敬蓋渾化顏柳而自成一家也

戴殿颺 蕭灑出塵工詩善畫舊志圖繪俱係殿颺之筆弟殿傳詩畫亦佳不愧與兄爲伯仲到於今人並稱之

管 洛 字紹程聰明天賦爲文有師法弱冠中副車讀書尤以力行爲本居恒嚴內外恤物力篤親戚厚朋友睦鄉鄰一動一言必期可以爲子弟法修族譜立條教合族子弟謹守其法度捐貲購陳氏廢祠創立廟宇爲老岡保公所與保衆立約法歲時講習申明孝友睦婣任卹之義地方風俗日歸淳厚邑令重其學行有大創舉必肅簡相商一時修聖宮造邑乘建立奎閣書院凡有關學校而善風俗者罔不與爲助理晚年司

鐸羅山教導士子專以近裏切已崇實黜華爲務非徒重文藝之末也至其平日修橋補路濟困扶危之事皆隨遇而爲之不能悉紀

王雅南 字杏山登嘉慶戊辰進士任江西南康縣知縣再任大庾縣所至廉潔自持專以禮讓教羣黎不事鞭撻人以爲迂久之山野人民遂漸向化卽盜賊亦有改行者丁內艱歸里淡於名利不復仕進主講涑水書院最久文風丕振雅南早年爲諸生窮日夜之力鑽研經籍讀書之外不復問人間事如是者數年人或目之爲書獃學使鮑桂星案臨賞其文自以爲不及選其生平得意之制與雅南之文並刻之爲鮑王合稿雅南爲制藝鎔經鑄史與他人蹊徑迥別駢體文尤有師法一生論文以西漢爲宗謂西漢兩司馬一散一駢各造其極不得有所軒輊散文之妙夭矯如龍蛇固自可愛而駢文鏗鏘中節音韻悠揚感人更深東坡稱昌黎文起八代之衰然魏晉之文亦自有不可廢者卽如唐之王楊盧駱其絕境恐昌黎亦不能盡到要非深入古文堂奧者不能知也一時從遊之士獲益良多

晏承仲 字翼夫生而明敏常慨時文卑靡獨有志於古文以挽救之於唐宋之文遷固

之史上至國語國策百家諸子莫不窮年探討簡鍊以爲揣摩故其爲文有獨至之境峭刻似介甫簡切似老泉而一生躋直徑行亦與其文相肖道光癸巳登進士分發江蘇甲午充江南鄉試同考官乙未署東臺縣事其地近海以水饑爲之請緩征請賑卹溺民獲全活丁酉調灤水地狹事簡時入膠庠造士文譽播於金陵世族子弟多來請益戊戌調桃源地衝事繁盜匪叢聚承仲謂盜風不可長鋤強暴剪荏苒著名巨匪悉置諸法盜風頓息己亥授睢寧睢徐州之邊邑地瘠苦俗強橫承仲爲政雖用剛克而以民無生業難與爲善自光山郵致棉種教百姓種棉治睢二年睢民漸知紡織之利以事與省委齟齬而叱省委省委陷之降一級調用悻悻求去辭制軍時值英人肇釁人才缺乏制軍以承仲有廉幹名不許去曰子所坐公罪何足介意國家當用人之際應勉圖報効遂留轉軍務三年事竣開復原官並加升銜承仲不居功亦不謝告病歸里藩司留主講鍾山書院以病固辭行李蕭條家無恒產居鄉里與諸生講學宴如也後主講涑水書院六年光邑後進半出其門翰林學士張鵬翼自謂一生學問得力於承仲

晏卓 字立如庠生讀書有心得最惡朱註誤人嘗謂朱子補傳離經太遠自天子至

於庶人皆以修身爲本格致誠正是修身內功那能說到凡天下之物孔子告哀公曰齊明盛服非禮不動所以修身包是格致誠正皆抱括在齊明盛服非禮不動之內物就是物欲格與改革通孟子曰耳目之官不思而蔽於物物交物則引之而已矣書曰格其非心心何有非物欲蔽之也格去此物欲而心之非格之矣卽釋教身是菩提樹心如明鏡臺時時勤拂拭不使染塵埃之說也此是檢點工夫去一貫尙遠況且孔子教人修身未嘗逢人教之以一貫一貫是善讀書人自得之境不是他人能教到的孔門中顏子而外惟曾子得一貫之傳此外則惟教子貢閔冉之下尙未盡知今教初學徧格天下之物而望其豁然貫通有是理耶然讀書人求學問惟身體力行者能自知之不能以口舌爭又謂孟子晉人有馮婦節卒爲善句士則之句野有衆逐虎句士則之正與下文趨而迎之衆皆悅之其爲士者笑之相應成文其爲士者笑之之士卽是上文士則之之士茲割卒爲善士句則之野句則之野三字與上文完全不相接且不成句三字相連就講不通連章法句都不懂這不是以譬導譬耶其摘四書中疑義如

此類者甚衆自爲四書解不輕以示人一生落落寡合中年後與陳簡爲詩友滿清二百餘年光山縣以詩鳴者不少而卓然成家者惟陳簡晏卓卓才氣不逮陳簡而詩律之細過之其論詩謂宋不如唐唐不如六朝唐詩雖光焰萬丈終不若六朝之情真語摯也著有老桂軒詩草亂後遺失今僅存者惟七十以後詩數卷

管繼煒 字貽堂好讀書沉酣經史尤喜吟咏音律和平先是鮑覺生太史督學河南著有咏史詩傳於時繼煒酷好之是時光邑士子鄙陋以八比爲聖學八比之外不復知有子史繼煒將鮑太史咏史詩祥註之以教後學一時稱爲通儒及其身子孫輩聲庠序者六人

易理精 字純夫學問淹博不喜爲制藝解經多蔑視前人爲詩文卓犖奇傑不可一世道光壬辰舉於鄉甲辰選授榮陽教諭生平教授以經學爲根底而於宋學之迂拘漢學之支離一概唾棄其議論以經世爲要坐而言卽起而行故門牆之士能變迂腐爲有用任職伊始縣令一見深相契卽遣其子執贄受業學著舊有樓數間封鎖百餘年觸之卽有怪爲崇理精爲文祭之怪遂絕滿清設教職本閒官與諸生常終年不相聞

問邑士聞理精學行與往昔校官迥異羣趨學宮求學理精整躬教誨口講指畫孜孜不倦閩邑稱爲真教諭云

張鵬翼 字藏三沙城里人同治壬戌登進士選庶吉士散館授編修大考翰詹以一等授詹事府右春坊右中允充國史館協修轉左中允京察一等升侍講學士補日講官起居注鵬翼爲文洪深經術淵渟蓄願近劉向匡衡故在翰詹最有名性恬淡自通籍歷清華登禁近儉約如寒素平居杜門自課不妄交遊嘗謂人生顯晦皆由天定爲其拙勿爲其巧爲其樸勿爲其華徵逐於勢利場中殊覺了無意味也年五十八卒於京師

易子彬 號鶴星同治乙丑登進士選庶吉士戊辰授編修乙亥預修穆宗實錄旋京察一等以御史記名分校順天鄉試頗稱得士子彬身長秀挺方額采眉動容貌正顏色出辭氣親其道範如光風霽月一望而知其爲玉堂人物其爲文章雍容掛讓在歐曾之間生平無他嗜好惟勤攻典籍藏書萬卷皆手加丹黃接引後生教誨不倦一時稱爲真長者卒年五十有四

易子懷 字蘭笙少讀書穎悟絕倫貫穿經史諸子百家詞章典麗逼馬揚書法遒勁追顏柳而天懷淡定蕭灑出塵里居授徒隨機指點被其澤者如坐沾化雨如坐春風未有不欣欣自喜者文人聚會辭鋒橫出談吐生風說千百年之孝子忠臣仁人義士傳神繪影能令聽者激昂奮發慷慨悲歌誅姦邪窮極醜態使人笑吃吃不能止然其議論確有根據非學無師承而嬉笑怒罵者比也同治庚午舉於鄉一上春官不復作黃梁癡夢闢五畝之宅作無懷之民種竹栽花眠雲臥月時與二三知己登山臨水把酒吟詩煙火神仙雖南面王無以易矣年五十一卒

王祖晉 字樵白舉人器宇端凝淡泊明志事親定省必正衣冠嚴以律己和以接人築豐松館左圖右史涵詠其中有執經問難者必遠引旁搜指事類情悉寓勸勉人皆親而敬之感而化之著有讀禮証今三卷

王敷重 字暨方舉人考取國子監學正主講涑水書院六年教人躬行實踐去僞存誠先器識後文藝士風爲之一變著有染學齋詩古文集

胡義賢 字鐵齋進士官至順天府丞爲人剛健中正與之處能化除邪枉振萎靡之精

神工篆書義質係大司寇季堂曾孫如三代鐘鼎暨李斯以下之篆碑家藏極富窮年探討歷十載篆而書成名重京師弟義贊字石查舉人書畫俱臻絕境書逼趙董畫擬三王

劉鳴皋 字舞鶴年未冠中副車好爲狎邪遊三往揚州狂於杜牧詞賦艷麗冠絕一時遠近稱爲仙才後登進士任陝西大荔縣知縣卒於陝

陳簡 字文舫同治丁卯舉人歷任虞城訓導唐縣教諭讀書見大意平居講學爲士子說詩書常就世故人情一點便醒與人談論時雜談諧粗鄙儒生對之自慚形穢詩才傑出不晉不唐不明不宋任天而動自成一體古歌詞源握動一氣奔放河海不能息肩近體信筆直書自然靈活草木爲之生色人情曲盡雅俗爭傳著有自怡悅詩集行於世

王性存 字葆常同治庚午優貢期考一等任山西榮河縣知縣少年作宰用人不當獲罪遣戍性存詩書畫擅鄭虔三絕雖戍邊才名震一時戍滿閩撫劉銘傳首聘之平定台灣生番後開復原官爲各督撫幕賓十餘年親老歸養鄂督張之洞屢聘不出著有

升山前事記 羸峯詩古文集知味堂雜著

官濟清 字汝舟城南關人自幼篤學立品敦行張曜守光州深器之取以冠多士舉光緒乙酉鄉試家居不干外事爲文章清真雅正惟以課士爲樂一時後進半出其門後張曜撫山東最稱好士濟清以舊門生入幕爲上宏趨謁者自衆雖日與宦途人相接除談學問外來嘗居間說一事奔競者多譏其迂拙而魯省一時之大人君子莫不尊重之後以新鄉縣教諭終

李汝霖 字羸伯光緒壬寅舉人能文章縱橫馳驟出入班馬韓柳之間家貧堅固自守一介不濫取丙午遊京師假館於學部侍郎張仁黼後聞袁世凱在保府立學校專招北五省舉貢辭館赴保府有無賴子劫其篋仁黼聞其被劫也餽洋二十元却之曰李瀛伯豈受人涎沫者或詰之應曰古人謂丈夫不受人憐此言極有至理人生於天地要獨往獨來不受絲毫牽掛方能作事若受人私恩小惠受而不報是不仁也受而圖報則終身在人術中不能一日自主矣故刻苦自勵於烟花博奕酒食徵逐之事一概謝絕壁立千仞惡惡極嚴是時結黨之風盛行於學校汝霖獨曰君子羣而不黨可者

與之其不可者拒之吾不能同流合污也戊申病沒於保陽年三十九

熊觀光 字煥廷博覽羣書不屑屑舉子業光緒乙亥鄉試中副榜遂絕意進取幕遊鄂蘇浙各省以文章與當地人士相馳騁晚年教授陳州府中學及本縣高等小學課讀之餘日奉一編遇賞心處輒筆記之得若干卷于四子書尤深精研總纂漢唐宋明清諸大家論說編後附以己見不主一家言家藏待梓嘗得句云頻年估畢成書癖大半光陰被墨磨又云通今遍覓新聞紙好古重溫舊讀書其志趣可想見矣卒年八十

熊起清 字幼橋邑庠生其光子幼而聰穎承家學爲文苦心孤詣不落恒蹊甫弱冠文名籍甚丙戌縣試第二州試冠軍丁亥院試第一甲午鄉試領解人稱爲小三元戊戌會試擬中以額滿報罷竟得揀選知縣嗣膺聘主講陳州柳湖書院每一藝出土林傳誦光緒季年歸任本縣高等小學教員因經費不足創議籌畝捐得一萬三千餘緡學欸頓裕又爲之規畫設備士風丕變惜因勞致瘵卒著有醒世山房文集

陳侃 字郢希清光緒乙未進士以卽用知縣籤分福建補授建寧縣爲人迂謹耿介不善事長官履任二年以計典去職士民詫異紳耆父老咸赴上游籲留格於例爲之

立去思碑碑中所紀者爲聽斷持平催科不擾警刁健扶弱寡表節烈懲悍潑調和族鄰矜恤耆幼諸政在近人視之自以爲定遠之平平而陽城固應考下下也丙午春歸里益惡機心機事自安迂拙慕漢陰丈人之爲人於宅旁闢小園名曰抱甕杜門不出日以課子孫蒔花竹爲事自叙云這癡頑老子無德無才不文不武曾戴過惠文冠曾持過廣寒斧餅曾啖過紅綾詞曾吟過白紵其讀書也雖未能發揮雄文卻懂得古人規矩其在官也雖未能康濟時艱却曉得民間疾苦其居鄉也雖未能薰德善良却未嘗柔茹而剛吐有丈夫子五人有負郭田百畝寵利莫予歆豪強莫予侮不敢夸耀鄉鄰不屑干求官府隱微可以對天綢繆常於未雨屏去機心自安椎魯因自號曰抱甕園主

殷心學 字午喬磚橋人歲貢於經學甚勤尤專心致志於易講學茲南設爲問答自謂玩其辭觀其象以發明古聖人數千年不傳之秘俾後之學者得所憑依以仰體古聖人立說之本旨皆有自然之繩墨五經均可一以貫之而入德之門從此始矣其說經雖不無穿鑿之處然不可謂非讀書有得者也

人物志

義行傳

周禮以鄉三物教萬民孝友睦婣任恤謂之六行而不睦不嫺不任不恤與不孝不弟同列於八刑以今日視之何其督百姓之無也不知人不能離世而獨立互相依倚始能生存於世界古之聖哲本人之良心而制爲孝弟山近推遠而睦族姻戚皆本分所當爲再推而廣之地方之公利公益以及捍災禦患必分任而後能舉事若夫遇天災人禍陷於水火塗炭古今中外仁人君子不問胡越讎敵必節衣縮食以謀賑濟問其所以然皆惻隱之心爲之也故六行雖分而原本一理因人之知識有高下材力有大小而聖人各盡其才賢者能者則以禮賢與之而進行用於王朝其或愚不肖亦必與知與能驅之於睦婣任恤之途而不使或外蓋不如是則不足以共保生存也後世失教愚民鮮知此道即士大夫亦祇知自愛其身家行野興悲角弓致刺由來久矣豈知孟子稱一鄉之善士一國之善士天下之善士而不問有一家之善士乎然天理一日猶存則人心一日尚在古來義行不可掩也作義行傳

北周

孫樹仁 樂安人以好義著名鄉里臨邑張軌少好學志識開朗樹仁與之爲莫逆交軌家貧樹仁每與易衣而出軌後杖策入關累官黃門侍郎兼吏部尙書出爲郡守徵爲支度尙書聲績甚著有循吏之美而樹仁亦以此見稱於世

北史張軌傳

明

謝 璉 永樂二年以荐舉授鞏昌府教授訓課必先道義以端士習後致仕歸出穀二百石賑饑救旌市閭曰義門

吳子斌 遇仙里人董倫在城里人何景寨河里人正統三年各輸粟一千石賑饑有司以聞並被救旌

胡 熙 天順二年輸粟四百石助賑救授冠帶

彭時春 號敬齋庠生天性孝友殫力色養晨昏無稍懈弟一春早沒遺孤方幼稚時春撫如己子及孤長以已產分子之鄉有劇盜肆害里人患之時春往諭以禮義力爲勸誘盜愧悔遂改行向化豪家欺其鄰孤幼欲奪其產陰以厚利賄時春求爲之佐時春艱然峻拒之力護孤事遂寢族中貧不能昏葬者罄貲以助又稱貸者不能償焚其券篤志力學誦讀外無他好也子應參官御史

蔡元中 字義安爲諸生以恩例入太學父光見儒林元中督家有法好義喜施萬曆初歲飢元中傾廩以賑活萬餘人性行端方人敬憚之山寇竊發元中設畫立散其黨寇窮乃諭以大義遂向化子璵密雲副將

黃惟金 副使正色之從子也以恩例貢太學授光祿寺署丞富而好義輸銀二千兩助餉救建坊旌之

羅文新 爲人敦厚好行其德正德間其祖璜值流寇之變居民流竄璜代輸逋賦百餘家歲祲又出困粟以賑饑者文新克承先德喜施不減於璜萬曆四十五年遘奇荒文新捐粟三百石輸官賑濟弟武新早卒撫其孤如已出卒後以子寬贈陝西按察副使呂振周 邑諸生少失恃事父至孝篤信好學動必以禮兼善岐黃術扶危人以孫明復任定祖輩目之

清

何 漣 性孝友兄弟析田產盡以腴者讓諸昆曰骨肉析居方痛心之不暇何忍較量肥瘠雍正五年邑大疫死者無算漣捐郊外已旱地十畝作漏澤園子書思亦好善有陳留縣老婦劉氏流寓光山病死書思施棺斂之其遺孫喜兒方數歲并收養於家俟年二十餘始遣之歸書思子式金乾隆甲午由拔貢舉順天鄉試

胡 恭 字存敬嗜古力學文有豪邁之氣以歲貢里居授徒杜門不干外事有從弟貧

不自給歲時仗助終不至困乏從子文耀幼孤恭鞠訓之卒爲諸生性剛直遇宗族親知有過失面糾之無所避鄉里莫不欽其嚴正

滕楚山 幼孤事母至孝母年高楚山就寢母榻前每夜必起省視凡飲食寒暖躬親調護性好施乾隆歲饑比冬自行煮粥以食饑者凡六十餘日會大雨雪無衣者施以布襖賴之全活者數百家里中揚旆橋久圯楚山捐銀二百七十兩命子董修初楚山於幼時於途次拾遺金十餘兩因留止其處以待遺者次日失金者倉皇至乃縣民某鬻女之銀詢其數合悉還之其輕財好義蓋天賦也子啟文善承先志

管 珩 黃龍塔人與兄瑀篤友愛同心協力以勤儉起家珩子二瑀子六養育教誨不爲岐視諸子列膠庠者七一門雍睦詩禮日盛乾隆三年旱荒次年春雨降耕者苦無籽種珩捐穀四百石贖其鄉里至秋大熟人爭償之珩俱不受

戴世穀 家計素封乾隆三年災當事者奉文發賑暫養貧民世穀捐穀三百石以助賑見中州彰善錄

許爾升 性樂施予親黨慶弔緩急多出資助之鄉鄰有貧者亦每資其衣食乾隆三年

邑境值旱災鄉人大饑爾升捐米煮粥一月全活無算奉獎載名彰善坊

魏風 邑諸生鄧國泰邑耆民乾隆四年民多乏食雖有官賑苦不能徧風及國泰於

春夏之交各煮粥一月以濟貧者

中州彰善錄

曹士琳 字攻璞邑諸生與兄析居時盡以其產讓兄自爲居積計家日裕饒女弟適胡姓貧且寡士琳賙恤最篤妻弟之婦藍早沒子女幼無所依士琳收至家撫之婚嫁皆如己出子紹周亦好善乾隆戊子歲旱荒縣中放賑會大雨雪紹周見有赤足立雪上者問之爲領賑饑招至家與食食之又有田與某連畛某鑿塘覆土畛上傷田禾紹周不與之較人稱其長者

萬紫 幼出嗣季父嗣父沒哀毀骨立泣不成聲事嗣母承歡如一日從弟芬貧無依紫收養之後芬夫婦相繼沒爲之殮殮和睦鄉里力敦古道性剛正遇非禮之事輒面加呵責故里中後進莫不嚴憚之

傅漢陽 家小康好施予鄉鄰有借貸不能償者輒置不索施義地三畝以葬貧民每歲施棺施槨歷久不倦

彰善錄

徐亮彩 字日升爲諸生餽於學好學能文制行不苟從遊之士甚衆里有買幼女撫之爲子婦者比長將合婚以貧故欲嫁之殿彩呼其母子至家而給以貲爲筵期具禮合奩母子感泣其子與撫女得完夫婦如初志云

甘麟定 字仲仁邑增生性端方好義凡族之貧乏者時爲調濟個人熊姓父子相繼亡麟定具棺葬之撫其遺孫至成立遣去乾隆三十三年饑有鄰人飢臥室中且死麟定以粥灌之甦繼予以粟遂得存活弟麟祥字叔仁亦嚴正好義麟瑞字季仁邑諸生動必以禮足罕入城市里有爭訟者恒捐資息之

李士潤 神劉橋保人敦行尙義里有貧而竊者士潤勸之助以財物其人遂改行乾隆二十三年春植荒土潤捐米三十餘石煮粥以賑全活甚衆

曹啟珍 磚橋保人性長厚篤於宗戚同族聚居數十家皆恤其憂患葬族中貧不殯者七棺親黨貧歿者給棺衾歛之歲饑周濟親朋之尤貧者量力以濟其乏乾隆三十九年年七十三卒子夢簡歲貢生

劉洪柱 字良弼吳褚寺保人康熙三十八年捐地二石有餘以葬無依者卒年八十二

喻義 官堰保人乾隆三年歲饑出積穀二百石賑其鄉

以上俱舊志訂

魏佐夏 爲人渾厚謹嚴節用於內樹德於外每歲終凡親鄰貧苦者必以米濟之數十年不少怠縣令汪槐旌以匾額子國良能繼父志鄉里皆稱爲善人乾隆末年大荒有吳姓糴穀五斗墮入水中坐視垂泣國良復攜穀五斗與之毫無吝色吳姓一家得全活國良子有權尤恬靜而寡欲與物無競得失不介於懷縱堂孫元弼多病以術士之說惟室是尤換屋於有權許之居三年復思已屋又欣然許之遠近服其德量

任之福 字靜凡家素封樂善好施親族待之舉火者數十家嘉慶十九年歲荒民艱賦稅縣令請緩徵未遂苦無救濟之策之福破私囊將縣北十數里錢糧一切代爲完納上下德之

文維新 號曉亭磚橋人祖紀之庠生諳天文道光二十九年六月夜見星隕如雨曰十年內必有大亂令子孫學孫吳兵法及少林技術故咸豐初鄉里早有禦侮之基礎維新生而岐異篤孝友甫冠失怙父嗜酒終身不忍縱飲與諸父昆弟析居田產什器聽其自擇咸豐六年丙辰歲大饑出積錢千餘串穀二百餘石悉以散給親族里黨之貧

者概不索券十一年辛酉匪熾磚橋練總羅千煥以野戰歿地方惶恐萬狀羣議維新
輕財仗義有膽有識能係一方民命公請出任艱鉅維新曰地方之事自當地方人任
之但新敗之後人人破膽全無憑藉斷不能率渙散不教之民與悍賊浪戰當爲一勞
永逸之計修城池聚老弱練丁壯賊盛則嬰城固守往來小股出奇擊之此萬全之策
也衆鼓掌稱善魏稚鶴陳曙峯竭力贊助時經費無出維新捐銀千餘兩爲之倡不足
賣田稞四十石以益之擇地興工定章程立約束計丁征役選各戶公正者爲首領各
率其屬趨事赴功維新自在督修黎明卽起鳴羅聚衆察勤惰行賞罰冒三伏之烈日
衝隆冬之風雪督工不倦歷歲餘而蒞事同治二年癸亥二月維新方應州試列前茅
第六聞匪耗卽收拾旋里同伴阻之維新曰故鄉人命爲重耶浮名爲重耶至家一破
纔得首卷容有濟耶星夜馳歸時寨堡初成人無固志聞匪來星散剩空城一座日暮
匪至維新獨率健僕數人列旗張燈擊鼓匪不敢逼黎明匪攻城維新連發巨礮擊斃
匪首一名賊退圍梅家寨四鄉逃亂者聞維新據寨退賊咸知寨爲可恃襁負來歸維
新揀丁壯二百餘人乘夜馳救梅家寨沿途燃烽火喊聲震天地賊不知衆寡蜂擁東

走救出男女無算魏稚鶴作詩紀其績次年賊由桑柳樹突抵秦家岡維新率壯丁禦之賊不能渡自是民氣益壯捻匪不敢窺磚橋五年亂平以功保舉任浙江景寧縣典史縣令服其才倚之如左右手邑俗死者用火化貧者典質婦女皆建議出示曉諭禁絕之鄉民爲倉穀爭執致動干戈奉委彈壓秉公調處民皆悅服調榷龍游縣大記卓異欽加同知銜補柯亭巡檢在任候選知縣以老告歸邑紳留飲十餘日贈詩成卷有消盡胸中萬斛塵慈祥不愧宰官身於公陰德人爭頌待看桃花滿縣春之句陳太史寶巖嘆曰曉翁何所作爲而致此曰某亦公平與物不肯欺心而已既歸田偶題云青山笑我爲官貧徒作浮塵百慮身但學糊塗消歲月莫貪溫飽耗精神操持有柄休寬已毀譽無常祇聽人冬雪梅花秋雨菊始知隨地徧陽春許多壯志俗塵侵轉瞬風光作夢尋不學敢存希聖想閒居空有濟時心高山流水情懷淡魚躍鳶飛寄託深既往未來原數定何勞身世計升沉讀此二律可以想見其胸襟矣年八十卒著有淡香詩集十餘卷

李曉昇 字紫潤性質直平時無急言遽色能以正服人爲鄉黨解紛片言冰釋里中義

舉知無不爲立義塾建義倉每當暑月見有負木料不售者輒憐而購之積數百株適同治癸亥疫作死屍載道盡以所購木製棺殮埋之有彭姓孤子負債急議鬻妻曉昇爲貨錢止之光緒丙子白蓮教案發撫旨飭光州知隸州饒國慶緝提法辦合邑惶懼曉昇恐激成事變玉石不分懇饒公將案稟銷安反側以靖沸羹饒贈之獎以弦南一柱匾額地方隱受其賜年七十三卒子國慶孫之釗俱登進士

成 瑄 沙城里鄧家樓人秉性剛直處事沉毅咸豐三年癸丑時有洪楊之變山寇乘間竊發抗官拒捕閭里騷動巨寇梁國賓結夥數百人佔據陡山河東北之大山自名曰梁山寨擄掠燒殺鳴炮出入瑄一面與各保聯盟互相保衛一面稟明縣署縣令貪汚庸劣坐視不問瑄憤甚聯合七保鄉勇決計進剿事前召士紳謀之畏葸者持兩端謂庶人無剿匪之權瑄詰之曰庶人不能剿匪縣官獨能養匪害民乎我已報明縣官縣官不問君等能甘爲魚肉日日受寇賊之宰割乎自梁國賓盤踞山寨以來未及半年搶掠婦女殺人越貨地方受害者已數十家君等非梁賊之姻親能保其不遭屠戮乎梁賊不過無法無天敢於殺戮耳並非有三頭六臂男子漢大丈夫奮勇殺賊何患

不勝縱令討賊而死生爲義民死爲雄鬼不猶勝於引領受刑乎衆曰要保身家除了滅賊別無良策但滅賊之後這種縣官倘誣我們造反將如之何瑄曰君等大多心了縣官養成了許多盜賊星星之火將至燎原縣官不能剪除應當有罪我們拚命殺賊在國家還算有功何況縣官君等當努力殺賊縣官如有爲難之處我自一身承任決不係累他人衆踴躍聽命瑄有甥馮培蔭邑廩生足智多謀爲瑄籌畫一切部署已定尅期進剿各保壯士皆磨拳擦掌準備殺賊梁賊探悉一夕竭全力出發欲乘鄉勇未聚一鼓盪平鄧家樓該村樓房高數仞牆壁盡磚石攔門禦寇保可以險有警燃信炮鄉勇即能援救是夕瑄見賊勢浩大所養士卒不能獨力作戰急閉門自守連發號炮賊運柴沿門舉火合村煙焰彌滿丁壯有不能容身之勢俄而連保救至四面燃烽鳴炮而來瑄令士卒冒火突出內外夾擊賊不能支馮培蔭早領鄉勇一枝逕搗梁山寨乘虛直入放火焚寨柵賊望見火起四散奔潰瑄指揮鄉勇分途追殺屍橫徧地次日廣張佈告南山餘匪限十日搜清藏匪之家與匪同罪接連十餘日各保送來逃匪問明便殺計前後共斬首二百七十餘級縣令聞瑄擅自剿匪躬親詣驗馮培蔭備公館

迎入縣令作色培蔭益恭縣令傳成瑄瑄帶劍大步入叫曰那是縣官培蔭曰這是水老父台瑄曰甚麼是個老父台培蔭曰地方官是民之父母士庶見官應稱老父台瑄曰這樣說老父台就是縣官的別號我是深山野人不曉得那些儀節要求恕罪了縣令曰爾就是成瑄答曰正是令曰爾也太鹵莽國家人命是如何重大爾一匹夫擅殺數百這人不是叛逆嗎瑄笑曰天下事真變了怪不得人家說洪秀全的人捉住官就殺還說是替天行道今我殺了幾個強盜反說我是叛逆那殺官的真算是替天行道了令聞言面如土色忽報各鄉送匪至瑄仗劍起對令曰老父台少待野人又要叛逆了立轉到隔壁問案審問三數語命都押下去斬首隨又大聲曰喚馮培蔭來培蔭趨入瑄曰把那狗官牽去處斬以洩吾恨培蔭曰他是朝廷的命官如何使得瑄曰我祇曉得撫我則后虐我則讐不曉得命官不命官朝廷要命官虐我我把官殺了還要跟朝廷算賬哩培蔭低聲曰大人要殺他他也跑不了何必造次瑄曰暫交爾看管培蔭出見縣令令聞瑄哮怒嚇得魂飛魄散見培蔭至不能出聲培蔭以好言慰之隨引令到馮家灣私宅令哀詞求救培蔭曰家母舅雖是粗人斷無他志但糾合縣勇出力者

數千家羣以爲有盪寇之功老父台要以擅殺之罪加之怕是激成大禍試問國家尙不能滅彼山寇豈有力能壓迫此剿滅山寇之鄉勇乎倘或辦理不善別生他變照國家法律老父台能置身事外乎縣令沉吟良久復請曰計將安出培蔭曰廩生有一策可以兩全老父台且可以因此升遷未知能容納否令曰既有良策可共決之培蔭曰國家不畏山寇而畏教匪前聞湖南有一教匪案匪首潛逃諮各省通緝梁山寨密邇連康萬山叢雜就說教匪竄伏於此煽誘光黃間饑民爲亂老父台密諭成瑄糾合鄉勇拿護匪黨就地正法殺人雖多上憲必不究也縣令稱善立命培蔭代起詳稿培蔭一揮而就縣令閱畢大悅培蔭請縣令畫行密遣親信人同縣令家丁送稿縣署通詳各憲留縣令巡閱各保盤桓五日俟縣署詳文發後始命各鄉勇放花炮送縣令回署後撫院獎給成瑄五品藍翎越年餘而擒匪破縣城光山無寇賊響應者則成瑄之功爲不可沒也

王彥存 號雲士增生精武術咸同間捐貲修里仁升子頂兩寨辦團練禦賊與賊數十戰出奇制勝一方安堵同治三年賊踞新集連破五寨人心洶洶彥存率鄉勇二十四

人偵賊遇賊蜂擁上乃伏勇於隘獨進挑戰斃賊七人鄉勇驟起馳擊大敗賊衆生擒賊首韓兆虎斬之賊自是不敢窺山寨至今父老言戰事猶凜凜生風曰微此一戰則山寨皆不保矣亂平就職鹽大使卒年七十子原泰湖北州判原恒歲貢原頤丁酉舉人

鄭綱堂 貢生八里岔人性耿直爲一方所敬服自咸豐五年息匪易天富破縣城李士林相繼入境肆行殺掠人人自危八里岔正當正息捻匪入光之衝道與匪僅隔淮流綱堂召集各鄉士衆明白開導謂國家多故土匪乘間四起國家無保護人民之餘力非人民合力同心急謀自衛隣邑之匪往來蹂躪不及數年將無子遺匪雖驍悍不過揭竿之衆既無紀律又無堅甲利兵誠能築城鑿池以備守禦有事則老弱糗糧六畜盡歸寨堡率壯丁迎戰以逸待勞以飽待饑以靜制動再聯絡各寨彼此互相救助我可以坐操全勝匪必不能爲害綱堂素爲鄉里所信仰加以身家性命利害之關係說得十分透澈士民莫不贊助會功令四鄉辦團練綱堂遂任北鄉練總縣北民性强悍樂於戰鬥經綱堂訓練教之以戰術更自十分勇敢屢挫匪鋒八里岔附近數十里

匪不敢近同治元年二月陳玉成自湖北分大股入光山結合息匪共數萬人圍外城數匝光州守率練軍赴救亦困於城內綱堂率鄉勇三千赴難賊分兵拒綱堂於何家窪相持未決夜二鼓西鄉練總馮誥自破山口張燈震炮而來賊勢已分又疑大軍猝至遂解圍南竄是役也非兩路鄉勇則城幾不保二年穎亳正息之匪往來如織防不勝防綱堂計匪自北來必渡淮河乃與李寶涵暨沿淮之志士結盟謂賊一渡河已是入我堂奧與其肉搏於室內何如扼守於大門百人扼守淮南萬匪不能飛渡縱有小股繞淮潛入沿途截擊匪即無路可歸比之縱匪過淮勞逸相去十倍衆趨其策共推綱堂爲盟長遂自八里岔抵淮河上下創立十七大寨於淮河南岸分段防堵有警互相援助自是數年賊屢受懲創不能深入全縣以綱堂爲長城至今稱道弗衰

李寶涵 性豪爽好技術喜賓客淮南北百餘里拳勇技擊鬥雞走狗之士莫不知其名英銳少年莫不樂爲之用同治初正息捻匪肆擾邑北與匪隔一衣帶水鄭綱堂用防淮之策遏止北匪臨淮而戰與匪決勝負於上下淮流殊死出奇挫逆鋒而破賊膽寶涵之力爲獨多

馮誥 咸同間爲西鄉練總大股匪圍攻縣城州守何桂芳赴救亦被困城內鄭綱堂率衆援救賊分兵拒之於何家窪縣城危急誥督鄉勇乘夜燃烽火照耀十數里分令鄉民放炮助威自鳴鼓角出破山口直撲縣城匪驚爲大軍猝至解圍南竄誥以功保舉千總

易元亨 字雲霞貌修偉慷慨有大節以軍功擢蘇州都司咸豐中亂作元亨適致仕家居與弟雲峰潤普捐貲創修霧山寨遠近來避亂親族待之舉火者十數家預積松柴任人取炊不計值同治二年陳國瑞兵敗於塔兒岡退依山寨見元亨問方略謂相見恨晚僧格林沁禮請出襄軍務以衰老辭多將軍禮堂慕其名餽茶與書有行義即以愛國自守即以救人之譽精醫術陳國瑞之敗也參謀徐某傷重不能語元亨治之數日痊愈乞爲螟蛉子不受暮年李以醫術濟人

李春午 綽號小午膂力過人見天下將亂有保衛桑梓之志息縣某練拳術自謂得少林家法春午往學之以爲未足匹馬走河洛燕趙徧訪名師河北某縣有一尼菴老尼年七十有少徒年二十許甚有名春午往訪之時七月初黍正出穗春午故馳馬在菴

前來往縱馬食黍穗踐踏不顧小尼早瞥見出菴叱曰何處狂客踐我禾黍應曰馬餓了小尼曰我種的庄稼不是養馬的復大聲曰養這一回小尼曰爾是個做甚的說話如此強硬春午自馬上一躍抱黍頭不動復飛身上馬對小尼曰我就是個做這的小尼笑曰既是遠來朋友可來相見春午至菴門下馬拴馬於菴旁門前頗宏廠小尼曰我看爾軀幹很奇偉口音不是本地人古話說得好祇有千里的朋友沒有千里的威風爾說話很自負想有奇技擇來我看春午抖擻精神施展武藝小尼微笑春午曰爾毋輕薄不服請一比試小尼曰爾兄弟幾人答曰單傳時菴前棗樹合抱小尼負樹而立舉手曰領教罷春午猛進當胸一拳打得棗實零落如雨小尼在春午背後笑曰爾有很好的個蠻力哩春午回頭再欲動手小尼喝曰莫要不懂交情爾看爾的褲子春午低視胯下已削去一片乃低身下拜自述姓名來意懇求指教小尼曰爾去拜我老師春午隨小尼入菴小尼先稟明老尼然後請春午進謁老尼低眉坐蒲團上春午長跪述明遠來誠意老尼啓視曰爾學幾年對曰初有是志尙未學習老尼顧小尼曰彼學否小尼曰也曾學過老尼顧架上武器謂春午曰汝自揀汝所素習者在院中一試

春午拜起遵命在小院使過門口老尼微點首曰也還可造朝夕與此徒練習吾時來指點可也春午留此菴年餘盡得其術以歸值隣匪頻擾光山與邑紳李報桃孔昭松等創修石佛寨訓練子弟爲一方保障遠近少年爭來師事之用武術顯者百數十人一日聞匪至率門徒十數迎於五里之外匪前鋒數十各執長矛洶湧而來春午喝曰鼠輩有何本領敢犯吾石佛寨匪曰爾是何人答曰我是李小午匪曰特來捉爾春午曰我們賭賽以我一人敵爾數十人如我身帶寸傷甘以石佛寨讓爾如爾們戰敗再去請爾那主將來與我對敵何如遂揮退門徒隻身接戰匪四面圍攻長矛並舉春午手持雙短戟運使如飛移時數十匪徒矛金盡落各持空柄爭逃逸春午笑曰毋恐吾不殺汝徐徐去請爾主將來賊率衆遁匪破陳家寨有匪百餘人據寨不去春午率鄉勇攻入盡殲之縣令聞其勇酌給口糧以資防堵春午大小與賊數十戰未嘗敗北至今父老談其軼事猶凜凜有生氣不能悉紀

文之杰 字麗堂幼失怙家貧以醫問世晚歲家小康親隣借貸不登記簿地方有義舉竭力贊助咸同間因匪亂文維新倡議在磚橋修寨相度寨基西北隅係之杰私產概

然捐出復典田八石以充寨費卒年七十

李從玉 同治二年建修雙輪河寨捐穀八百石以助寨費鄉人感奮數月告成

張希良 好善樂施不茹葷酒家貧若稍有蓄積便修功德新河橋樂善橋皆其首創建
造捐貲之外四方勸募不辭勞苦以抵於成人稱之爲張善人

黃作藩 字南屏胸懷坦白性情直爽鄉里有紛爭者聞作藩至莫不肅然解衣推食率
以爲常同治間匪亂作因斛山寨舊址倡首捐貲重修斛山寨鄉民賴以保全晚年好
靜於宅旁構別墅種名花數十本堆石爲山引泉爲池遊玩外委懷琴書胸無塵俗
任省三 字銀峯性樸質好施與鄰有兄弟析居因爭狹小起爭端者省三以外宅畀之
不求貲亦不受報嘗示諸子曰地厚載物人厚載福福不可知而厚則居心要訣也爾
曹能辦此一字吾有後矣其子孫至今誦之

鄒多秀 字竺畦好爲義舉咸同之亂捐鉅款倡修王屠店天保寨鄉民賴之咸豐丙辰
歲荒贍養族中之貧者二十餘家又與妹丈李遐年各糴菜子數斗每野必攜菜子徧
地布種經雨發生鄉人挑食賴以全活者甚衆子士杰定杰俱善承父志印暗室燈數

百部分送鄉村又捐修青石橋行人稱便

李遐年 字丹齡性忠厚好義舉咸同間匪亂作約易錦山張星宏等捐貲修雲山寨鄉民賴之每年收田租別貯谷二三十石以度年終無米之貧民

史記謨 太學生史紹魚庠生咸豐間匪圍史家寨七日夜寨中水米俱竭記謨約紹魚縋城出見匪首開陳大義許送銀百兩匪義之撤圍去

范潤山 同治二年捐修龍池寨所有槍炮藥火概屬自捐鄉里賴以保全

胡立宏 咸豐四年施義地一所以葬貧民六年捐穀三十石以賑饑民同治三年捐錢百餘串助修觀音寨八年捐錢百餘串修理各處傾圮橋梁人稱厚德

葉慶藩 好善樂施創修本處葉家橋一座獨捐經費行人稱之

胡宗瀚 字墨林咸同間匪亂起宗瀚住深山凡來避亂者均飢食而寒衣之路遠者多寡贈資斧修橋補路皆不惜貲財以成義舉鄉里有爭鬥者得宗瀚排解莫不服從

胡宗嶽 字雲亭居界湖北咸豐間提督蕭驥鎮界口屢至其家詢方畧適乏餉宗嶽指因以贈李憲之赴藩任繞道造訪盤桓數日稱其富而好禮宗嶽治家極儉而助軍餉

捐荒賑補橋路建廟宇以及寨堡之修築親隣之分潤貧乏之周恤無不量力以給故人共德之

李應庚 字金鏞咸同間捐貲數百串倡修賽山寨

蔡順 性好施濟附近崩河坎向無橋梁捐貲百餘串修之以便行人咸豐六年歲饑出私穀數十石以濟族之貧乏者又捐錢三百串倡修蔡家尖山寨以避寇亂

李錦章 及其弟錦心錦雲合力捐貲修築龍潭寨同治初匪踞新集破孟家寨避亂來附者無算飢者食之寒者衣之兼之養勇禦寇費財達萬金

李受華 字樸恒性慷慨好施咸同間土寇繁興於龍潭之東隅創修寨堡收容難民出私谷數百石恤之捐貲修理官渡河渡船以利行人修本地橋梁數處人共德之

胡作賓 字鯤南咸同間捐錢一千五百串修白雀園寨堡

任鳳誥 曾任考城偃師教諭同治初歸田督辦鄉團捍禦外侮

傅紫衡 咸同間辦團練曾率鄉勇隨光州守解固始圍

胡响 下灣里人少失怙讀書甚聰穎家僅中人之產是時土曠人稀愚民只顧目前

無大知識山林多放棄夾山田畝以水冲沙壓憚於勤苦多荒廢不治田主廉價變賣恒經年不能出售岫則人棄我取置方數里之產躬率健僕指揮經理作之屏之修之平之啓之辟之攘之剔之道路通田野治蒙茸出荆棘斬美竹顯嘉木露舉從前荒棄之土一經整頓左顧右盼盡是財源曾不十年岫則一變而爲素封之家但起居言動與他處富人迥別自奉儉約而施舍不吝待人忠厚而惡惡極嚴游手流氓不肯假以辭色有時困乏未嘗不賙濟其飢寒農民不給絕不拒其請求而毀傷竹木又絕對不肯寬恕一生義舉甚多不必細載其爲子女計獨有異於他人岫五男三女嫁女粧奩極儉約不異於中人曰男耕女織做衣裳穿是爾自己的本分我與爾的衣服雖不多準可以穿十年八年過此以往再要受凍何能怨我暮年有姻家來作中說某處有良田一份租稞一百二十石陽宅山林俱爲難得價值五千串岫決意謝絕姻家曰爾是沒有錢岫曰我家中有現錢四千串再賣幾石穀伐一些竹木也還可以交價但是我

有田一百石我的兒將來分產每人二十石很可以過活再要多了子孫便要仗着有貨財作孽外人還要罵我哩故十餘年來有錢隨意用拿定主意不買田爾的田比我

少爾買着我的錢留一千備不時之需餘剩三千一概借爾姻家得此俛助欣然承買就是那有名的核桃園這種爲子女的心腸都是鄉里癡人夢想不到的滇母謂光山無人也

裴振聲 字佐卿爲人謹慎廉潔自持民國三年旱荒縣令鄧曰瑞會紳商辦平糶公推振聲爲採辦委員任事六七月以廉幹稱五年會匪破城邑令以民變上聞請兵痛剿人人危懼大兵臨境糧秣供給莫敢承辦振聲曰兵至無招待將生他變禍曷有極獨挺身出支應一切不辭辛苦並謁來軍統將李輔忱備陳匪事顛末謂無知良民被愚者多請於拘繫之中詳加審訊以廣好生之德李曰予奉命從嚴懲辦非先生言予何由知底蘊當爲先生愼之未幾免究之命下全活者甚衆人以是德之

冷華林 字耀亭下灣里人少業儒長以家計艱難見父兄作苦不甘坐食改業經商不十年致小康然以家計廢學中年頗自悔樂與上君子相往來談及利物濟人輒欣欣色喜曰我聽讀書人說的話與街市行徑真是南轅北轍我也想學忠厚一倚市門見利則心動逐利自不能已回頭想到讀書人所講的道理又自心中不樂真是學錯了

藝道遂矢願量力調濟親隣每年提租穀若干到農忙時補不足助不給每屆年終整米十數石量鄰右之窮人人口多寡給以年米光緒中晏家河集使用制錢有大錢小錢之分華林經營鹽菜每到年臘月二十二日以後不問大錢小錢出售槽鹽一律平價二十九三十兩日尤額外開秤曰富人之年早已辦好到此時買鹽盡是窮人虧折幾何何能不一爲方便耶臨終教戒其子曰古人空乏其身而志在安人安百姓此聖賢之事吾自視才力不敢望此恥以衣食累父兄廢棄詩書身爲商賈於願已矣但天地生人德及一國者爲一國之善士德及一鄉者爲一鄉之善士若私天地之財以爲己有不能分潤他人在處世謂之不仁在一己亦斷不能久享我之一生不敢謂有德但於親族之困乏未嘗漠不相關也鄰里升斗之請求未嘗揮之使去也我非不愛惜貨財然拒之總覺有未安與之卽不以遠怨吾權其輕重不敢不出於此也况周公以睦婣任卹教天下是地方公利公益之善舉皆分所應爲恨此生無此材能空抱無窮賒願耳他日倘少有貨財爾其毋忘乃父之志卒年六十親隣哭之失聲

劉子選

字書圃新集人歲貢家素封每年不動產收入在萬金以上盡以用諸朋友之

應酌兵差之需要地方之義舉窮簷下戶之取求有勸之添置產業者謝曰照理說我之產業實在踰分不少要是董仲舒師丹再生早在限田之數何能再置故除舊有產業外數十年未嘗增益民國七年戊午族下子弟爲之運動議員不許十四年夏大旱米價每斗由四串漲到八串子選出其蓄積斗米四千直糶到底他人謂四集糧價都抬高了一個人定不住價子選曰我止應市不賣外販街內外非規則鄰我不忍抬價爾們賣外販儘可自便人以是益德之十八年卒卒後三年餘而新集城破屠戮極慘子選家屬由貧民一一送出未嘗遭害

熊俊英 字灼三邑西長潭里人性豪爽開心見誠仗義輕財好拯人於危遇糾紛一言立解人咸服之咸同之際髮捻蜂起倡修人和寨同治三年秋僧邸率大軍追勦捻匪夾寨而陣失利兵丁饑莫能興俊英時爲寨首遣人饋食賊怒移攻寨數日不去衆欲棄寨遁百計勸諭督率勇丁櫻寨固守圍乃解保全弁勇鄉人以數萬計長子其光字星橋邑庠生承父志樂善好施見人急難赴救若不及光緒己亥陳州奇荒州守程覺山請帑捐俸設粥場于太皞陵振饑民數萬其光時參程公募亦捐資助之並並爲施

放昕夕前往不辭勞瘁因感診致不起次子覲光孫起清見文苑

冷照離 字霽南下灣里人庠生性迂拙謹守禮法教授鄉里督諸生必規行矩步朋友責善不能容人之過篤孝友睦族黨清末變法冷氏一族在滿清入學堂者極少照離則獨以五倫八德教其族人不與世界文明競爭而教之以耕讀勤儉守分安愚修家譜以見志十四年乙丑邑令陳箴倡議修孔廟函請監工照離視修學宮如家事黎明即起與工匠雜處不辭勞瘁數月告成揚旛橋立一蒙學堂係照離手創

人物志

孝友傳

自孝經有明王以孝治天下之說由兩漢迄滿清雖不能實踐從未有敢直闢其非者夫孝弟報恩之義也孩提而父母哺乳之幼弱而父母長養之父母衰老則當反哺賢者事親篤至於是有愛敬之儀文推而廣之立愛立敬可以始家邦而終四海西銘所以有乾父坤母民胞物與之說孝經天子章所以有愛親者不敢惡於人敬親者不敢慢於人愛敬盡於事親而德教加於百姓刑於四海之文也然聖人立教必惟力是視故爲庶人立法則養親之外無餘事矣後世變遷父權隨君權並重往往苛求於其子孔子曰所求乎子以事父未能也玩此語意已是爲事父母者隱痛老子曰六親不和有孝慈蓋直斥子有孝子之名而其父母盡惡人矣故古之聖賢不以伯奇中生之事教人而孝經諫諍一章亦斥專從父合爲不孝後世誤解孟子得親順親之說不問義與非並專以不從父令痛繩人子致生千奇百怪之隱惡夫孝弟之道本生於人之一點良心仁人孝子之所爲皆出於至性至情而無待他人勉強百世之下有不覺感泣者矣若父慈子孝兄愛弟敬一家和氣醞釀醇風此孔子所謂惟孝友于兄弟施於有政是亦爲政也其感人不更深乎今取天性純篤之人作爲孝友傳而於割股之怪行瘞瘞之虛文自經之慘死皆削而不錄

劉宋

董陽 西陽人五世同居外無異門內無異煙元嘉七年南州刺史以聞於朝詔榜曰

篤行董氏之閭獨一門租布

南史

北齊

孫益德 樂安人其母爲人所害益德童幼爲母復仇還家哭於殯以待縣官孝文文明

光山縣志卷之九
太后以其幼而孝決又不逃罪特免之

北史

明

謝位 事父甚謹父病痿手足不能運動位負之出入飲食必親哺正德間流寇焚掠民居家人競奔避位獨守父不離寇不忍犯

李軫 父授之金軫經理之其積益倍及弟姪成立軫毫不私匿悉出與之均分同邑鄉民山寶不私父金亦如之

章實 性純良以幼子爲父所篤愛其父所蓄私財特以與實不令實兄知及父歿實悉出以分其兄

曹本 好義輕財從子幼孤本撫養如己子及成立爲謀婚娶分產同於己子

駱良 與兄同居事母至孝及析產其母謂其兄居長宜多與良卽遵母命讓產於兄已居其少毫無所競

趙選 父臥病值隣火延舍選時外出望烽焰起倉皇歸救之不及遂抱父屍死於火邑令韓志道憐之爲題其墓

清

任 瓊 性至孝父歿遺弟姊七人婚嫁皆瓊經理主持家政尺布斗粟不入私室又能教諸弟以禮諸弟亦事之甚恭邑人無不稱之

柳作棟 字樸子明副使柳本明五世孫父訥早沒棟視其弟廷至友愛崇禎辛巳城陷廷歿於賊棟索遺骸不得號泣欲俱死母曰有我在且汝不計宗祀乎乃瞿然止順治十五年充貢爲鎮平訓導

胡 樸 家貧幼而嗜學尤有篤行初崇禎間流寇陷城樸兄樞傷足不能行樸負之逃深谷中不避艱險朝夕經營以痊其疾順治中樸入邑校爲諸生與兄友愛以終

周 懽 延川知縣二子爲邑諸生父歿於官懽鬻產奔延川扶櫬歸值吳三桂之亂間關三晉及櫬至河無渡哭禱水濱關帝廟是夜水倏合遂乘堅而渡人以爲孝感後懽卒其妻蔡氏以忌辰設祭慟哭嘔血而亡人並稱之

胡 潤 邑諸生幼失怙母守節撫之艱辛倍至潤事母孝年四十猶依依孺慕母病卒哀毀喪明督學蔣公嘉其孝給冠帶未踰年以憂傷卒

熊秉心 邑諸生幼孤事母至孝應秋闈方客省垣聞母病即馳歸中途夜遇虎不顧虎爲之避人以爲至孝所感

管崇禮 邑諸生事父母以孝稱親年七十餘一切飲食起居皆親爲調護不假他人手嘗謂妻子非不可代勞但不如我自爲之此心乃覺安然也子濟泰舉乾隆辛丑進士戴 潤 字明倫張朱保人爲人篤至性質任自然父方在殯值鄰火起迫其舍潤倉皇哭入燔燄中伏棺哀號忽風反火得撲滅兄弟四人既析居潤猶兼任門戶兄緒獲壹志於學弟早歿存郵鰥孤倍至年五十二卒子殿傳殿傳字奎光爲諸生內行彌篤乾隆十八年母忽僮僕口噤藥弗入殿傳午夜泣禱願身代逾三日母忽甦曰有老嫗謂我梅苔香可以贖命遂以艾納灸之頓起縣令李源及兩學官並匾獎之

孔澤長 字毓東篤志問學於唐宋諸大家閫奧無不究覽雍正甲辰鄉闈中副車以親老侍養絕意仕進年六十餘二親猶無恙澤長溫清定省置榻父母臥側每夜必親理衾枕待其既寢而後就榻夜聞父母聲息即問父母安否每食必侍其親嘗謂人曰兒善事我予雖老絕不知人間有愁悶事也邑禮部侍郎以孝行荐未及徵而卒

左相 張朱寺保人少孤事母孝幼弟以牽訟被拘母憂甚相潛詣官邑令薛景珏廉

得其情釋之並獎以匾額後鄉里公舉善士邑令徐伉復匾旌之年八十餘卒

以上俱舊志訂

胡家成 字繼孔下灣里人父培業儒里居授徒六十年恪守程朱力行實踐教澤所染

比戶有禮讓風家成兄弟三人序居季幼承家學弱冠後就鄉塾課童蒙遭家不幸兩兄暨長嫂相繼歿家計困難奮然曰男子當自立安能依賴他人藉升斗館穀謀生活耶遂廢學率子姪躬耕年三十喪耦不肯再娶有以續弦告者則曰吾子姪多續娶非人子姪不得安居覆宗敗家相隨屬矣所見里巷家人之變如此者不一而足吾甚恐請勿復言時親老家貧連年喪當令人四口家成仰事俯畜內外兼顧菽水之養竭誠致敬整頓家政非非有條能令白髮老親變憂戚爲歡喜其父恒謂人曰吾晚景甚逆得以娛老而家聲不墜者徒以有此子也年五十委家事於其子而以課孫終其身子四人三子猷法孝友出於天性

胡猷法 幼失恃粗識字稍長即從諸兄耕作父齊家嚴子姪有過怒笞交加法獨能善事之勞嘗居前食則居後有時爲兄弟受過不以自明父察知其意益愛憐之往往盛

怒之下法至間以他語輒回贖作喜年十四從諸兄作土工赤日當空他人袒裼往來法獨著敝袍從其後汗下如雨長兄斥其不知寒暑亦不應長兄怒卸其袍褻衣綻裂不能蔽體兄色變棄箕馳歸法亦隨後還家比至門兄已以不任補綴重責其嫂急解之曰一家數口炊爨浣濯縫紉之事嫂氏一人任之我見嫂氏勞苦不敢重累非嫂氏之過也其父暮年手足痿痺心肝煩燥少不如意即肆怒罵他人罕敢見其面法負之出入湯藥必親奉飲食必親哺寢處必親安置如是者三年無倦容他人有憫其獨勞者泣曰我惟見我父之苦而不自知其勞也父歿兄弟析居法曰我人少田地敷我耕種足矣且田大一人不便耕作與我小者可也兄弟聞此語悉化爭心晚歲得子管束極嚴一日見其子與羣兒嫚罵儘力一杖擊仆於地鄉人或尤之應曰我見世間晚子最易養壞驕縱性成事可救耶我胡氏祖傳家教不能自我而廢稍長即爲之擇嚴師教之法終身力農而事親恭兄教子能爲儒士所不能爲異稟也

張天曉 性篤厚素未習詩書而事兄一節動與道合兄病飲食藥餌非親嘗不以進寢不解衣食不甘味者數月至病愈而後已晚年操持家政有條不紊同爨百餘人未嘗

聞詬諍聲卒年七十有五聞者無不太息

李煥然 字三峰性醇謹好學與弟燦然並篤友愛侍御曹登庸題其堂曰花粵長春家藏小石印篆刻莫作天下虧心事不使人間造孽錢傳爲家寶故八世同居內外無間燦然督修白雀園寨三禦匪寇兩捍水災人被其德者至今不忘

胡繼先 字紫霞恂謹老成而性尤孝友六世同居共食者百餘口繼先理家政內外雍睦邑令華臻以事過其家歸謂幕友曰吾承乏一邑遠不如界嶺胡紫霞之家政吾信宿其家見其長幼有序一門百口無囂雜聲與之言誠慤無僞飾語敦篤無機械心宜其長享厚福也

楊繼璋 字恒青幼失怙家極貧苦讀得入邑庠筆耕養母訓蒙極勤懇諸生父母德之爭具酒食表敬意恒辭謝卽不可却而飲食亦不快對盛饌轉憂戚夏日館東爲之設蚊帳力却之一友問其故不能答泫然出涕友故問之嘆曰吾幼孤吾母茹苦含辛把我撫養成人今我碌碌無能令老母終歲飢寒我罪人也何敢以告人若館東之盛意皆老母所終身不能責望於我者我何能享受耶友人爲之感泣諸館東聞之咸感動

館穀加豐因得備甘旨冬必溫被而後請母就寢寡嗜慾薄滋味凡酒色聲華之類淡然無所好

魏鑑三 字稚鶴歲貢道貌修偉生有至性幼失怙事母至孝母有不豫則長跪以請不命之起不起母病不能飲先嗽口接吻以進水母歿三年未嘗入內寢每逢母忌辰與已生辰不茹葷不飲酒必具奠而泣二叔鬻而瞽家落不能自存鑑三竭誠奉養代籌家計以終其身嘗謂諸子曰我離父早見叔猶見父也晚歲教授生徒專以立品敦行爲尙至講到孝弟處必再三發明其義卒年七十

劉 燮 字桐卿庠生性至孝父歿遺弟妹八人婚嫁皆由燮經理事母終身孺慕母素有痰疾不能茹葷燮終身不忍食酒肉兄弟同居五十餘年主持家政一錢不入私室晚年捐私產千金立崇實兩等學校於劉氏祠以培植族中子弟卒年七十七

李乃緯 字驥峯貢生有至性事父母先意承志務得歡心侍膳問安晨昏無間父沒數十年事事仍遵遺命其訓子孫曰我視先人舊物如見先人汝輩當終身誌之故持身接物莫不貽父母以令名至今族黨稱之民國十二年大總統題獎褒揚

人物志

忠烈傳

天地之大德曰生天降下民作之君作之師皆是爲人民謀生路斷不驅人民於死地而孔子又曰志士仁人無求生以害仁有殺身以成仁則又何說蓋人之所以貴於萬物者以其有人格非具有人形而即可謂之人也倘慢不加察則人之形體渾是一包膿血裹一大塊骨頭飽能食渴能飲能行淫欲能肆殺戮則亦能言之禽獸而已故志士仁人爲爭人格而死其浩氣自流行於天壤神波五濁惡世不能一日安居鼎鑊甘如飴非強爲之說也明夫此則知自明末以來吾光邑之烈士死於流寇死於擒匪死於共產黨者皆是爲天壤保存人格不甘爲夷狄禽獸以儉生其一種不可磨滅精神自足以作後人之生氣人生自古誰無死留取丹心照汗青作忠烈傳而取死職事者並著於編

夏之令 字紹武登萬曆丁未進士授攸縣令以廉直著調知歙縣有奸人周道明勾引廢闖沈繼先詐持部符乘傳假旨之令察其僞假往謁執送於獄卽申請奏聞正其罪以治最擢臺御史時毛文龍鎮皮島糜餉數十萬之令疏論邊事劾其以中國之脂膏飽海外之谿壑魏忠賢庇文龍矯旨削之令籍閣臣救免及巡皇城內使馮守忠犯法劾治之益爲忠賢所啣崔呈秀亦以事啣之遂屬御史卓邁劾之令黨北熊廷弼有詔削籍頃之御史倪文煥復劾之令計陷毛文龍幾誤疆事時之令已丁艱歸里就逮之

日拜辭祖墓焚衣冠方冬仲霹靂震於晴空抵都下詔獄忠賢嗾司刑者百方拷掠不支而卒莊烈帝即位諸忠烈子弟咸入都訟冤餘姚黃宗義爲之首之令子康與焉宗義出長錐歷錐殺其讐獄竟借諸忠烈子弟設祭獄門哭聲達禁中莊烈帝嘆曰忠義孤兒可念也贈之令太僕寺卿謚忠愍賜祭葬建祠祀之夏忠愍祠至今在城內北台張瑜治中德恭子萬曆己酉舉鄉試授襄垣知縣政尚愷悌不以擊斷爲能以老歸置義田贍族姓歲饑施粥施棺木以賑貧民崇禎乙亥流寇襲城不屈死

饒尙孝字仰賓萬曆末貢入太學授臨漳訓導日與諸生論爲學之要遷榆社知縣詢民疾苦興舉廢墜值檄建魏璫生祠尙孝不從掛冠歸里崇禎十四年流寇陷邑城被執不屈死

藍臺字輝少貌魁梧爲諸生有時名天啓元年充貢太學授文登縣丞不就崇禎初改臨漳訓導課士多所造就代縣督秋糧平料量却常例流寇擾山陝將入河北時以居民星散恐爲寇資議併合堡鎮兵備副使常道立以屬臺又令募丁壯編軍伍富民子願効行間者免其徭名曰親丁臺周歷堡砦得鄉壯萬人親丁三百餘日勤訓練旗

鼓營隊精整有法已聞寇渡河而南議罷營伍親丁徭役如故羣譟於縣庭屬臺治之三百人者各持一金爲壽臺不受懲其渠一二餘悉慰遣之事以息翰林何瑞徵薦入史局不赴提學呂一經謂人曰教官多矣如藍臺者未可以尋常量也巡撫范景文巡按劉令譽交章薦擢知中部縣時城堞廬舍悉被寇毀民戶逃遁賦無從問又兵餉絡繹符檄如雨臺籌供億理荒殘撫安招徠閱月而理盜首郭朗驍勇善戰臺單騎造其巢諭降之悉平境內諸賊砦邊邑鮮知學臺躬訓之十二年春大課合境諸生有王家桂曹可望者不爲人知拔冠多士時論譁然臺笑曰二生不中吾終身無復論文矣是秋家桂舉鄉試可望中副車羣服其知人攝醴泉縣再攝黃龍捕盜同知盜爲屏跡擢鞏昌府同知分駐甘州甘三面臨番重兵鎮戍餉給責之同知先是有經歲未給者臺按時支發嚴覈虧減軍伍悉悅署總兵趙某謀奪伏羌伯毛忠後人私宅誣以通番巡撫屬臺按之趙賂以百金置重典臺拒之力爲毛直其事或搆之曰若去家萬里脫不測誰庇而家臺曰殺人媚人吾死不爲此毛獲全趙亦不敢肆調攝涼州府旋攝肅州肅極邊番狗雜處臺威惠兼施邊防緝密北敵侵境躬率兵夜襲其營敗之金塔寺自

是無敢來窺適巡撫援京師歸臺赴謁肅人以爲去任也擁其輿不能前僉曰肅州久無好官如公者豈可遽去數百人走呈巡撫乞留卽許可爭舁之返肅十六年巡撫以秦州兵備薦旨未下十二月李自成遣其僞將賀錦犯甘臺卽返甘籌戰守請分兵守峽口調各堡戍兵營城外備戰兵來集而賊至圍城數匝有私請降者臺怒曰我生平力學正用之今日耳顧家人曰我惟一死報國汝曹可自爲計毋顧我二十七日內變作城陷臺方督火藥遇賊於鼓樓街被執擁見賊首諭之降臺大罵不屈與巡撫林日瑞總兵馬燠副將郭天吉參將萬曰吉同日死之年六十福王時贈臺太僕寺卿賜祭葬清順治初甘人請於巡按御史劉達爲立祠與日瑞燠等並祀十一年臺子復耀爲甘州守備燒荒至番地有番目數人迎謁甚恭邀入帳中云公儘使君子耶我等向被誣擄掠總兵欲加勦非使君力爭我等安得生存至今相感泣而厚禮之

孫自一

字澹如少孤貧事生母嫡母以孝聞崇禎庚辰進士授黃岡知縣邑故澆悍難

治自一政治恬靜取黠者懲之士民和輯獻賊之亂自一方解餉軍門及歸城已陷乃與邑諸生王之經結寨大崎山保殘民以圖恢復時亂離倥傯民之訟獄貢賦赴山中

無或後者會賊掠梅家湖自一率鄉勇五百人往救死之賊去民求其屍面如生印猶在佩因瘞葬湖岸時人稱爲忠烈

張丁乾 字元儀崇禎辛未進士授饒陽令以廉直稱值流氛猖獗丁乾合紳士守禦歷五載無虞辛巳寇襲城被執誘使降丁乾怒詈之寇憤加以刑劓並斷其右手卒不屈事聞優叙忠烈授應天學正加正六品俸歸卒

胡 植 高祖嵩蘇州通判曾祖紹良舒城訓導祖錠壺關知縣父自清邑諸生植舉崇禎六年鄉試流賊擾河南連破諸郡光山城陷植被執大罵不屈死初賊謀主牛金星舉人也每勸賊重用舉人故賊所至獲舉人多不殺而授以官然中州舉人遇賊多執節以抗不辱僞命以此被害在光州所屬同時盡節者則植同年舉人光州王者瑄崇禎三年舉人商城余容善並罵賊受禍著於明史學

胡 覲 字北廷光山塔山河人少嗜學舉茂才好行陰德不欲人知遇歲凶出錢穀賑貧乏多所全活俗方盛僮僕美田宅覲獨敦古尚樸訓其家以恂謹之行子虞胄登賢書不爲色喜獨舉馬援戒子弟書示之晚歲以耆德屢延爲鄉飲賓崇禎十四年獻賊

攻城觀分守南門多方捍禦丁壯擒殺甚衆賊深憾之乘夜襲入北門大索被執罵賊不絕口被害年七十三

張拱極 太學生工詩文性剛方人敬憚之崇禎辛巳流寇陷城被執叱之跪不屈北面瞑目坐賊怒截其手足罵不絕口支解之

熊 緯 字子文崇禎己卯舉鄉試第一癸未登進士廷對後乞假侍養尋避閩中授兵科給事中疏陳時事慷慨敢言汀洲破緯遇於途呼曰我兵科給事中也義不可生遂死之 以上俱舊志

胡禮箴 進士任湖南芷江縣知縣白蓮教倡亂禮箴勦滅之調麻陽縣該縣舊有私立鹽卡禮箴到任立稟明上憲除之尋以功升郴州直隸州值洪楊之變城破死之事聞議給雲騎尉世職准入昭忠祠著有嵩南詩集行於世

何鎮之 進士任福建建寧縣知縣洪楊之變城破死之次子守純及幕友陸錫齡曹福壽同遇害事聞均議襲雲騎尉

金秀三 以拔貢任直隸沙河縣知縣捻匪破城死之事聞議給雲騎尉世職

吳山 字巖青道光丙午舉於鄉咸豐初海內有洪楊之變淮北捻匪乘機蠢動邑皂役郭玉林即郭三及其弟郭五郭六陰懷叛逆與正息穎毫捻匪勾結借保城署爲名聚養流亡要挾邑令加徵小糧時邑令貪鄙昏庸任其所爲不加禁止歲徵錢三萬餘串名曰郭氏小糧適山自京師歸奉大吏命倡辦團練爲郭三所忌咸豐四年四月二十八日突率爪牙圍攻向家店山倉猝率勇抵抗以衆寡不敵遂遇害郭三益猖獗無忌憚一日赴馬家畝徵糧黨羽稍散易吳諸大戶聯絡數千人齊聚攻之擒郭三於曹家染坊梟首示衆郭五聞郭三就戮急招外寇李士林來攻縣城身爲內應其謀頗洩邑令城紳齊緝郭五兄弟杖殺之並誅其家小黨羽數十人比李賊臨城聞郭氏伏誅夜遁城以獲全御史劉毓楠以事聞賜建專祠卹銀百兩世襲雲騎尉子之幹光緒己丑舉人邳縣訓導

羅千煥 號安亭自咸豐五年息匪破光山縣城圍邑震恐圖謀自衛聚壯丁辦團練推地方英傑爲練總志士不忘在溝壑勇士不忘喪其元咸同之變光邑所以猶未如今日之遭大劫者皆此時諸烈士捐軀保種之力也千煥時任磚橋練總國家承平二百

載地無城郭民不知兵千煥沈練有謀汎愛容衆凡地方豪健不羈之士下至於厮隸之賤悉能得其歡心擒匪來去無常事前能得消息匪至常截繫於距磚橋數十里之外以故磚橋附近數年無蹂躪之苦十一年毫擒入境千煥率鄉勇迎戰於寨河里賊勢浩大鄉勇奔潰千煥率練首曹世朝及親丁數十人死戰不得脫並沒於陣賊去收其屍面目如生一鄉聞知若失千城羣哭奠於其家事聞勅賜雲騎尉世職舉人文鶴齡爲傳刊諸石

魏元宰 少負膽氣精拳棒咸豐十年匪至磚橋集元宰率衆防禦被執匪受其勇脅之去至白雀園出匪不意奪刀殺匪十數人匪圍擊之遂遇害並剖其腹抽其腸以洩餘恨聞者傷之

戴翰書 廩貢生擒匪破縣城翰書率鄉勇保城戰沒

徐延陸 庠生成豐十一年率鄉勇禦匪戰沒

李鍾琦 咸豐十一年率練勇禦匪戰沒

陳宗虞 字燦然咸豐十一年與其侄炳忠糾衆擊大股賊匪陣亡

李秀三 暨弟秀英並精武術咸豐十一年匪首籃矮子引千餘人至何家畝秀三帶鄉勇三百人又有武術精強之好友十八人藝高膽壯欺匪是揭竿之衆迎頭擊賊匪首據高阜指揮黨羽四面包圍惠衝則東指西衝則西指自辰至未秀三等始殺開一條路帶勇出險傷亡過半點驗十八人中惟少秀英登高遙望仍在圍中力戰秀三舞刀拍馬復殺入賊陣時秀英已筋疲力盡賊用大旗一面遮裏而刺殺之秀三心驚失措同遭慘禍然賊亦死傷極衆爲李氏兄弟破膽

胡德泮 咸豐十一年捻匪殺其父德泮奮與賊戰而死

戴澤泮 咸豐十一年捻匪驟至適父病守之不去遇害

冷協和 武生王夢齡監生均以糾衆禦匪陣亡

楊載翰 字星屏貢生陸和雍庠生黃廷煥庠生曾陰伯貢生宋從堂監生黃承憲監生

邱正直均於咸豐十一年遇捻匪被執罵賊遇害

以上散髮安騎尉

管善訓 號詒堂禦捻匪戰沒勅入昭忠祠

任儀品 咸豐十一年率鄉勇禦匪戰沒事聞卹入昭忠祠

易敬勝 字吉甫由行伍隨營屢立戰功保舉副將同治初陣亡事聞照例從優議卹入祀昭忠祠恩賞雲騎尉世職

梅傳瑞 精國術有勇略同治初匪過高陌店傳瑞率鄉勇追剿匪反扑鄉勇潰傳瑞獨與匪戰被傷三日而沒鄉人哀之塑像以祀

李芳 號善夫張朱寺保人同治元年與其子青春榮春聚勇圍練賊大至勇潰芳被擒罵賊而死同志方德進方德舉方德珠方德揚方結紹典姚國俊馮正揚并遇害同治四年十一月初十日邑令章安乾手諭悃卹

蔣宗述 黃曾憲孫鐵舖寨主而兼充練總者也咸同間穎毫正息之匪日熾光山北境與匪僅隔淮流數年之間倚北鄉練總八里岔鄭綱堂爲長城與八里岔相犄角者則爲孫鐵舖孫鐵舖依竹竿河爲險下抵淮河與綱堂之防線相接故北賊數年不敢輕入同治五年息縣白土橋反逆戕殺縣令卽思南渡入光蔣宗述黃曾憲俱知率鄉勇沿岸晝夜防堵賊月餘不得渡後淮水淺濶賊乘夜南揭涉鄉圍聞賊猝與交鋒悍賊登岸殊死戰勇少怯賊乘勝入各鄉肆殺掠蔣黃飛調各練首糾衆赴難與賊混戰一

日夜黃蔣俱戰沒鄉勇死千餘人練首百餘死者過半老弱死傷無算咸同之際光邑受害未有甚於此一役者也然殺賊亦過當賊旋竄還息境事聞蔣黃及死事之練首均入昭忠祠計死事練首共七十一人備列於後

吳炳南	余煥章	程慶元	張廷樹	張廷杰	黃映岡	黃映瑤	胡興珠
余崇忠	余學海	余廷鎮	王鳳池	王鳳舞	陳家齊	陳坤	陳林
陳亮	蔣大年	蔣宗唐	蔣宗恩	蔣宗志	蔣大彥	蔣大忠	蔣大勛
蔣大坤	蔣宗直	蔣宗鼎	蔣家修	蔣家雍	李春榮	李玉和	李玉山
李法	李方	李珠	李廷法	李正有	李光顯	蔡家和	蔡家振
蔡家興	易在金	易士升	易玉田	易文象	易文明	易敬考	陳永遂
陳永茂	周自清	周自貞	周自相	龔鳳治	龔鳳台	胡文忠	胡文堂
胡炳華	黃天相	楊家瑤	鄧起富	胡駟	汪槐	張萬春	聶天才
裴日言	蔡馬	陳作珍	張萬銀	裴三畏	黃文燦	萬富	

易樹基 字梧生由陸軍畢業充廣東陸軍第一師步兵一旅一團二營五連連長在香港

山縣大車村擊匪陣亡經廣東督軍賜卹在案

阮玉田 仙居里藍家河人性質剛方豪俠好義至老不倦爲地方所信仰民國十九年秋赤匪漸猖獗玉田召集鄉人力圖自衛謀修花石砦時新集尙未破赤匪乘花石砦礮堡未固守備未完竭全力一鼓破之虜玉田是時赤匪在光山勢尙未盛猶欲鼓其邪說煽惑愚民入黨以玉田素有重望遽殺之恐惹動愚民反抗欲借其聞望收召鄉愚讓他說共產黨有害人民殺幾箇以謝地方自誇軍紀赤匪部衆視同鷄犬以殺人爲作川欺人惑世玉田將其罪惡根本揪出聽者栗栗危懼大有解體之勢故匪首立害之然自是之後光邑人民之入黨者稀矣

李悅來 字權東淨居里人十三年河南農業專門學校畢業曾任羅山苗圃林業各局局長十六年任光山建設局局長兼任縣黨部城防局縣長張簡生倚之如左右手十九年廢曆八月十三日共匪攻城悅來主守無何城陷匪囚之十九日遇害臨決時道中且行且談視死如歸

馮國傑 字香墀城內人性篤實求學甚勤民國九年畢業潢川中學校十一年畢業信

陽第三師範預科歷充本縣高小校教員校長十八年充縣黨部委員十九年八月共匪陷城被執匪器其才將倚重之國傑不屈二十四日遇害

胡昭文 字灼華西南老虎山人國立北京法科大校畢業十四年任本縣教育局局長十六年任縣黨部常委十九年任潢光固息商五縣清鄉委員八月十三日共匪陷城被執匪百計誘之叱曰男兒死則死耳決不爲匪不屈遇害時神色不變

戴智生 鄔寶峯 俱青山里墨斗關保人民國十七年共匪發生青山之潘股冲保距縣百數十里極西南與湖北錯壤萬山崇雜爲共匪巢穴北與墨斗關毗連禍在眉睫智生寶峯糾合鄉勇各立砦堡辦民團白衛山砦林立縱橫數十里互爲聲援智生守黃家小砦寶峯守鄔家砦常乘隙領壯士深入潘股冲保搗共匪勢力歷數年之久不能向墨斗關保發展二十年正月初五日大股赤匪自新集西擾過砦輒圍攻期打必破匪勢極猖獗智生寶峯密與山砦約各出壯士擊匪數十砦一齊發動奮勇殺賊斃匪七八百人匪勢不支夜遁智生寶峯以帶勇衝鋒皆沒於陣然共匪自經一此敗深知山砦連絡之可畏以後數年不敢徑入墨斗關保

冷繼功 字庚堦性木強於世俗少有所許可獨立不懼親戚故舊致身通顯者即斷絕音書少師事李漢光民國初元李宰浙川強邀之任浙川第一科科長倚之如左右手白狼圍浙川佐李守城晝夜巡邏數日不倦圍解卒以與公著人員不合辭李歸家耕讀自安絕口不談世事民國十四年胡景翼入豫河南黨務公開組織當此容共時期國共不分中國共產黨豫陝區執委會派遣黨徒赴各縣秘密動運十五年北伐軍入豫光羅商固之青年紛紛赴武昌入中興軍事政治學校農民運動講習所教官爲鮑羅廷毛澤東鄧演達等學生受其薰染各回故鄉勸黨繼功喟然曰光山劫運從此到矣十六年武漢清黨湖北跨黨分子不能立足潛入光山南境光山黨徒陰與之合醞釀甚久十九年八月而光山城陷十二月而新集破二十年春夏之間光山東南寨堡十九不能守死亡以萬億計時駐防軍隊不肯勦匪百姓問之則曰都是僭們的人打甚麼而光邑亦有政客旋里說共產黨一種學說共產黨是黨以當然不能殺故共匪益猖獗匪徒孤身來往民間明知其爲匪亦無人敢與爲難繼功聞之大憤作養共害民論以開之時繼功避匪寄居城西五里之藍家塆九月初八夜赤匪帶數十人將其

父子捕去次日匪首將其父子亂刀砌死繼功父子至死罵不絕口

邱華岳 下灣里邱家店人性孝友和易容衆家小康十七年赤匪禍作力足以攜家遠徙邱家店既有寨基本可以保衛鄉里一去則寨中無主合族何所仰賴遂率鄉人修寨添造土炮鋼鎗十九年八月十三日縣城失守次日紅軍數千人自北而南圍攻邱家店一日夜匪見守禦甚堅解圍去及新集破華岳謂其兄曰事急矣邱家店存亡未可知父母老矣不可以與此難兄奉父母遠避潢川可也大亂之世不能兼顧奉養之事兄任之守寨之事我任之兄曰子未可以去乎對曰我一去則寨散矣寨一散全寨之人逃無所歸皆爲餓殍矣刻下人心甚固不如死中求生兄可速去我誓與此寨共存亡遂送父母與兄出寨灑淚而別自與闔寨壯士同甘苦修城備垣器械費不足曰於我取糧不足曰由我發壯士歡欣鼓舞咸樂爲效力當新集初破而扶山霧山團山龍蟠龔家各寨星羅棋布猶足爲聲援二十年春赤匪連破數寨彼此不能援助三月二十八日共匪圍邱家店驅擄來各寨之壯丁爲先鋒蟻附爬城華岳親與邱世綿督壯士守禦晝夜搏戰擊斃匪徒三百餘名寨民亦死傷數十四月初二日復添大股

紅軍用大炮轟擊炮台燬折天又大雨土炮更不適用黃昏城陷邱世綿陣亡華岳負
重傷被匪擄去尋遇害

邱輝煦字烈武號仁懷沙城里人少壯時跡弛不羈滿清之季人民好尚猶在科舉範圍
之內傳經士子有轉移世俗之力故秀才之一舉一動幾成神聖不可侵犯輝煦少亦
習舉子業弱冠後鄙棄之閭里游俠鬥雞走狗之少年皆招致門下發縱指示雄長一
方家素封對於下戶窮民有求必應對於衣冠氏族則狎侮之往往倒行逆施不顧蓋
自以爲不侮鰥寡不畏強禦柔不茹而剛不吐也故其爲人非鄉人皆好亦非鄉人皆
惡有三子強毅多智皆兢爭時代之利器遠近數十里自無人敢與之比權量力民國
十八年夏赤匪猖獗如洪水汎濫輝煦號召遠近力謀遏抑大義以勸之利害以動之
涕泣而道之毀家製械以爲之倡明哲之士莫不響應一輩守財虜執迷不悟則以強
硬手段壓迫之曾不半年遠近感動而龍蟠寨霧山寨扶山寨團山寨吳家尖山邱家
店陽家土店等處次第成立星羅棋布頗堪倚爲唇齒不料十九年十二月二十三日
新集被大股紅軍攻陷二十年自春及夏新集以北之山寨相繼淪沒各寨精壯器械

喪失十之七八輝煦遂退入大山寨與寨主邱及三胡領山吳錦白等合力拒守命長子燧生帶槍數十支助守邱家新寨以爲犄角八月初四日赤匪乘大山寨新陳不接出匪萬餘圍困大山寨輝煦次子峻猷率壯士開門擊匪沒於陣九月十二日大山寨糧絕內潰赤匪聞變一擁而入寨主邱及三吳錦白民團隊長黃子香吳月恒等俱遭慘禍蹂躪死者無算輝煦與三孫同時被擄匪誘之以說其長子燧生散寨不從遇害晏慎剛字近仁曾在十二軍充連長歸耕田里十九年赤匪猖獗易本應約其共辦民團二十一年冬經扶縣成立任經扶縣隊長復編爲保安隊中隊長驍果敢戰視赤匪如仇數年之間出入險阻轉戰山谷與赤匪爭生死之命而隨從常不過數十人未嘗大受損失經扶初立而接防經扶之二十五路軍主撫愛撫殘匪甚至以爲此皆迫脅良民情有可憫而經光之民團保安隊與共匪本結深仇積怨一經深人不免恣意殺戮遂不爲二十五路所喜滇剛好殺尤甚日受束縛抑鬱不得志二十二年冬經扶徐縣長勸往江西入軍官學校鍊習甫到南昌投到未及上課卽告病旋里曰我只能爲桑梓効力無逐鹿之遠志也適當舊曆年終遂家居度歲二十三年舊曆正月初六日

夜半晏家河忽到赤匪千餘慎剛家距晏家河二里匪開去手槍隊七八十人圍其住宅慎剛臥尙未起匪已自後門入室遂被擒不屈遇害臨死神色不變觀者壯之

曾憲鑄 字仲顏世居新集爲光山首富民國十八年赤匪亂作該寨富紳集議趕造槍械以謀自衛仲顏平日頗得人推爲寨主至是乃散財發粟以勵壯土匪衆則固守匪少則與之戰新集原係潢光通宋埠大道往來擔販有爲赤匪作奸細者仲顏塞其路斷絕交通匪以不便往來一年之間竭力攻新集十餘次皆不得逞後以吉軍任團在商城失利匪得大炮於廢曆十九年臘月二十二日用大炮轟擊城陷仲顏吞金投水死

彭 端 字頌臣清戶部主事家素豐民國十八年赤匪勢漸盛自知決不能容於共產黨乃召集其個人集議約同守大福寨許以三七收租個人感激願効死力端常鼓勵壯士深入匪區人心大悅二十二年春赤匪攻大福寨壯士下山迎戰甫開火寨內草棚發火戰士見火起反顧赤匪猛進寨遂破端自殺

人物志

武績傳

自古邦治以文戡亂以武故爪牙干城之士爲國家禍侮所必需宋明以來右文輕武雖有名將湮沒不彰舊志雖有武略一門功業不甚顯著然光山層峯疊石激湍迅流山川盤鬱鍾爲棟架之氣趕趕矯矯乘時宣力著功名於竹帛者要自可貴况內亂外患相逼而來正當表揚武功以作士氣而百年來武臣濟濟迭經大亂事略多散軼不傳不無遺恨焉聊記其所知闕其所不知以待來者

蔡亨中 明萬歷三十年以儒學生員納級爲信陽衛鎮撫值瓦店汝陰巨寇肆掠亨中領卒進討連敗之奏荐叙功卒於家

蔡 瓌 立身剛直居家以孝友著稱積軍功歷任密雲副將沈練有謀總制甚重之勤於訓練退則詩酒自娛有羽扇綸巾風惜有志未竟以茂齡沒

何鳳鳴 清順治間以武勇投充軍伍累積戰功歷陞副將援剿雲南充中路總兵官仍管協鎮事

文義祥 由軍伍積功爲湖廣均房副將康熙初逆寇猖狂楚蜀震動特加義祥征川右路總兵官率兵進剿郢爲楚蜀咽喉重山複嶂崖徑險崎義祥沉勇有方畧每戰身先

士卒力破寇黨開郎陽進襲而西有琵琶山四壁陡峭莫可攀登賊恃以爲險義祥設畫進擊攻其山下之遂復全蜀

易騰霄 字曉峯嘉慶辛酉武舉辛未成進士欽點御前侍衛任直隸龍固營都司升淮安漕標右營遊擊江南海州參將調補江蘇參將署理太湖協鎮

陶金龍 咸同間以武勇投軍從征回部累積戰功授伊犁將軍頭品頂帶提督軍門鏗色巴圖魯以事放歸光緒初起用以功封男爵卒於軍其後裔隸籍甘肅

陳世林 字松山同治丁丑進士欽點御前侍衛授廣西桂林營遊擊調署廣西百色中衛遊擊升廣西濱州參將調署廣西龍州大廳參將護理廣西提督軍門會辦邊防軍務改署廣西平樂副將授蒼梧副將歷保提督銜記名簡放總兵賞給尙勇巴圖魯弟侍讀亦以侍衛官至潮州參將

易元泰 字橋衡由軍功保舉候補道賞給頭品頂帶奮勇巴圖魯換哈希吧巴圖魯督辦廣西平樂府水師統領鎮柳防黔各軍兼統梧州三江緝捕水師撫轅水陸營務處喪其勳 字堯田光緒十一年入天津武備學堂先後肄業六年回營見習充教習督操

等職積功叙外委二十年中日戰爭隨軍東征與戰數十次和局媾成叙千總二十一年經出使日本大臣奏調出洋充當使館武備隨員其勳乘此機會欲考察軍政新法自請入日本陸軍士官學校三年回國以其遊學考查所得著留日考察軍政報告書二十四章獻之裕庚裕庚據以轉奏朝旨嘉採之優叙守備加遊擊銜時直隸提督礮辦開平武備學堂延其勳任監督慘淡經營規模一新二十七年袁世凱官魯撫憤國積弱銳意練兵奏設督操營務處任馮國璋爲總辦其勳充提調新軍法制多出其手創嗣任先鋒隊幫帶礮隊管帶各職積功叙都司三十一年贛撫胡廷幹奏調訓練新軍歷任督練處參議常備軍管帶統帶等職三十二年江北提督蔭昌奏調統江北巡防各營江淮水荒海州一帶匪徒四起其勳剿撫兼施匪氛以靖叙陸將三十三年應調赴奉會吉林延吉間島界務交涉告急清廷簡陸軍副督吳祿貞持節督辦邊務以其勳統領軍陸從而佐之適日軍強過圖們江謀佔間島其勳同吳祿貞直前抗阻據公法條約力爭之日本遂爾中止延吉琿春地處極邊界連韓俄中外倚壑雜處匪黨出沒無常行旅畏途地棄不治強鄰乘虛侵掠幾至喪盡主權其勳首先肅清伏莽次

第振興庶政渾屬黑頂子一帶與俄接壤犬牙相錯俄人潛移界碑侵佔領地其勳躬勘山川形勢徵以地理歷史恢復國疆綿亘二百餘里俄人不復侵越宣統二年延吉邊務解決締結中日界約領土主權均經保全吳祿貞論功行賞以其勳報最嗣邊務裁撤以其勳留守三年赴閩陸見欽加陸軍協都統銜簡升協統移鎮吉林省垣是秋武漢起義吉林漢滿雜處險象環生其勳力排黨爭保衛秩叙共和成立兵不血刃地方鞏固輿論翕然民國元年俄國侵掠外蒙嗾使庫倫倡言背叛內蒙古哲里木十旗相繼附和東省毗連蒙疆有屢齒關係東督趙爾巽檄其勳督師征之奉檄急師出郭爾羅斯前旂以保護爲佔領遂得哲里木十旗盟主駐在所蟠爲戰鬪根據地長驅直進軍行江省大賚廳偵知俄國兵艦駛往蒙邊分隊飛追至柴火堆地方截獲之返大賚會地方官驗明艦藏山礮八尊步槍千餘支質問俄艦艦長接濟叛蒙無可遁飾乃依公法處理之由是叛蒙斷絕軍火國軍所向勢若摧枯如札旗鐵旗麻子濠那罕明後舍利陶什堡等蒙塞次第克復其勳首先建言停戰召集十旗王公會議宣布共和真義政府嘉納之特命張錫鑾持節宣撫東蒙節臨長春召會與議歷睹其勳條陳蒙

事灼見真諦悉發人所未發甚異之蒙事底定錫鑾調督東三省復稽其勳出征軍書僅三閱月而竟全功益奇其才專章表其征蒙之功敘陸軍少將二等文虎章二年調升成旅長遷駐長春四年張錫鑾以其勳連年消除匪亂安靖地方特章保薦簡爲吉長鎮守使仍兼第一混成旅旅長七年俄國革命軍起全俄塗炭擾及中東路線幾無安寧地民不堪命政府爰定戡平俄黨之擾及路線者藉謀收回中東路權檄其勳總司指揮不及兩月功成授陸軍中將八年吉督孟恩遠奉命內調部下戚黨高氏儂高峻峰輩糾合同黨敵血誓盟以武力抗命獨患其勳立異先布流言以構陷之未幾果焚惑上聽高峻峰銜命促其勳晉省其勳稔知事之不利於己計不往則無以破當局之迷惑而糜爛吉局乃屏侍衛子身挾妻子慷慨赴命知交力阻或勸之他勿顧也抵省謁孟恩遠痛陳抗命之害請急受代持久則地方糜爛不可收拾矣俄而高士儂至難之曰同人一致抗命以報孟公知遇君亦其步將之一也何獨持異議得毋懷二志乎其勳昂首應之曰刀鋸斧鉞之前拚萬死不肯犧牲一省生靈陷孟公於不義此我以報知遇也孤子一身妻子隨在微論有無他志試問尙有後顧餘地乎總之節操在

我生殺由人加害吾成其仁不加害吾成其志利害籌之已熟君何勞勞多言也時班行悚息慄慄爲之危而其動侃侃自若士儻迫於義不容犯氣焰爲之一挫自是幽居省垣者多日恩遠久而悔悟禮待如平時因說恩遠詣長春招邀吉任新督鮑貴卿蒞任曾商交接從之吉事以解鮑貴卿履新首檄其勳兼領高士儻所遺師長綜理善後其勳固辭兼職並請遣散此師節經常以蘇民困允任善後就理退職歸田閱兩月歲事政府特賞寶光嘉禾章九年以上書辭職政府以其爲國家宿將居邊宣力有年允許解除兵符任爲將軍府將軍以終子三毓華毓藻毓榮

韓建鐸 字幼泉武備學校畢業復留學東洋充保定將弁學校教鍊官後在北洋勦匪有功保奏參將派充陸軍二科科長辛亥革命充雲南第一師師長兼援川總司令民國成立授陸軍中將五年充貴州督署參謀長後沒於京師

方日中 字寅賓年十九舉於鄉清光緒二十八年也三十年入北洋陸軍速成學堂世俗以其爲孝廉也而笑之日中曰有文事者必有武備仲尼之教也清之役冉有用牙自謂即學於孔子古之學者不廢干戈趙宋以來讀書人多恥談兵事所以積弱至此

今處競爭時代中國將有亡國滅種之禍余尙能爲藐爾之舉人所束縛而不求有用之實學乎三十一年送赴日本留學先後入振武聯隊陸軍士官各學校宣統二年四月由士官畢業歸國九月赴陸軍部大考取列優等授副軍校砲兵科舉人十月派充禁衛軍砲隊第三營中隊隊官三年五月調充陸軍大學助教十一月革命軍興任滬軍北伐先鋒隊副司令官

民國元年八月先鋒隊解散仍回助教舊職二年七月授陸軍砲兵中校三年正月任第一師一等參謀官二月赴豫南剿匪四年五月因商城勦匪案內得二等獎章十一月調充代理彭武上將軍行營上校參謀十二月補第二師參謀長五年六月於勦匪案內得四等文虎章六年十二月調充騎二團團長七年二月補砲兵上校兼學兵營教育長八月調充湖北督軍署參謀長八年十月兼充義券局會辦十年正月得三等文虎章五月得四等嘉禾章八月辭參謀長職十二月充長江上游總司令部參議十一年一月補少將十二年九月補中將十三年充農林傳習所學監十月補陸軍大學兵學教官十二月補執政府軍務廳參議十四年一月補著參謀本部第一局第三科

科長二月辭職十五年三月充京師城郊官產清理處秘書八月充金陵軍官學校教
育長十七年六月充北方國民革命軍前敵總指揮部參議八月充國民革命軍第一
集團軍第三軍團總指揮部參議旋充陸軍大學教官二十年十月辭教官職二十一
年四月十七日病沒於北平日中雖置身軍界隨潮流革命究竟書生面目數十年未
改故頭角未能大顯嘗曰中國腐敗不能容於競爭之世力謀改革是我輩應盡義務
若假革命之名爲爭權利之實我不能也故每對一次內爭則大憂戚不肯出一言爲
左右袒居官廉潔謹慎不染一毫宦氣在湖北布衣徒行出入督軍署人不知其爲參
謀長也或有以儉陋譏之者曰韋應物詩云邑有流亡愧俸錢我輩革命十數年民生
困苦日甚一日我輩曾不內愧尙敢鮮衣美食以自豪耶終身不爭競長年素食恒掃
室焚香如僧道然

陳永祿 字雲山吳家寨人前清光緒間由軍功歷擢任荊紫關將多倫諾爾協台代理
宣化鎮總兵北洋馬政大臣入民國後補授陸軍少將追贈陸軍上將奉總統明令生
平事蹟宣付國史館並給治喪費叁仟元

人物志

隱逸傳

孔子論逸長稱其不降不辱中倫中慮中清中權吾讀書至此而嘆世無孔子則隱逸即天地之精靈也秦漢以來上絕鴻文下無伊呂茫茫宇宙變作一功名富貴樊籠隱逸高飛如鳳凰翔於千仞下視鷄鶩之爭食燕雀之處巢真霄壤不侔矣嗚呼不有上下古今之識烏能知隱逸之爲貴哉

蔣 翊 字元卿其先封於蔣以國爲氏居其故封之西歙縣漢帝哀時謂爲兗州刺史以廉直著名王莽居攝以病免官歸里臥不出戶舍前開三徑惟故人裴仲羊仲從之游

耿山客 初名爾毅字晚耘少時即善詩文聲名藉甚嘗遊吳楚人咸欲禮其面明崇禎間河以南俱罹兵燹官署暨試士場俱移而之北十六年名流咸集蘇門爾毅至莫不慕其名一時有不願獲身願得與爾毅遊者由是唱和成帙人謂顧廣俊及之產悉萃於蘇門一集焉聞亡爾毅年未三十棄諸生業嘯傲山水間易名山客別字柏麓益工詩古文辭兼涉韻學理趣凡宗門稱擅場者見之皆避舍不敢置喙山客既該博又負夙悟故無不精人凡遊豫州及官汝南者迫而致之悉避去惟清順治十六年巡撫賈漢復修河南通志以禮聘請屈身一應聘旋以不能行其是非褒貶之志辭歸年六十餘卒著述甚多以貧不能問世人爲惜之

晏學誠 幼習舉業見明季衰亂不求聞達安愚守拙避世無悶滿清定鼎喪亂之後戶口蕭條士子尤少滿清爲收拾人心計開科取士歲設網羅曾習舉業者盡入彀中學誠獨耕讀自安不肯應試或詰之笑而不言故問學誠曰余德薄能鮮身經鼎革之變獲全生命於顛已足尙敢望富貴乎且吾上觀載籍近證之以目見耳聞世祿之家古今有幾自三代王侯世及外上自公卿大夫下至於一命之士或傳之五世或傳之三世或一再傳而子孫滅絕能綿延百年不敗者蓋希也文縷膏粱最易流於邪僻惟田家作苦可以傳

家以我之才能縱竊科名不堪問世外之不能爲蒼生造福內之不能教育子孫吾熟計焉故不肯以彼易此也况勞神苦思而求之而猶未必即得乎用是自信不疑雖從事詩書而躬耕隴畝三農之暇以寬厚和睦導鄉里以孝弟忠信教子孫富貴功名絕口不道人或笑其迂拙充耳若不聞嘗作伊尹伯夷論以見志或問伊尹相湯放桀伯夷餓於首陽孟子均稱之爲聖人何也晏子曰聖人者爲天地立心爲生民立命而富貴功名不與焉者也伊尹伯夷俱在富貴功名之外惟伯夷能爲伊尹惟伊尹能爲伯夷故曰得百里之地而君之皆能以朝諸侯有天下行一不義殺一不辜而得天下皆不爲也天地日開給求養欲之事日益蕃斯人耳目口體之嗜好日益甚於是乎在上之殘賊窮奢極侈驕淫縱恣殘害萬姓不足以動其心於是乎在下之奸雄乘機逞毒奔衝潰決汎濫九州益足以滋其亂若太康后羿寒浞之事可爲明鑒者也桀紂之暴縱無湯武豈少放伐之人惟去一桀紂而以暴易暴則不知幾人稱帝幾人稱王歷代草澤之英雄如陳涉吳廣李密竇建德之流下至於黃巢朱溫張士誠陳友諒李自成張獻忠之輩非藉口於陰殘去暴何能起事其卒則以暴易暴之禍爲何如耶然後知湯武之功不在放伐而在於安民伯夷伊尹之爲聖人不在於朝諸侯有天下而在於不行不義不殺不辜達則愛壽天下窮則獨善其身應清則清若受天命而爲之曾無絲毫勉強當伊尹之耕莘也視湯之弊聘若敝屣然其立身涉世一介不取一介不與與伯夷之清何異及湯三使往聘之而始以堯舜君民自任恐湯不放桀而乘機之亂賊接踵起也當伯夷之就養西伯也何嘗無救天下之心及見武王伐紂大事已成而從諸侯半爲功名富貴不有人焉出於富貴功名之外獨立千古以正萬世之心天下後世何堪設想也是則伊尹之任在一時伯夷之任在萬世非聖人而能若是乎故以太公之鷹揚不敢不服其義而八百會盟之侯服對之當自慚形穢矣嗟夫世變日非利祿之中於人心日甚惟首陽高義薇蕨生輝天豈獨伯夷爲然如西漢之四皓東漢之嚴光周黨及歷代之逸民皆其流亞也

胡成麟 字瑞徵少聰穎年十八入邑庠然性不喜時文嘗謂諸書自有當學行者不於括帖詞章之外求之皆無用之學也明季逆閹擅權朝政濁亂遂決棄舉子業絕意仕進時兄弟子侄列庠序者十餘人競以文學相切劘成麟獨潛心經世之學問難備僕中操耕

作有勳以應舉者輒不答故素封有子五人課讀之暇恒教之習勞耐苦凡米鹽樵汲諸零雜必使身親之粗米衣糲食與野人伍一日召諸子曰爾知吾平日勞苦你等之意乎我非鄙吝者時事如此大難方興將來苦况殆難思擬恐你等猝臨禍亂逸豫憤而速其死也你等粗可自立其各率婦孺分處深山莊舍中掃蕪執紼習氣半耕半讀以防亂作自來富室貴族遺世變得禍必較村農尤慘我家席豐履厚既經數世祖宗積累雖深享受蓋已過矣你等生逢浩劫宜切究之毋違吾教適歲凶其從叔親倡議壽賑成麟留田產僅數諸子耕種儘家相助崇禎丙子其從弟虞肯登賢書告之曰子才可集事宜自爰求其遠者大者世變已極毋輕進以罹世網易曰天地閉賢人隱正此時也明俗士族與齊民不等成麟獨令諸子析居雜處於佃奴之間彼此相距恒數十里成麟亦往來無常處與善遊斷絕故羅鼎革之際遭流寇蹂躪者十室而九而成麟家獨無恙滿清定鼎海內嗚嗚望治懷一才一藝者皆思有以自見成麟益韜晦臥居斗室足跡不出戶庭即姻族亦不常見面惟以學進者則隨材誘掖懇摯無倦容雖言語溫溫而嚴氣正性足以振惰而遏邪士多因之立志者康熙十一年卒享年八十有九

成

貞 少負奇氣弱冠父母俱亡妻亦相繼沒不復娶道光十六年出外遊學親族鄰友二十年不知其音信咸豐七年道裝歸里隱

處天台山脚下自食其力久之而親故始有識之者尋問其歷年在外之緣由不答除謀衣食之外輒閉門讀書啓戶并書亦藏之不使人見與人交接絕口不談世事有一士人好遊山常過其家偶搜得詩稿四章竊之以歸其一云清風明月講堂附往學前賢次第陪木石有靈皆伴侶龍蛇無忌待春雷仰天手把星辰理盡性心存化育該鐵笛橫吹山鬼嘯塵緣湧上寸衷來其二云親登泰岱閱滄桑鬼哭神號柱自傷俗骨漫存伊呂志庸醫那有緩和方宣尼悲憫留秦醫蒙叟道遙謝楚王一様知天難轉轉刑書畢竟意深長其三云我愛潛龍與結盟不因世易不成名烈風雷雨懷處舜鳳翔鳥吊屈平陋巷怕添飢瀕夢深山參透寡孤情傷民盡待靈丹救多少工夫鍊得成其四云萬物同仁係我思苦從經典竟明師聖宮那許人窺見大道能教鬼護持獨向阿衡求一德不因孟子認良知茅廬隱具雲雷業會得乘時舉措之當是時士人專習舉業讀之亦不知其詩中作何語特異之而已

扶 樵 兄弟三人居季幼讀書見父兄作苦不忍坐食從父兄力田農暇歌誦如故父兄曰子好讀書就以讀書爲業何必種田對曰
不種田那有飯吃我讀書是當歌唱我常常聽先生講耕百畝之田可以無飢種蠶桑畜雞豚可以養老我覺得那很有趣味要倦怠
了把那拿來唱唱自然有勁若教斯斯文文的學那些酸秀才我又不能就是半耕半讀這纔得法後父母沒兄弟析居房屋田產任
二兄支配二兄曰現在人口日多座落的房屋止能住兩家某處有庄田兩石草屋幾間田够你耕屋够你住你就上庄你要嫌輕了
你愛讀書先人所有藏書盡分給你算陪你的田地何如對曰喜遂携書籍同婦上庄亦耕亦讀越二年廬舍一新蹊徑修理山林竹
木極其秀麗年未三十婦卒不復娶有來議婚者扶曰人家死了人棺材方抬出去你就來教人家辦喜事那不太不講人情嗎客曰
你一個人要出門連門也沒有人看你又不是秀才拘那些禮做甚麼扶曰我看人生是來了人死是去了要來的我以禮待之要去的
我以禮送之盡情而止其餘也沒甚關係但我是個爲我的人我一生不跟我的心打復天下有合我心坎的女子我自然也娶要
是來了常常跟我淘氣我那是爲甚麼我那前室人德行雖不十分完善比鄉間蠢人總還算好然有時使氣我兩個人過日子只好
將就他我覺得那就不值不過是父母的命妻無如之何今他自己死了善緣惡緣一齊俱了我再不自尋苦惱妻子好便宜室宜家
不好連門也不能不要他何用娶妻也不是買豬買牛可以隨意翻覆的客曰子誤矣婦女何知惟隨丈夫爲轉移丈夫縱之始敢驕
橫乾綱一斷那有打不熟的鐵扶笑曰如君所言今日世界誠然如是男人打贏了是男人當家女人打贏了是女人當家但詩云妻
子好合如鼓瑟琴不是如降讎敵又云宜爾室家樂爾妻孥不是打爾妻孥人生在世除了心中快樂有何好處好容易生當海內清
平有衣食之安無盜賊之警不及時行樂而受無形之桎梏尙得爲自愛乎我亦非絕對不結娶關雎云琴瑟友之天下女子有與我
心性相投的可以爲我的朋友且願意爲我的朋友茹苦含辛受貧不怨我方肯續娶否則足命中無妻作罷論了客曰孟子說不孝
有三無後爲大如子之意而行也不顧先人禮祀嗎扶曰孟子此言怕不可爲典要天地生人盡要有後如太極生兩儀兩儀生四象
這樣加倍生去天地久已漲破了秦伯伯夷俱皆無後也沒有人說他不孝天地間那些倍道不道的人就是有後也不算他把時及

罪免了以我說人要不粗鄙不競爭清潔爲心和平接物既知愛己又能利人那纔能算一個人親戚鄰里都說他是個人不說他不是人一生就算完事若他在前途走隨後就有人指着說那個人不是人兒孫雖多不過養一羣禽獸恐怕禽獸多了天下就要大亂哩君等莫怪我的事要我自己主持他人不能干涉況且我的侄子很多先入禮記是絕不了的我無德行死了氣便散還要奉祀甚麼從此田也不種批與個人將座宅前一院批個夫後一院自己獨居終歲惟修理山林掘剔荆棘其繁密剪其旁枝或作薪或燒炭親荷賣之自號曰扶權薪炭所得之貲隨手而盡遇新鮮食品不問價值盡力購歸居家每食四簋飲酒每日兩度午餐後小睡睡起浩歌入山日入而息燃燈夜讀更餘方就寢二兄老常招之飲必流連累日然後送去每月必招諸子侄盡歡一醉一年四季非雨雪常賣柴炭至十數里不以爲勞時遇富饒不食主人之食人問其故曰能含食者盡是富翁富翁恒以奴隸待人對我輩苦工必不能以客禮相待我吃他一頓飯自儕於奴隸是孟子所謂飲食之人則人賤之也忍一回飯有甚要緊有一先生頗道德設帳古寺扶送柴至異其容貌留午餐扶力謝去校聞其自奉極厚益異之遂命齋夫辦肴饌候扶權至以嘉賓相待與之暢談說到世故人情無不曲盡且談吐風雅鄉曲秀才不敢望其辭令先生曰聞君飲食必精饜信乎扶權曰在我一個百姓享受似乎太過然我自食其力內問亦無愧心錢財生不帶來死不帶去又何必自苦尊館距茅舍不過十餘里倘肯屈尊光臨寒舍便知權之爲人矣先生許諾一日因事至親戚家問與扶權不遺遣人探之云在家植樹造其廬故在村外盤旋遲至鄉間皆午餐而後入見扶權正席獨酌食品可供數客權突見先生至驚喜迎迓撤席具饌頃刻間必肴羅列如宿備然即席對飲極其款洽先生問甲子幾何答曰年過知命矣先生曰方纔到你臥房見你架上書籍甚多抽下來看都是你手加圈點你真算個異人我的學問也不敢望你你做的事我總有點不明白真要請教聽說你不動產的收入很够你過活你應酬親鄰很不吝嗇你的自奉總算豐富你到這大年歲又何必理賣柴炭縱說不是你一個人應酬不周到他人也不深求你把飲食稍儉約一點也可以不賣苦力扶權笑曰我也要問先生先生出門必坐轎有甚好處先生曰不過不能走路扶權曰坐轎氏比在家中間步何如先生曰不若也坐轎還是搖動的扶權曰我挑柴炭慣了縱

說勞動不過與先生坐轎一樣我把擔子放下來比先生閒步還要舒泰況且天地生人大概是教人勞動的不是教人安逸的我自問我享的福比古來聖帝明王還享的大安敢不受一點勞苦先生曰何以見得扶樵曰那書經詩經先生總是讀熟了周公作無逸說殷之三宗周之文王都是無逸公劉豳風之詩都是教成王無逸周公斷不足驅成王的再考堯舜爲天子在表面上看不見其苦而堯之讓舜先咨四岳曰朕在位七十載汝能庸命巽朕位岳曰否德忝帝位看其語氣自然是這個担子太重堯担了七十年真不能担了纔咨四岳四岳又担不起這個担子所以要請虞舜舜之讓禹自云耄期倦於勤不是勞苦何以云倦舜南狩死於蒼梧之野怕是比我賣柴炭還苦一點且在苦樂上討較千古成不值的莫如大禹治水九年兩腳無毛而又非飲食器衣服卑宮室一點福也沒有享受舜又偏說他克勤於邦克儉于家天命在他身上要他做皇帝他一生兢兢說說總是說艱說難他畏天命比後來的臣工畏王命士卒畏將令百姓畏國法還膽小那敢享福哩今人見那過做了官就說那同的好命我想要是天命之命有小命就要受小苦有大命就要受大苦所以說五行剋我者爲官剋我就是要我受苦不願受苦爲百姓作事反要毀百姓的精血當自己的福那就是違背天命那就與臣工不遵王明士卒不用就帥之命一樣犯法杖一時候巧變詐逃了法網終久必遭天譴我一生幸而未受天命倘是受個做知縣的命也不能享這個福我比大禹的福還厚的大些再連賣柴炭的苦也不願受我將來能不遭災禍嗎我有天下的人只願享福不願受苦所以做官作惡惡甚者禍及其身信輕者禍及其子孫先生曰你這樣說來何以不學大禹非飲食扶樵曰這是我的一點私心我想古之聖人其聰明過于庸愚千萬倍其體魄亦過于庸愚千萬倍如孔子絕糧七日要是我這些庸人早已氣息奄奄還能彈琴而歌嗎我想體魄也可以養得剛健故孔子說食不厭精膾不厭細又說顏食也大亨以養學賢左傳亦云取精多物宏則魂魄強我的雞豚是我家中畜的我的魚是我塘裡畜的我的榮於是我自己出的我又何必不用以自養哩我自己養够了當然周濟他人我死了我那不動產儘够葬費多還何用先生大悅遂成莫逆之交扶樵六十以後始不負荷八十不扶杖上山行步如飛年八十四無疾而卒

人物志 (方外)

道教傳

中國儒釋道三教並稱二千餘年矣釋教入中國始於漢而道教爲最早伊尹相殷呂望相周所用以放桀伐紂之術皆道教也至老子著道德經而其教始代有傳人其術用柔爲剛用弱爲強故以桀紂之暴而湯武卒能滅之厥後張良受圯上老人之書亦即此術觀其說劉邦攻虢關立韓信爲齊王鴻溝講和而復追之皆用此術也學儒術者恒絀之爲陰謀不之取殊不知老子之教其內功原本一德與儒教之存心養性同一理特其教人涉世與儒教迥別儒教從狂狷做起狂者進取狷者有所不爲此書之所謂沉潛高明有爲有守後世之所謂氣節在老教則深以爲戒老教教人則曰挫其銳解其紛和其光同其塵以儒教視之酷似鄉愿而究其指歸各有用意儒教即名教以五倫八德紀綱天下反此者謂之不道天下無道以身殉道是儒者之能事如漢之黨錮宋之嘉祐黨人明之東林黨人其最著也究之殘賊之禍亂天下如毒蛇猛獸豈可以情理折其兇鋒在道教視之是不愛有用之身而自送死也何若用柔弱之術以除殘去暴之爲愈乎故名爲老教之所惡老子之告孔子曰良賈深藏若虛君子盛德容貌若愚去子之驕氣與多欲態色與淫志是皆無益於子之身孔子去謂弟子曰烏吾知其能飛獸吾知其能走魚吾知其能游走者可以爲罔游者可以爲綸飛者可以爲增至於龍吾不知其乘飛雲而上天老子其猶龍乎觀老子之教與孔子之贊皆是爲亂世說法留其身以有待非絕人逃世比也世以爲老教清淨無爲死靈天下人心誤已俗語有云真人不露相露相不真人故中國有神仙一說常在無形中積功德而人不知且其清淨無爲在中國歷史上亦曾收大效并非完全不適用曹參加黃老術相齊九年齊國安集及其爲相百姓歌之曰蕭何爲政較若畫一曹參代之守而勿失載其清淨民以寧一逮及文景天下富庶大概是老教之力世方多難老教不可廢也後世之士但見宋徽宗以道君亡國遂斥道教爲不可尊崇豈知宋徽宗之所尊崇者林靈素張虛白

之徒耳日事齋醮以求福爲今日之道士何足以云道教試問今日之道士有知老子爲何如人者乎光色道教能學姜子牙張子房者不聞其人而修身自好利物濟人挫銳和光知足知止者尙爲不乏五十年前忠厚者老癡習爲風氣茲略就所聞可傳於後世者爲之傳

吳道士 不知何許人棋盤山營有祖師殿清康熙中道士來居之畜一道童司洒掃時向山中採藥濟人略受報以自給無事則藥籠危坐每當清風明月常坐於殿外盤石若遇烈風雷雨危坐蒲團終夜不寐來往人問吉凶多奇中間爲人說休咎指迷津謂人生禍福概由自取人要安分爲人不貪財不好色發下志願濟人之急救人之危縱有災殃亦可逢凶化吉若憑一點小智慧利己損人縱免官非難逃鬼譴降降殃之理未盡混也然語言極慎非敦厚百姓不輕與之言有一士人金姓年少頗有才應試甚踴躍一日造訪問休咎老道曰生讀書有年矣詩書中道理爲己乎爲人乎將用之以修身齊家濟人利物乎抑用之以博取富貴美食鮮衣乎生聞言如冷水澆背狂熱一落千丈沉吟良久曰命之矣小生自問亦不甚卑鄙但處父兄之下世俗之情總不能免老道曰世間小小功名亦關係前根祖德你之命可以入泮宮看你氣色似乎尙早金生曰亦有救濟之方否老道曰也不難你看農夫種田可以知之矣春耕夏種秋收有一定之時節然良農勤耨多用肥料秋收必早若鹵莽而種有屆時而不收者矣人能廣積陰功即良農之肥料也子有姻戚某與人興訟將來必有大禍子能化解之今年院試可望售矣生曰諾及院試果補弟子員由是具禮儀再謁道士老道曰子自入學何勞謝我金生曰非也小生讀書數十年渾渾沌沌自以爲是前聞老道之言如夢初醒本想拜老師當個道童無奈屢緣未斷不能如願略表寸敬懇祈開一方便法門俾茫茫苦海中將來有登道岸之路老道曰子以爲我這道教與孔子之教有以異乎無以異也中庸曰道不遠人人之爲道而遠人不可以爲道又曰君子以人治人改而止天生萬物人一萬物之一種人之生也上柱天下柱地配天地爲三才萬物之繁雜惟人能綱紀之無人則天地不能自治而人之淫欲無度奸險戕賊其爲害更甚於禽獸故非聖人不能治人而聖人治人必以修身爲本未有身不修而可以治人者也儒教修身工夫曰正心誠意老教修身工夫曰

抱一守中其實一理也金生曰如老道言儒教道教本是一源後來相若何以若是之遠老道曰中國自伏羲立人極至於成周中間雖治亂循環而人道不廢幽厲以降人心敗壞不可收拾無聖神出來挽救則人皆淪於禽獸矣老子孔子各負天命而來其立教之心俱在天下萬世學老孔者皆不得以人爲之私心雜之孔子之教祖述堯舜憲章文武刪詩書訂禮樂入世之教也老子之教曾通天人之理包括古今之變獨往獨來出世之教也學孔教者必借人主之力始能出治老教則視政府爲無足輕重以陰陽爲戕天地爲爐合智愚賢不肖而鼓鑄之任其自相摩盪因應之妙皆出於自然實則老子之自然仍是順陰陽之道孔子贊易蓋屢言之如窮則變變則通通則久化而裁之謂之變推而行之謂之通通動不居周流六虛上下無常剛柔相易不可爲典要惟變所適等語皆自然之理也而其最顯著者尤莫如顯諸仁藏諸用鼓萬物而不與聖人同憂聖人是聖人陰陽是陰陽從可知孔子入世之教猶是聖人之憂於陰陽之鼓鑄有時不能濟事如歷代大劫人民盡感戾氣爭趨死路若江河滾滾而下何曾喚起來一個惟有空存悲憫而已到了此時然後知老子之教爲有用熟讀十翼便知孔老之教渾化無形矣金生曰老子以虛無爲宗恐於後世不適用老道曰有若無實若虛犯而不校是孔門入室弟子何獨於老教而疑之金生曰聞老教開神仙一門神仙不死信乎老道曰大而化之謂聖聖而不可知之謂神仙者山人也神仙即是遁世不見知之聖人聖人何曾死來所脫者血肉之軀設耳文王陟降在帝左右非欺人之言也金生曰世人說神仙可修煉而成然否老道曰談何容易譬之精金是粗礪鍊成的然由粗礪鍊成精金不知須幾經烈火就如孔子老子是真正神仙試問凡人能學得到否然俗語說得好不修今生修來生生世世苦修行九轉靈丹或可望神仙之略今世人都曉得精氣神爲三寶試看普通人日爲六根所牽引七情所束縛一點靈光日消月耗未死神已泣精氣神如何能凝結得住惟修行人先從少私寡欲做起掃除酒色財氣諸魔障不汲汲於富貴不戚戚於貧賤則此心方能寂然不動光明如鏡由是日日養之而精氣神始能不散輪迴再轉即是靈樞古人云凡富貴人皆有前根蓋謂此也人到了鍊成富貴之身最要自愛努力上達直上天堂貪戀榮華驕淫縱恣直墮地獄惟有大智慧人能見得清守得定乘此崇高富貴功德廣被於天下與修士之積銖累寸自判天淵

昔陳搏對宋琪曰吐納養生之理非有方術可傳假令白日冲天抑何益於世今主上有道仁舉正君臣協心同德邦治之秋勤心修煉無過於此陳搏此語真是入聖階梯神仙坦途古今多小英雄豪傑不知懸藉富貴再將此身一鍊一步登天而但窮奢極欲無惡不作取快一時消盡前根墜於九淵不能復起甚可歎也要知修士藉富貴以滿其功果是出世入世合一之修鍊謂予不信我引一人爲證昔張詠少謁陳搏欲歸隱陳曰公方有職事其勢如失火家待君救火豈可不赴也及第後以詩寄傅霖云前來失足下魚磯苦戀明時未得歸寄語果由莫相笑此身不是愛輕肥試問不愛輕肥所愛者何物富貴人與道德人相去之遠豈庸俗耳目所能窺測耶詠少與霖同學霖隱居不仕詠既顯求之三十年不可得在陳州霖忽來謁詠曰昔何隱今何出霖曰子將去矣來報子耳詠曰詠亦自知之如詠者自來自去履道坦坦直通天上人間非道德中人何足語此此等人物自兩漢以來頗爲不少就如近世之馮斌子成龍諸公一生受盡困窮爲蒼生造福皆出世入世合一之修鍊也金生曰如老道言天人之事有道者盡知耶老道曰至誠之道可以前知何足爲異金生曰此術亦可學乎老道曰若升高必自下若陟遐必自邇下學即是上達天人原自不分盡人可以達天欲希天求爲完人足矣金生曰如何方爲完人老道曰完人是真人不是假人何謂真人至誠無偽說我本來面目是也何謂假人形色色索制於七情是也老子曰五色令人目盲五聲令人耳聾五味令人口爽馳聘田獵令人心發狂難得之貨令人行妨此是真人假人所由判別六根是我的皆有至當道理不可爲外物所引誘於外物便是假人不是真人孟子曰形色天性也惟聖人然後可以踐形踐形方是真人又曰盡其心者知其性也知其性則知天矣天上是黃金世界萬寶裝成非到不動心地位置安可許其知世間左道旁門修盜賊之心妄窺天人之秘未有不受天譴道顯戮者况於眼前爲人道理一概不知尙望知天耶金生聞教歸家後兀坐如癡者日累復求之經典腳踏實地立志爲人後十餘年父母全歸男女婚嫁隨老道遠隱不知所終

溫醇習舉業隨師友應童子試隨意微逐以爲笑樂院試案發見失意者咸若死取中者喜若狂問其師曰是何爲者師曰秀才是宰相根基從此可以直上青雲豈不可羨窮年咕嚕爭此一剎故文場之戰讀書人以性命爭之然戰捷的人皆是實下用過苦功不是微

俾古人說發憤須當看榜時你行那入了學的是多榮耀落了第的是多難看你也要回去用工夫靜日讀書人盡如是乎師曰人生盡是爲名利所以說爭名者於朝爭利者於市爭名不是憑手爭到的要在寒窗苦讀又說些蠶蠶映雪鑿壁偷光鐵硯穿等故事醇醇之不解次年父沒依俗營齋因問道士以道教之事道士云道教本於老子又有食長齋人名瑤池派其教亦本於老子云能爲人誦經祈禱醇爲其父營齋七日誦經滿歲因行經得虛空之意繼買道德經讀之喜曰人之爲人得老子一二語一生用不盡矣少私寡欲更有何事爭名與爭利污濁等耳從此不與人相爭遇橫逆一笑置之他人或不能堪醇曰惡人自有惡人磨我那有閒氣力與此等人計較短長曲直先人有款存商家生息父沒後親與商人交接見商家算賬爭及權刀之末即託故將款取歸家人曰錢在家中不能生利矣醇曰無錢固然不好錢多了更不好錢是爲我用的我不是爲錢用的孳孳爲利要我用心那是錢比我貴重把我太不當人了我要貴重我不能因謀利勞心自是之後與商賈不甚往來凡借錢做生意的一概不應農民困乏盡力補助鄰里稱貸歸還與俱否不介意曰古人以水擬財財既是水自然要平我把水關住不放人家受了乾我也要受水多之害人家缺水時我有水放出去我要缺水時人有水也許放轉來若是愛水愛很了見水就要關住一旦大水到了不連人都淹死了嗎過地方募捐量力施予捐簿書無名氏曰我無大力捐助何敢書名朋友應酬不豐不約平居自奉不衣文采不食珍美曰我不以衣服飲食累我之身也不戀熱鬧場中曰我不以紛華奢靡搖我之心也或問之曰你一生不爭名不爭利斷絕嗜好欲學聖賢乎學神仙乎應曰一不學聖賢二不學神仙我止學我先是世俗人皆在名利之中見醇之爲人鄉里或笑之後見其逍遙自在智愚賢不肖無不同聲稱許老成人多則做之

晏俊林 生七歲而孤聰穎絕倫入鄉塾塾師講授即能了解年十三與兄析居依母度日家貧無人廢學稍長義園蔬學技藝皆有自得之妙家以不困窮冠經商日饒裕喜賓客四方三教九流之士無不容納咸同之亂保衛桑梓得力居多年三十三一屆三年有方士教以導引之術頗收近效然一與世接舊病復發一日有一道友來問病語之故友曰導引亦可以却病但此是道家一術非道教

之本也得其本則病立愈矣問何爲道教之本曰虛無是也凡病皆是魔鬼纏擾魔鬼非世俗之所謂鬼可以焚香燒紙能送得走的彼世間之形形色色皆魔鬼也能勞人之形攝人之精送人之命子之心太靈活病稍愈心即動一切形形色色之鬼八面奉承精氣神皆爲鬼用而不覺安得不病夫人心之靈得其正則爲道心失其正則爲人心人心不死道心不生古人云死其心而後恬靜死人心活道心也道教以虛無爲宗掃除一切形形色色之魔鬼令此心空洞無物故曰清淨無爲無爲而無不爲矣然心似猿猴如何能捆得住教之不動其生死關頭全在利與善之間向善便是生機爲利便是死路一心向善此心方有安頓處窮通得喪皆有命在不要爲之搖動初着手俗事亂如麻未必能一刀斬斷然人要死了物何在何我在萬緣放下一空一切空又有何難俊林聞言精神頓覺清朗請事斯語友又曰雖然如此仍要內外交修學道不必斷酒肉而通神明必須齋戒子之雞豚魚鴨充滿庖廚終歲殺生有傷和氣腥膻之味於人有損無益也俊林如教終身齋戒家有乾牛肉六十餘斤曾大水投之河順流而去有楊某兄弟殺牛力勸改業其人欠生債二百仟取券面焚之另給錢五十仟爲謀生貲本月除病愈益虔心爲誓不復事生業曰我之家產數吾衣食足矣稍有贏餘修橋路施醫藥孜孜不倦居鄉里力勸人息爭常言柔能克剛弱能制強齒傷唇舌而齒先落天道其惡剛強矣幾見強暴兇橫之徒有得善報者哉鄉里感化之有仁讓風俊林自學道教後數十年無災無難

張道人 不知何許人咸豐間來寓縣北關寨其里居姓字概不肯言人遂以張道人呼之所至談六道極其玄妙聽者忘倦讀書教行俱下過口成誦經史傳記諸子百家無不熟悉與談往古應答如流論時事則不答後不知其所終

光山縣普通道教就是道士頭目曰掌壇別於巫教曰清教壇取三清之義也掌壇贊道友平日亦非道裝與世俗無異道裝者住廟觀俗稱爲道人道士之祖師曰天師（按黃冠之教始於張道陵唐天寶七載封陵爲天師）城內有道官一人有水旱設壇祈晴禱雨有瘟疫設壇祈禳道官每歲赴四鄉查壇一次舊俗民間有災難則許願建醮人死則營齋皆清教壇司之愚民不識不知在季世亦維持人心之一助此固不可以科學之理研究也若士君子固早有不信齋醮者矣又有瑤池派食長齋含有修煉

之術不分男女界常數十里聚會職事有階級奉其師若神光山縣瑤池一門人最多又有天理派亦含有法術有老師常悅梵僧香能久跪爲人治病此皆道教之支流也

佛教傳

自佛教入中國關之者謂其近理亂眞其害甚於楊墨佞之者謂佛力之大過於孔子二者皆非釋迦自是西土聖人非中國之聖人其有功於世界不在孔子之下亦非在孔子之上蓋世愈亂而佛教愈有用當釋迦未出世以前其地普通人民盡是爭奪相殺與禽獸何異釋迦出而其人始知有人道安得不謂之爲聖人若中國歷史則異是太古之世人民知識未開即有伏羲神農諸聖人起而教之伏羲教之以人倫神農教之以衣食神農末世蚩尤惟始作亂延及于平民罔不寇賊鳴義姦究奪攘矯虔而黃帝平之自是厥後四凶爲亂而舜誅之桀爲暴虐而湯放之紂爲天下逋逃藪而武誅之歷代聖人夜先繼起由唐虞至三代中國文治冠絕古今逮及東周諸侯力政爭強亂端始起孔子不得志始以空言垂教然祖述堯舜憲章文武是因革損益之意非創作也釋迦崛起於西土前無神聖可因習聞慣見之人概係蚩尤四凶桀紂之流故其立教以拔出五濁惡世往生極樂世界爲上乘而五濁惡世即是人民縱欲敗度相戕相賊之所致人能除去淫邪不事殺戮仁愛之心發動自然與天地太和之氣相合五濁惡世立地可變爲淨土究之此等極樂世界千萬人學佛或有一二人能到而在中國唐虞三代邦畿千里維民所止早已人人享受矣是孔子與釋迦所處之地域不同故孔子以三達德行五達道立教而釋迦以發願生極樂國土立教時勢使然也王陽明曰佛怕君臣累故逃却君臣怕父子累逃却父子吾儒處君臣則還他以義處父子則還他以恩其言何曾不是不知釋迦以前本無君臣父子之倫自用不着中國倫常之教佛教流入中國亦以中國之倫常漸生乖戾故佛教乘虛而入歐陽子之本論所由作也到於今君臣（君出令者也臣行令者也）上有下下則是君臣（父子兄弟夫婦朋友懷利以相接不顧恩義不講情理謂之打破觀念縱淫欲恣殺戮用黃金美女驅後生於死地橫流汎濫盜賊徧於中國以奸掠殺爲生活洪水猛獸之禍於今再見即全球好尚爭誇

物質文明卒之世界競爭弱肉強食殺人利器日異月新四顧茫茫亘古以來無此惡世距中國之唐虞三代與佛經之極樂世界真不啻十萬億里數矣豈還他以義還他以恩之說所能補救乎故今日愛國之士多提倡佛教冀挽回人心於一綫然佛教之廣大斷非專一念經拜佛所能奏效秀才不能行孔教和尚不能行佛教古今同慨以其志向卑鄙專在謀衣謀食不能拔去五濁惡世也今略述光山之佛教以告發願生極樂世界者

陳

慧思武林 李氏子頂有齒犛牛行象視少以慈想聞夢梵僧勸出俗辭親依慈開受法坐夏經三七日獲宿智通行隨起艱步自念病從業生業由心起心源無起外境何狀於是輕安如故夏滿漸無所得放身依壁忽悟法華三昧北齊天保中領徒南邁時梁元位嗣侯景搆逆止光州大蘇山爲衆演般若法華二經隨文發解每命門人智顛代講陳廢帝光大中自大蘇山將衆趨南嶽乃曰吾寄北山止期十載適有林泉勝異指曰此古寺基也吾昔曾居此又指巖下曰此吾坐禪處於是化道彌盛陳主屢致慰勞目爲大禪將順世謂衆曰若有十人能修法華般若三昧期於見證者隨有所須吾當供給混然而逝時宣帝大建九年也壽六十四著有四十二字門兩卷無淨行門二卷釋論元隨自意安樂行次第禪要三智觀門等五部各一卷（祖燈大統）

智顛

字德安姓陳氏荊州華容人幼有奇相聞僧誦普門品忽自憶記如宿習年十八喪二親投相州果願寺依僧法緒出家陳天

嘉元年詣大蘇山詣慧思受業思謂曰昔靈鷲同聽法華今復來矣即示以普賢道場爲說四安樂行頌誦法華至樂王品悟三昧見靈山一會儼然未散以所證白思曰此法華三昧前方便初旋陀羅尼也非汝莫證非我真識顛於經有疑極見思來冥爲披釋後嘗令代講聞者伏之思遊南嶽顛便道詣金陵說法不立文字隱天台山隋開皇十七年作觀心偈跌坐而逝（續高僧傳參祖燈大統）

唐

道岸 姓唐氏先世居潁川爲大族永嘉南渡遷於光州傳平道岸當唐高宗時出家受佛法後居會稽龍興寺號大和尚中宗神龍初召入朝圖形於靈光宮御製像贊後辭還光州於大蘇山度人置封曰淨居於是毗陀苑園鬱起僧坊（高僧傳）

宋

清戒 字寶壽光黃間狂僧也世謂之戒和尚熙寧十年壽百三十而化元豐三年正月蘇軾謫黃州渡淮至光山過嘉縣鎮南二十里大許店休馬於逆旅祁宗祥家見壁上有幅紙題詩云滿院秋光濃欲滴老僧倚杖青松側只怪高聲問不虞噴余踏破蒼苔色後題 水僧寶壽宗祥爲言其異事甚多謂禪旣死人尙有見之者軾爲賦詩有我來不及見恨望空遺躡宿巖隱白毫鏗骨理青玉之句

大士航 宋端平間有異僧來光山見陡山河東南屏嶺登峰極其險峻率徒入其中建蓮極菴一座即名其山爲蓮康山隨後徒侶源源而來遂分其山爲上中下三蓮康迤里西出爲三關關外爲東教場又西步河爲西教場不及兩年星羅棋布建寺菴七十二所容徒侶千數百人蓮極菴爲總廟法堂宏濶壯麗每開講設百餘座位其次則義仁菴廣佛寺中禪堂慈雲菴法雨菴護國菴千佛寺菴峯菴皆局勢宏敞爲衆生說法處也蓮極菴說法與淨居寺之闡宗風者別迥專以濟世救人爲宗旨發普渡衆生之宏願故自號曰大士航

其說蓮極菴之意義曰蓮花出於污泥而一塵不染有水以澄清之也人能將貪嗔癡愛殺盜邪淫諸惡一切澄清下去此身已到

了極樂世界吾蓮極菴即西方之淨土也其說蓮康山之意義曰四海無一塊乾淨土人民陷於水火塗炭無安身之地惟入吾山從吾教者吾能康濟之其說義仁菴之意義曰佛教之慈悲即儒教之仁佛教之大無畏即儒教之義義之所在不顧生死而爲之所以能成其仁神州陸沉啡合儒佛爲一不能濟事特爲之一口道破學儒教者可以坦然不疑來從吾教以大無畏之精神了慈悲之志願即是義以行其仁故曰義仁菴其說廣佛菴曰書稱明王奉若天道樹后王君公承以大夫師長不惟逸豫惟以亂民此以人民爲主體治國之正軌也後世論治以君爲主體即賢人君子亦然每見人民之困苦顛連無君命則不能一援手是何若佛教之慈悲救世廣被生民乎其說中禪堂之意義曰世人學佛必有持戒禪定工夫方能不爲聲色貨利所搖此在儒教謂之正心誠意世間多少人才一到富貴場中使無惡不作其本亂也故先在中蓮康山設此一室試驗人才之根器禪定一關過不去不許到蓮極菴凡拿濟人利物之口頭禪誑已誑人以營私利者皆蓮極菴所屏棄也其說慈雲法雨之意義曰海內人民俱瘡痍欲死來此山者不護之以慈雲潤之以法雨如何有蘇息之望然來者須知慈雲法雨是澤及人心的不是專澤及人身的凡善男善女能信我之教掃除貪嗔癡愛殺盜邪淫諸魔障方寸之雲雨自油然而生可以自護可以自潤否則人與之以衣食仍是自投於水火非慈雲法雨之用也其說護國菴之意義曰中國已亡矣亡國之禍是大衆所親受的試問何以亡國還不是那一黨奸邪自私自利蠶國害民所以至此到今日國亡家破要在此山中自謀生活自然比公劉居幽太王遷歧還要吃苦而山中毫無綱紀何以能共謀生存是儒家修身齊家治國之道不可不講當是時正吳潤經理山營餉鍊壯丁之日大士航乘此機會大興屯田安聚流民關東西教場教之以守禦東教場建千佛菴取佛光普照也西教場建鷲峯菴取靈鷲能搏擊也

厥後宋亡山岩遺民人心匪固結不散者皆蓮極菴繼續說法之力迄於明季流寇之亂南山人民猶受其賜滿清一代父老爭傳之舊志成於乾隆五十一年載蓮康山寺菴尙有二十八所今則盡成往蹟矣謹依舊志備記其名於後

蓮極菴 義仁菴 青雲菴 石谷菴 玉泉閣 興法菴 廣佛寺 以上俱在上蓮康山

中禪堂 慈雲菴

法雨菴 自在菴 吉祥菴 祿羅菴 清虛菴 麓林菴 雲溪菴 雙峯菴 以上俱在中運康山 護國菴

寄志菴 翠林菴 雲窩菴 以上俱在下運康山 安慧菴 翠寶菴 俱在三關外 千佛菴 在東教場

鷲峯菴 滴水菴 栖雲寺 南溪寺 以上在西教場

默子和尙 明萬曆間僧坐化於南寺

智勝 字慧門蜀順慶李氏子也幼出家海潮菴年十九參天童室雲謁諸方名宿至贛州寶華受戒已從焦山破公得曹洞正法清

順治十四年因禮少室過光山見大蘇山慧思道場願啟曰祖庭陵替山僧之咎也爲苴理居卒歲旋赴歙轉遊黃巖邑令管聲峻重

其戒行重延住持十七年庚子力募興修苦身堅志僧衆親勞作踰歲佛宇僧寮次第煥然法像莊嚴金碧焜耀由是僧徒雲集宗風

大振先是邑人遙望淨居寺浮圖有紫雲結蓋訝曰茲山廢漚久矣殆復興乎越數月智勝來居云

佛教至宋明後漸有儒佛混合之勢光山佛地惟淨居寺爲最有名以蘇東坡曾遊其地且與佛有緣也至明蔡毅中亦曾讀書於

此故淨居寺舊有二學士祠又明廖逢節自巡撫告歸雅好禪學建大寺於固始春河舖日參禪於中一日香湯沐浴坐化何思年

七十歸田元修於南寺二十年不入城年九十無疾而化是皆儒佛混合之証後人不明佛理反爲前哲曲諱是不惟不知佛並不

知儒殊不知數百年之光山除習翠業者名爲業儒外普通人民盡在佛教範圍百年以前之舊族其宗祠十九有佛像鄉里婦孺

不拜佛者千萬人中不過一二破迷信毀佛像不過五十年以內之事耳究之迷信是迷信佛教是佛教正如制藝是制藝孔教是

孔教不得以僞亂真也光山舊日廟觀迄今存者不能十一仍將舊日名目存之孰爲佛教孰非佛教以待後人之考證焉

崇興寺 在南關東教場之北元明建中爲佛殿左禪堂右有古柏亭寺門南向明萬曆間僧如光重修清順治間改寺門東向更名千

佛禪堂康熙五十七年即寺門舊基增建關帝殿前爲演戲台改題曰慈聖寺後統稱爲禪堂廟舊有四面大士閣在廟後康熙中年

胡煦讀書寺中題開駢句云真觀無向背任東西南北隨時總見善提面大音非寂響縱蠢動飛潛到處咸聞般若聲 開漸圮乾隆

四十二年知縣胡元琢倡邑士共修作大士殿繚以甃垣附屬禪堂廟民國以來廟破壞僅存三殿將傾未倒并乞丐亦不敢寄居二十二年南關士人合資修理之立爲實驗小學校

寶相寺 在西門外接龍崖西明高厝間修 朝陽寺 在城南四里青皮畝保康熙四十七年僧通悟重修 靈鷲寺 在城南五里

官渡河南順治中僧恒一募建乾隆四十一年僧省慈募重修 天賜寺 有二一在城東十里天賜山一在城西南六十里向清城

保 墩子寺 一名墩子廟在城東十二里蔡連河保 斛山寺 在城東五十里雙輪河保 大梵寺 在城東南四十里大河寺

保 回龍寺 有三一在城東南六十里白舉畝保明御史畢佐周建一在城西南四十五里興龍畝保一在城西南一百二十里墨

斗關保 香山寺 在城東南六十里磚橋保 亭峯寺 在城東南七十里神劉橋橋 賽山寺 在城南七十里荃山頂神劉橋

保 福田寺 在城東南九十里永陽熬保 陽山寺 在城東南九十里永陽畝保 七龍寺 在城東南一百里永陽畝保 鐵

柱尖寺 在城東南一百里五龍保 石龍山寺 在城南五十里黃龍塔保 清涼寺 在城南五十里黃龍塔保 龍泉寺 夫

子寺俱在城南五十里黃龍塔保 仙人寺 在城南五十里仙人山山有仙跡因以名寺 扶山寺 佛現寺俱在城南七十里老

崗保 四面山寺 在城南七十五里老崗保 孟山寺 在城南七十五里孟家山夏畝山保 金泉寺 在城南九十里樸風山

保 三濟寺 在城南一百里朱向保長澗河之東 觀音寺 在城南一百二十里五龍保寺俯紫龍潭宋熙淳八年麟雨有應經

略使陳思九立碑記之乾隆甲子邑人孫萬億重記今但稱紫龍潭寺 淹時寺 在城南一百里樸風山保 駱駝屏寺 在城南

一百里 佛日寺 在城南一百里柴山保 梯子寺 在城南一百六十里 龍山寺 在城西南十五里龍山保 掃山寺 在

城西南二十里龍山保 雙河寺 在城西南三十里唐戴冲保雙河口東北齊吳家堂行僧念佛拓修更今名 淨居寺 在城西

南四十里淨居山北齊天保中釋慧思始結菴於此唐神龍中釋道岸建寺名淨居造塔於山頂廣明庚子寺燬於兵宋乾興中復建

賜額梵天寺元季燬明初修葺萬曆四十二年願藏經於寺有敕諭碑尙存崇禎末復燬順治十七年釋慧門募修邑人胡虞冒記乾

隆四十五年釋廣慈因佛殿舊趾開堂五楹以延衆開期說戒漸復叢林之舊寺踞羣峰之勝地本名蘇山後以寺名爲山號多名人留題宋蘇文忠明蔡文莊曾讀書其內有二學士祠久廢嘉慶道光間寺衰落塔亦圯僧竺鼎振興之整頓廟規清理廟產重修雲塔壁壘一新滿清之季塔復圯連年亂神像亦毀然地本名勝廟產亦尚在如有慧思慧門其僧者再出重新廟貌不難也 文殊寺 在城西南三十里張朱寺保有兩台山今寺廢兩台趾尙存 津梁寺 在城西南三十里張朱寺保文殊寺街北太平橋南岸明時建 華嚴寺 有三一名大華嚴城在西南五十里金井冲保一名小嚴華在大嚴華東四里俱時明建一在城東南四十里磚橋保明萬曆三十三年建有碑記千佛寺 有二一在城西南六十里興龍蝦保一在城西北三十里余臥店保龍台集之東明宏治十三年僧慧寧募修寺門有龍井樹碑其上題曰龍泉聖水今但稱臥龍台寺 通山寺 在城西南六十里通橋保 龍潭寺 清流寺俱在城西南七十里向清城保 石林寺 牢山寺俱在城西南一百里半山保 玉峯寺在城西南九十里 觀音巖 寺在城西南九十里山河保 凌雲寺 在城西南一百里千斤保 鐵爐寺 在城西南一百四十里潘殷冲保 玉泉寺 在城西南一百二十里潘冲保 天台寺 一名鐵瓦寺在城西南一百五十里天台山頂山麓距鐵瓦寺六里許又名赤城寺 寶香寺 在城西南一百五十里潘殷冲保 雲峯寺 在城西南一百八十里老君山麓潘殷冲保 劉聖寺 在城西南四十里劉勝廟保 石佛寺 在城西南四十五里石尤塔保 獨山寺在城西南七十里仙山保 萬聖寺 在城西南五十里仙墩保 仙居寺 原名崇壽寺在城西南六十里仙墩保仙居寺旁有石塔有石佛寺刻云宋元祐八年癸酉十月十九日縣令李盛鏗奉安入塔又有元時碑今寺與塔久圯石佛及碑移入店北東嶽廟內 高連寺 在城西北四十里高連廟保瀕河 仰山寺 有二一在城東六里一在城西南一百五十里潘殷冲保 廟山寺 在城北八十里廟山口保 藏經閣 在城東門外明邑人扶克儉建乾隆十六年知縣譚龍重修 觀音堂 有三一在城南門內城隍廟東雍正十一年修知縣常三立有記一在城東門外晴湖中一在城西南四十里石城塔保 禪堂 有二一在城南四十五里潑陂河永濟橋南明天啓間邑人畢佐周建乾隆四十六年僧曾宗復修一在城東南一

百二十里東界嶺五龍保 三教堂在城南關外小石橋東 葉家堂 在城東南五十里龍錫冲保 鐘家堂 在城東南六十里
神劉橋保 秦家堂 在城東南一百里五龍保 郭家堂 在城南五十里黃龍塔保 熊家堂 在城南五十里官陂時有白衣
大士像故里人稱爲白廟邑人熊玕重修 晏家堂 在城西南五十里晏家河街西邑人晏毓實建 龔家堂 在城南八十里老保
四面山西五里 扶家堂 在城南八十里老關保 胡家堂 在城西南五里青陂畝保邑人胡季堂重建 裴家堂 在城西南
六里青陂保 竹家堂 亦名龍泉寺在城西南墨斗關保赤川亂作寺僧倡修龍泉秦保衛人民頗有功 大名堂 在城西八里
簡家堂 在城西四十里高廟保 盧家堂 在城西四十里羅城店保 地藏菴 在城北門內流慶太僕山夏祠西 彌陀菴
在流慶山地藏菴右 朝陽菴 在城東南九十里神劉橋保 大悲菴 在城南四十五里潑陂河永濟橋北明邑人舉佐周建
十方菴 在城西南四十里花揚保 海會菴 在城西南四十里高廟保 興佛菴 在城西南六十里金井冲保 菩提菴
在城南七十里老關保李家窪明萬曆八年重修佛重殿 妙應菴 在城西北七十里 萬松菴 在城西七十里馬犁橋保 三
清觀 在東門外三官廟殿後 顯靈觀 在城南門外東明嘉靖三十年知縣陳良顯邑紳熊榮等倡建邑人李逢陽記今俗俱呼
真武廟 真武觀 有二一在城南五十里潑陂河一在城北七十里孫鐵舖 回龍觀 在城南五里 飛龍觀 在城南十五里
九龍觀 在城南八十里 白雲觀 在城東南一百二十里白雲山唐時建相傳唐王焚修其中有唐王洞清順治間知縣管聲
駿重修大梵真武金容 恭真觀 亦作恭鐘觀在城西南四十里花揚保 通山觀 在城西南六十五里通穆保 王母觀 在
城西南十里向清城保 威靈觀 在城西十五里 茯苓觀 在城西八十里馬犁橋保 玉泉觀 在城北二十里 玉皇閣
在城南門外千佛禪堂東北明正德元年邑人吏部郎中鄭宏建清順治十六年僧眞實募修知縣管聲駿記雍正九年復修 城隍
廟 在城南門內街東即宋元時故學塞明洪武七年知縣薛達遷建學廟八年知縣黃德昭繼任即以學廢地建城隍廟嘉靖二十
一年醫縣周栗倡邑人重葺大拓舊制邑人李逢陽記萬曆十六年知縣牛應元重修自爲記厥後歷任知縣如程國祥施堯化朱明

清之警聲曠楊先春相繼修葺雍正三年知縣傅之誠倡修大殿自爲記民國以來迭經兵燹殿宇燬盡惟剩一後院現立商會

馬神廟 在縣治左創建未詳順治間知縣警聲曠重修乾隆二十六年僧會司廣生重修知縣胡宗發題殿額曰息馬善度按周官春

祭馬祖夏祭朱敬秋祭馬杜冬祭馬步階用周制祭以四仲之月唐宋因之明并請神祭以春秋二仲惟以六月馬祖生日祀神

火神廟 有三一在城南北街即舊察院廢址乾隆四十六年知縣賈雙玉以其地創建神殿連楹三間東西舍各五間大門內爲演樂

台四十九年知縣楊殿梓於殿左增建客廳三間橫舍爲廚房一間東西俱聯以雙垣又前爲重門二楹亦聯以雙垣城內人稱爲

火帝宮一在城南四十五里潑陂河鎮乾隆三十八年合鎮士民公建一在城西四十里臥龍台南歲以六月二十三日祭

風火廟 在城南關街東祀風神火神創建未詳乾隆十四年知縣徐伉重修

龍神廟 在城東南五里潮官渡河俗呼大王廟蓋宋大觀中詔封五龍神俱王僑雍正五年直省州縣奉文建廟乾隆二十四年部議

定以歲春仲月辰日致祭

烈神廟 有二一在北門內一在城南七十里永安墩康熙十九年群虎肆暴虎灣生員柳幹糾鄉勇繕器械警於社廟殺虎二十餘患

乃息因建廟報祀

東嶽廟 有六一在北關外東明嘉靖二十九年建民國來燬於兵燹一在城東十里臨仙河一在城西南七十里烏馬潭一在城西南

六十里向家店東一里一在城西南三十里花楊保一爲城西五十里柳墩保仙居店北

五嶽廟 在城西南六十里馬黎橋保

三泉廟 在東門外元成宗時立三泉廟於府州縣春秋通祀主醫藥明洪武中議以爲濶詔郡縣毋祀祀嘉慶間復立邑之有廟莫詳

其始或明所創也

三官廟 在東門外未詳創建所始高氏州志謂三官之說昉於漢之太乙唐之九宮非也考三國魏志張魯傳註張氏爲五斗米道病

者請醫膏病人姓名作三通一上天誓山上一埋之地一沉之水謂之三官手書此今世齋醮以正七十月爲上元天官中元地官下元水官之以本也

二郎廟 在城南五十里官渡阪相傳神爲秦時蜀郡守李冰之子佐父疏峽江有神勇臂入水斬蛟蜀人祀之灌江上所謂灌口二郎神也宋時封清源真君其廟寺遠在處有之

真武廟 俗稱即北方七宿元武之神也唐開元禮祀黑帝以元武七宿從祀宋真宗時以濟祖諱改爲真武徽宗時加封號曰佑聖助順真武靈應真君世傳以爲淨樂國王之子煉修於均州之太和山得道飛昇稱爲元壇祖師道家之說也縣境廟有七一在北五里順治間知縣管肇駿重修一在城東南六十里畢家店之西瀕河明天啓間邑御史畢佐周建里人稱爲畢家大廟廟前及店東南建護岸石堤延一百五十二丈崇一丈二尺後石堤半圯乾隆三十七年瀑漲衝激廟與店半沒於水今店移於東半里許而廟後殿廢趾尙存一在城北九十里僕公山頂明正德五年趙乾建萬曆三十三年邑御史彭應參重修乾隆十四年道人蔣復常續葺一在城北八十里黑龍潭南岸明時建一在城北八十里廟山頂明萬曆四年建一在城南七十里之棋盤山明時建久圯故址尙存一在棋盤山東數里之金蘭山清同治初建即舊志八景中三山夜月之三尖山廟成改名金蘭山光緒數十年間每逢正二三月朝山者不絕於道民國之初猶有朝山者

右錄寺菴堂觀宮閣廟特依舊志記之新增者絕少光山廟宇尙不止此數世亂無法調查今亦殘毀殆盡廟觀間住道人僧侶爲多即滿清載在祀典之廟亦係僧侶司香火故並志於此

耶穌教傳

耶穌教是一神教中國舊係多神教尤其以供奉祖先爲天經地義耶穌教掃除一切偶像並祖先亦不許供奉故其教初入中國爲士大夫所極力反對往往民教致起衝突究之耶穌教以博愛爲宗旨與中國之萬物同仁本是一理而所至即立學堂尤其實行博愛

之特徵若中國祭祀之說此理最爲難講故或問禘之說孔子答以不知古者天子七廟諸侯五廟大夫三廟士一廟庶人祭於寢此中精義惟善讀書者能自知之不必空言聚訟朱子家訓曰祖宗雖遠祭祀不可不誠這便是信口開合不合道理若謂千百年之遠祖猶能享祀則益天地皆鬼矣晚近中國人情澆薄強半棄父母不養而謂其能誠心誠意以鬼享之將誰欺乎況棄父母者亦必不能博愛博愛者亦決不棄其父母耶教於人之死後或別自有說正不必以吾儒之教一例衡之竊嘗謂物質文明日開一日中外人士大都在競爭中謀生活際來攘往俱含有一種殺機惟教堂教師言語溫溫極其和藹是真能與儒釋道合而爲一其進斯世於大同者

光山縣耶教之福音堂始創於信義宗牧師羅玉森者係美國人民國三年春出資購買張姓座落城內北大街路東地基一段建設禮拜堂與學校是年又買黃姓座落北台子東端靈官廟改造西牧師之住宅三年後四鄉分堂於潑陂河楊廟橋楊家墩吳家寨孫鐵鋪晏家河李河等七處亦逐年成立領洗人數者四百餘人而慕道學友已千餘名矣（胡幼竹來稿）

人物志

方伎傳

孔子曰素隱行怪後世有流焉吾弗爲之矣是謂素隱行怪不合於君子之大道非謂其無過人之能也倘以爲盡是欺人後世必無述之者天地之大何所不有人跡罕到之地魍魎魍魎不足爲奇况方伎乎自古稱光黃之間多異人別錄之爲方伎傳

葛洪 晉人字稚川丹陽句容人也少好學家貧性寡欲無所愛蓄閉門却掃未嘗交遊或尋書問義不遠數千里期於必得遂究覽

典籍尤好神仙導養之法從祖葛元學道得仙以鍊丹秘術授弟子鄭隱洪就隱學悉得其法後師南海太守鮑靚靚亦內學逆占將來以女妻洪傳其業兼綜醫術大安中顯秘討石冰之亂檄洪爲將兵都尉破冰別率遷伏波將軍冰平洪不論功賞徑至洛陽欲搜求異書以廣其學過弋陽縣縣有樂安山愛其勝止居焉值人戶多饑死洪濟之以丹又於旁近數里山中種杏成林後人謂之杏山宋元嘉中於此立縣因洪所居山名縣曰樂安至唐時復改山及縣名並曰仙居云洪後還鄉里以功賜爵團內侯咸和中遷諸議參軍散騎常侍洪固辭開交趾出丹求爲句漏令行至廣州鄆嶽留之乃止羅浮山著書號抱朴子卒年八十一世以爲尸解得仙云
(晉書參寥字記及齊山川志)

僕僕先生 不知何許人唐時居樂安縣黃土山三十年嘗偕合丹乘雲往來州刺史李光以爲妖叱左右執之龍虎忽見其側先生乘之而去須臾雷電大至碎庭槐十餘株衆皆奔潰後有客於義陽郊行日暮投宿道旁草舍遇老人與藥數丸食之使飽既明辭去見老人乘五色雲去地數十丈客遽顧之至安陸爲人述其事縣以爲惑衆禁之客向空祝曰仙公何事見使我受不測之罪忽老人乘五色雲自北方來縣官再拜問其姓氏老人曰僕僕野人也客乃得釋稍其像聞於朝敕立廟祀之

應夷節 汝南人生不茹葷長游龍虎山師馮惟良得上清大法棲真天台山日誦黃庭大洞二經爲人致禱忽一日沐浴入淨室凝

祥解化是夕異香馥郁猿鳥悲鳴及就窆視之俱空棺而已

張果 晦鄉里世派以自神武后遣使詔之即死後復見恒州山中開元二十四年刺史韋濟以開帝再遣使書邀禮乃至東都宮集賢院肩輿入宮帝親問治道神仙事果善息氣能累日不食自云生幾內子歲位侍中觀實年六七十那和璞者善知人天壽師夜光者能視鬼帝令和璞推舉生死憮然莫知其端帝召果密坐使夜光視之不見果所在帝謂高力士曰吾聞飲荼無苦者奇士也時天寒因取以飲果三進頰然曰非佳酒也乃寢頃視窗焦縮取鐵如意擊墮之更出藥敷其斷良久齒已生粲然駢潔帝益神之欲以玉眞公主降果未言也果忽謂祕書少監王迥質太常少卿盧莘曰祿謂娶妻得公主平地生公府可畏也二人怪話不倫俄使至傳語曰玉眞公主欲降先生果笑固不奉詔懇辭還山濯銀青光祿大夫號通元先生未幾卒或言尸解今光山縣兩境有張果老山世傳果嘗棲隱於此時人踪蹟詭祕事或然也(唐書參山川志)

朱元經道人 居浮光有黃白延年之術閒往來城邑以藥濟人年百許歲世多言其得道公卿尊師之甚衆蘇軾謫黃州聞其人欲一過之未果已而卒光州曹煥與棺斂葬之遺有金銀及藥甚多郡中爭欲分買曹煥不許悉封付有司軾以書與煥令其聞於朝人之祕府(東坡雜記)

路真官 名當可宋徽宗時人兒童時遇一道人邀路往一屋扇閉其中有油與蜜數甕令食之久而後盡大瀉血穢幾死乃刻符印授以文書治鬼之法其父知之藏舉其符印文書藏去尋又得之父意其竊取詰責對曰非竊也不知又從何來其父怒破其符印焚其文書有頃符印文書復具父異之乃不復禁其所為路能作太陽丹置蒸餌果粒於掌望太陽嚙呵揉而成丹其色微紅以授病者服之良愈崇觀間有宮婢病狂邪如有所憑召路入禁中令作丹不能成左右諱曰不曾帶得廟王家藥料來耳蓋京師廟王家賣鱧脂也路曰適被召迫促而來神氣不定故丹不成乞賜盥漱再造有旨賜之已而成丹以授病者下嚙而愈南京張某之次子患瘰癧極巫卜者多云有祟乞路乘拯救路攝衣正坐而語衆曰吾爲張氏治祟欲其見之否衆歡躍乃各於其手心書一符令侍立於後俄見

一鬼吏若執符者携狀去未食頃一金紫偉人當前致禮恭折足下路詰之曰爾爲城隍神知張氏有鬼祟何不擒捉對曰現擒在此肅然吏卒擁一少年滿身被血以手障面及心腹間慟哭久之問曰汝爲誰曰身是張乘長子生前因不肯貽父怒遂與舍弟同謀見殺利刃刺心腹痛毒到今若父怒其子分所甘受至於弟殺兄且席捲所有在理難堪此某之所以爲祟也路聞諭之曰汝若取弟則乃翁無嗣冤債愈深又何益於汝吾令汝父建黃錄大醮薦拔汝似爲上策語言往復然後從命倏忽俱不見張族聞之悉悲泣曰信有之路戒使速償醮願病者漸安已而無恙而張氏憚費頓忘所約此子後乘馬行河岸墜地折脊死陳州大旱適路至父老詣郡守請路致雨守以路爲妄殊不信執從之路就郡廳作法命施青布幕圍障四旁中置巨盞貯水半之焚香步叩叱咤良久語守曰龍到矣守率僚佐視盞中隱隱見一物如羊豕而小播伏不動腥氣遠聞涼然有寒色始異焉嚴奉至三日又語守曰今日龍行雨必小異幸勿驚怖日停午白氣如紛絲自盡達於幕外俄頃陰翳晦昧飛電震霆穿揭屋脊一府吏士僮仆相觸大雨傾盆迨暮甘霖盈尺遠近沾足暮年倦遊家居適天旱光山縣城西霖山有龍井其深草澗路繞兩人井探龍令其徒捧符牌立井上以俟久之見井中出一深毛巨手其徒遽驚仆路失符牌旋化一鳥伏牛腹下雷霆轟擊大雨傾注者路與牛並被震死鄉人既應沾泥感路之功爲營葬山中封其墓立石紀其事題曰路真官之墓至今父老類能道之

左法官 失其名明季光山術士也得五雷正法每天早祈雨結高臺設大席於臺上登台披髮仗劍晝夜作法先示雨期至日官僚畢至行禮用劍挑遠軸朵雲隨即彌亘晴空風雨驟至雷霆旋繞旗上乃破碗書符藥之靈時平地水深尺餘後傳其術於光州王宸展試於光汝信羅間持戒莊嚴未嘗輕泄其法宸復傳其子試之亦效後遂無術者

光山術士歷來相傳不少亂後無從查考其事蹟大概小試之有靈異足以動人大用輒不效猶記民國十五年秋土匪袁鏡率領七八百匪徒自西來突到晏家河虜掠殺戮殘酷距晏家河東五里北岑家窪傍澆晏二河往來大路該村有木匠岑姓係天理門之小頭目自云能見鬼略知一二日之吉凶鄉人問避匪當何之岑曰這一次土匪似乎不往澆陂河明日當南去鄉人曰如此可以不避矣岑曰

我村距晏家河太近安敢教你們不避但往日避匪到南山這一次避匪到北阪可也次日匪果到新集岑又對人曰光山縣前途不可知如何來這些菩薩人間菩薩有多少岑曰空中盡是菩薩不計其數未及三月光山縣地獨立紅學黃學直變成一個鬼神世界直到於今縱有精士將奈之何

列女傳 (上)

中國數百年來以夫死不嫁爲天經地義此其說蓋始於程頤頤之言曰女子從一而終或問曰家實不能自存奈何頤曰餓死事小失節事大此等禮教是頤個人私說與三代之禮教不合聖人制禮定爲配偶所以防其淫佚而自異於禽獸但不許男女雜交非不許其再醮也春秋諸侯大夫之女再醮者多矣降及後世尊孔子爲禮教之祖伯魚之婦再嫁於衛庶人孔子不以爲非也韓愈范仲淹爲唐宋名儒韓愈之女再醮仲淹之子婦再醮人亦不以爲非也聖人立法必順人情不以時行異能概繩斯世自程頤之說出後世士大夫遂以此爲名教之大關節有強制婦女不再醮以撐門面者往往釀出奇奇怪怪之醜惡非迂腐儒生拂人之性有口激之耶然孔子刪詩獨有取於柏舟何也曰此其理不可以尋常論孔子錄柏舟一詩蓋爲婦女保獨立之精神而引天下之賢女於聖神之路也夫男女構精是感天地之氣化故聖人以禮順而導之使其不至於濫以敗壞其身體若進而遇之是絕生之路也嗚呼可然天地生人性格各有不同有自來以男女構精爲污穢者矣有琴瑟之好極篤而終身不忍倍棄者矣有感於翁姑愛子女之情固結而不可解者矣有立志超乎氣數之外而修身學道者矣凡此種種皆非庸俗所能夢見世人妄以情慾之感搖動之是欲以季氏之富易顏子之陋巷簞瓢也柏舟之詩蓋許婦女有主權婦女有獨立之精神雖父母不能奪其志而後可以希聖可以達天此中之妙道固未可與庸道也聖人說法固有上乘下乘之別矣作列女傳

元

唐氏女 光山人性烈葬父見冢不高自用裙裾包土以封人以孝女稱今邑東門外有
有孝女墓

明

李氏女 聘羅生生遭繼母虐死女年十四衣縞誓死不嫁富室聘之不從扁處三十年一夕端坐逝

王氏 史嘉法妻夫卒氏年二十自縊死

胡氏 夫名誼失其姓誼病胡侍藥六年焚香祈代誼死遂絕粒而卒事聞旌表

麻氏 諸生麻袍女許字錢甯甯家被疫多死僅姑壻存麻女曰姑病執理懇其母偕往視之至則甯已死女爲姑調藥餌愈欲殉夫母曰爾未嫁女曰字之矣夜縊死夫棺旁時年十四嘉靖中敕旌題坊曰心月同孤

孔氏 主簿胡華妻年二十夫歿不食而死

黃氏 儒士盧應期妻生子永甫三日而夫歿氏欲殉姑勸以撫孤茹苦歷四十年子永登萬曆進士陳情題奏而氏適卒敕建貞節坊

胡氏 儒士陳一山妻年十九而寡孝於姑而貧其弟瑄憐之並迎養於家姑卒胡哭之亦卒

高氏 楊懷妻年少無子而寡乃立嗣奉姑姑死亦哀毀死

陳氏 陳黃門女幼知書適儒士余加慶而寡孤尋不育立嗣又歿遂不食死縣學匾
旌貞節

蔡氏 耿汝惠妻夫歿守節十五年始有姪嗣之未三齡殤氏遂啞血死

按舊志載耿淳貞適黃安孝廉耿汝 事與此相類疑是一人但氏一作蔡一作耿而江惠一作汝惠因并存於此

甘氏 諸生宋希朱妻夫故氏青年無子閉樓戶獨居苦節五十年卒萬曆二十八年
建坊立詞於雨壇東

徐氏 盧文勳妻父翔母雷氏四歲能讀孝經年十七歸文勳踰年夫歿及葬氏投穴伏
棺願殉救之出旋登樓自縊死萬曆四十年知縣施堯化題其墓曰氣凜冰霜

馮氏 鎮撫蔡亨中妻年二十四而寡與妾胡氏相依撫兩孤瑋瓚有聲士林年七十
卒兩堂題旌衛經歷劉愨者其塚塔也誌其墓

吳氏 程遠妻事姑盡孝課子世昌成進士歷官巡撫世會貢生夫卒三十餘載爲時
女宗封恭人

蘇氏 光州人巡撫程世昌繼妻姑吳性嚴蘇能其歡心吳臥病奉藥餌必先嘗侍床
幃晝夜無間及歿哀毀幾不能起封恭人

清

曹氏 生員任璟妻早寡勤績養姑訓孤添源固源旭源有方添源補諸生氏年八十
知縣管聲駿表其門

劉烈女 鄉民劉澤女字崔氏而塔妖女年十七求殉母慰之屬其嫂日夕與伴一日嫂
父至嫂出飯父遂乘間自縊死邑令王起岱為之表墓并名其里曰烈女村

邱氏 諸生孔文達妻年十八而寡父母欲奪其志遂不歸宵敬事翁姑為翁納妾胡
氏生一子撫之倍至踰年翁卒茹苦二十餘年終乾隆八年旌

曹氏 舉人曹璋女適胡爾翼夫早歿氏毀容自誓堅操四十餘年邑令管聲駿旌其
門

劉氏 新興令蔡琮妻迪詩史夫卒於任無子氏扶柩歸葬立從子以繼并分產贖族
之貧者孫鈔諸生

陳氏 鄉氏王瑄妻瑄亡遺二子貧無所倚氏苦志以守邑令楊先春旌其門

閻氏 韓國卿妻翁病氏割股奉之而愈夫病劇抱幼子對泣懼以年少見疑請其夫曰及君作墓穴二如不諱君處一留一以俟我撫子成立就寤耳時氏年二十七後二子同春孟春並充貢汝南道給匾以旌

鄔氏 胡顯妻顯外賈值寇熾姑自壻家還遇寇死氏夜縋城覓屍負僻處坐守三晝夜賊退即營葬踰年夫始旋未幾卒遺子景虞苦節撫之康熙中歲貢

孔氏 諸生畢永泰妻無子而寡撫猶子奉姑終邑令王起岱旌之

孔氏 熊腴妻早寡撫三齡孤寇熾散產給族令衛其子氏卒子亦繼亡媳黃氏持節如其姑人稱雙節

徐氏 羅山諸生宗周女適牢山保胡清年二十無子而寡念姑老無與養者食苦以養康熙乙亥姑卒氏曰吾事畢矣乃自經死邑令楊之徐匾旌之

陸氏 高梅保陳玉階妻貢生陸奠女年二十五而寡孤復妖養舅姑歷四十二年雍

正十二年旌

左氏 高梅保陳正階妻年二十三夫歿孝養舅姑撫孤成立守節五十一年雍正十

二年旌

唐氏 熊文麟妻年十七夫歿撫孤成立守節四十八年雍正十二年旌

陳氏 諸生熊成佐妻年二十六夫歿事舅姑撫夫弟及姪皆入庠守節五十五年雍

正十二年旌

毛氏 諸生胡國明妻結褵九載夫歿屬以嫡母朱庶母王并撫柩孤氏孝慈備至兩

姑俱高壽終子瑾亦成立爲諸生乾隆三年旌

王氏 張朱寺保曾士一妻康熙四十二年夫歿氏年二十七苦節教二子長入太學

乾隆四年春氏煮粥賑饑一月載入中州彰善錄年八十四終

張氏 訓導徐宗義子蜚妻年十七而寡矢志撫周歲孤雁彩勤事舅姑姑多疾每夜

分不離側從姑張孀居無子氏迎與姑居同養十餘年而歿又夫再從子因荒鬻田給

錢券買之次年春焚券而返其田氏訓孤雁彩督課甚嚴旣冠補諸生

盧氏 諸生嵩岑女知書義遠儒士張紘四月而寡守志歷四十年姑疾侍湯藥日不

交睫凡數月氏父嵩岑無子嫡母曹生母王無依天迎養數十年既歿奉柩歸葬父遺田概給從姪以供祀

張氏 儒童黃嗣遠妻年十六歸黃生子華周暮而寡家貧勤績養親撫華成立娶婦曹氏生子美中甫四月華又卒曹年十八姑婦苦志操作家漸起美中援例入監又卒復撫三孤孫成立凡橋路及貧苦親隣多所捐助張氏乾隆七年旌婦曹後數年亦請旌

劉氏 諸生胡希銓妻年二十三夫歿撫遺腹子建成立年十七娶諸生陸純珍女爲婦生子未幾建又歿陸矢志養姑人謂一門雙節乾隆七年旌

楊氏 龍山保梁入信妻年廿四夫歿矢志守貞上奉翁姑撫一子成立乾隆七年旌
余氏 吳褚寺保庠士沈琮妻年二十二夫歿甘貧守志教子成立乾隆六年壽八十卒七年旌

戴氏 張朱寺保鄒郇妻二十而寡孝事翁姑撫遺腹子成立年八十卒乾隆七年旌
楊氏 盛遂珍妻乾隆七年旌

陳氏 孔緝文妻乾隆八年旌

李氏 石尤 保周繼昌妻康熙三十五年夫歿氏年二十五矢節撫子成立卒年八十四乾隆八年坊旌繼昌孫監生遺彰妻盧氏年二十六夫歿撫子官今援例鹽大使守節二十八年卒

周氏 儒童孔才妻年十八夫故守節事王舅姑及舅姑如禮孤儼然甫三月撫之成立未幾儼然歿媳熊氏生遺腹子亮氏復以夫從子卓然爲子歲歛輒出餘貲周貧困有戚屬陸氏女甫生而母死氏撫之長擇壻厚奩嫁之邑中傳爲盛事乾隆四十年坊旌

陳氏 儒生蕭斌妻年十六歸斌生二子而寡氏矢志撫孤舅病替不欲服藥氏先嘗跪而而進之夫二弟四妹俱幼氏撫愛之以長爲之授室遣嫁持家四十餘年以肥產讓於夫弟而令己子任礪薄者里黨義之

袁氏 高連保彭彬妻康熙戊子夫歿氏年二十一撫一女贅壻相依苦節四十五年終乾隆十四年旌

胡氏 阮圖麟妻乾隆二十一年旌

甘氏 貢生甘琮女歸禮部侍郎胡煦子諸生長學越七載長學歿氏未有子哀憫幾絕因翁姑年老矢志代夫終養嫡姑陳夫人病躬調飲食湯藥晝夜不懈事庶姑夏如其姑乾隆元年九月翁煦卒於京邸奉旨歸櫬氏夫弟季堂幼一切祭葬皆氏所經營具無違制初季堂年四歲失生母氏代撫之至是甫八歲怙恃並失惟依嫂以居氏以嫠婦獨持門戶撫季堂愛護周篤爲之延師授室季堂用是自奮於學以任子餘授順天通判歷部郎出守慶陽調任涼州皆奉氏官署事之如母內政皆稟焉氏裙布荆釵儉能中禮悉遵先世家範季堂長子鈺年七歲氏撫以爲子嚴慈兼至一一導以禮法年六十四卒乾隆二十六年題請表建坊於宅旁之衢三十七年季堂爲江蘇按察使具疏請贈氏夫長學贈通議大夫氏贈淑人

甘氏 三橋保張玠妻年二十守節孝姑撫嗣子爲鐸義子爲錯俱諸生年八十四卒乾隆己亥坊旌

郭氏 字黃龍塔儒士胡攻攻未婚歿氏辭父母臨夫喪即留事翁玠先己置妾遺腹

生男氏曰夫有後矣撫之成立守貞四十七年邑令袁州縻旌曰玉質冰心

扶氏 金井冲儒士李郁妻乾隆二年夫歿氏年二十五撫二歲孤婚而妖復立嗣亦妖氏投繯死年五十四

李氏 高徐寺保余天章妻乾隆二年夫歿氏年二十遺孤旋歿力貧孝事孀姑寢食不離側及卒葬即自經死年二十九邑令徐伉詳撫軍給匾旌之

張氏女 大化廟保人幼字湖廣教諭鄧備五之孫璜未婚而璜歿女年十八欲往守志父母不允遂自刎死乾隆十三年里人爲立烈女碑

魏氏女 張朱寺保監生易之女幼字訓導徐宗義之子蛟乾隆十四年蛟歿氏十九聞之自縊母覺救蘇絕粒三日而歿

胡氏 高徐寺保彭琳妻雍正元年夫歿氏年二十二苦節奉撫姑二子成立邑令汪槐匾旌之卒年七十四子獻廷孫鑑古大定俱入太學乾隆五十年旌

錢氏 華林河保張顯志妻康熙三十八年歿氏年二十三撫半歲孤成立邑令廖世德匾獎之卒年五十九

仇氏 吳褚寺保梁涓妻康熙五十六年涓歿氏年二十八苦志撫子成立邑令薛景珏匾獎之

孫氏 儒士李習白繼妻年二十五而寡撫前室女二與已出周歲孤耀時教育無異視耀時生子僅逾歲又歿氏與媳陳氏同撫弱孫以長邑令朱溶匾旌之

吳氏 大化廟保金乾妻乾隆二十四年夫歿氏年二十五孝奉媪姑撫幼孤及夫兄女弟遺子教育備至未幾子與姪繼妖氏立嗣承祀及葬姑與夫兄弟畢遂自縊死年三十七有孝義節烈碑

毛氏 高廟保馮克己妻乾隆十六年夫歿無子氏年二十六夫歿後即自縊死有烈婦碑

張氏 沙窩保儒士李琢章妻年二十五夫歿氏痛哭葬夫畢即投縊死里人哀之

王氏 沙窩保王金妻年二十二夫歿遺孤尋妖孝事媪撫姑夫弟成立遂自經死年五十四

王氏 龍山保庠生章士全妻年二十四夫歿無子孝事翁姑撫夫弟天福入太學立

大山縣志續編
天福子傑爲祠並修祠廟捐田三石入之又修龔家橋年七十四卒

王氏 汪尤冲儒士劉世琳妻貢生乘六女少知書明大義年二十七夫歿苦志三孤成立邑令汪槐匾曰彤史揚輝年六十三卒

何氏 向清城耿昭茂妻年二十八夫歿苦節撫孤成立乾隆三十七年邑令汪槐給匾旌之年六十八

楊氏 仙墩保李化妻乾隆十三年夫歿氏年二十八立從子爲嗣娶媳王氏嗣子歿遺孫亦殤復立從孫爲嗣姑媳共撫成立年六十五乾隆五十一年旌

扶氏 黃龍塔儒士管士成妻年二十無子而寡矢志奉舅姑姑病割股以療州守高鑿邑令徐伉匾旌之以上俱舊誌

光山民風樸野列女以節孝顯者最多茲擇其尤著者錄之由歷年久遠民間多自忘其歲月故僅錄生平之大概而未列其先後之序

王氏 儒士賈煥妻城內人年二十七夫卒撫子敷政成立花翎運同銜官直隸故城縣知縣卒年七十贈恭人旌表入祠

陳氏 庠生易維新妻城內人年二十二夫歿姑病割股救之撫子成立卒年七十二
與弟維鏞妻毛氏並請旌獎建立雙節坊

徐氏 黃龍塔保管廷松妻年二十三夫歿無子氏冰霜勵節孝事翁姑不數年姑卒
其夫二弟俱幼氏力任鞠養撫愛周至及夫弟生子繼煒孩提時即撫以爲嗣厥後孫
曾皆有聲庠序道光三年旌

阮氏 儒士何榮妻城內人年十九夫歿不食數日自經死其夫兄舉人何謙請旌表
節

胡氏 江俊英之孀母城內人自幼通經史明節義年十八未于歸而夫亡飲食不入
口者三日親往夫家守志上事翁姑以孝下撫嗣子以慈卒年六十八旌表入祠

氏 儒士聞慎儀妻年二十八夫卒遺二女一子家貧事姑以孝聞卒年八十餘旌
表建坊

萬氏 儒士潘恢玉妻城內人年十八夫卒守節四十二年請准旌表

劉氏 優貢楊登甲妻城內人年二十三歲夫卒守志至六十一歲請准旌表

曾氏 曹鳳翔繼妻年二十四夫卒守節至七十二歲卒請准旌表

曹氏 從九程仁爵妻年二十六夫卒守節四十四年卒請准旌表

董氏 鹿嘉賓妻城內人年二十夫卒守節五十二年卒請准旌表

郭氏 曾慶善妻城內人年二十八夫卒守節四十二年請准旌表

徐氏 毛學容妻城內人年二十二而寡守節至七十歲卒請准旌表

熊氏 武生毛羽翱繼妻城內人年二十三夫歿守節六十八歲卒請准旌表

楊氏 程煌妻城南關人年二十八夫歿守節至七十二歲卒請准旌表

氏 張綸妻城內人年二十四夫歿守節至六十三歲卒經河南學政歐陽題獎節

孝賢慈匾額

李氏 文生甘澤遠妻城內人年二十五夫歿守節至六十八歲嗣子爲請旌表

曹氏 武生胡駿聲妻城內人年二十八夫歿撫孤成立卒年六十八請准旌表

劉氏 徐作霖妻年二十四守節近支強霸忍而不校及夫三弟一鶴領鄉薦皆思報

復氏 日前日讓人今日更宜讓人勿一舉欺壓人也壽七十餘請准旌表

戴氏 郭珊妻年二十八夫卒守節四十四年進士黃天相爲請旌表

張氏 郭景泰妻夫卒無嗣捐椿樹店庄田二十石建張郭堂奉佛誦經今改名張郭寺(爲地方公廟)

王氏 張文光妻年十九夫卒善事翁姑立姪爲嗣至二十七歲翁姑俱歿子漸成立氏以志願已畢自經而卒

李氏 楊開選妻年二十於歸逾年夫以貿易被匪害氏聞之飲藥而卒

陳鳳姐 許字楊姓年十八楊氏子死鳳姐聞之投水而歿

徐氏 任多立妻年二十四而寡守節四十餘年捐產入祖祠婿曹履中貧不赴試氏助資勸行中咸豐壬子鄉試請准旌表

呂九姑 呂暄樵之女性純孝二歲生母見背哭泣以血隨父分巡陝南嫡母又逝痛不欲生父力慰之及父病女侍湯藥嚙指血書疏禱以身代至父卒仰藥死陝撫題請旌表入本邑節孝祠舉人王慶盜撰文刊碑豎節孝祠內

余氏 儒士夏拜善妻年二十六夫卒氏殉夫自縊請准旌表建坊入祠

屈氏 儒士王正靈妻年十九夫歿遺一子方周歲撫之成室而卒媳劉氏年二十四

遺一子旋殤

劉氏 立姪孫爲嗣先卒年四十六屈氏卒年八十二均請旌立碑

氏何克敏妻年二十二夫歿遺一子撫之成立卒年七十七邑令水安瀾爲題松操

鶴算匾額

傅氏 李敦富妻年二十二夫卒遺一女俟夫入歛後乘隙自縊以殉

羅氏 佐職劉大鶴妻從夫官遊於川年二十一夫卒氏子身異地典衣葬夫襁負孤

子還鄉甘貧守節卒年七十六

徐氏 余欽妻年二十二而寡撫一子成立入邑庠卒年八十三請准旌表

王氏 侯選縣丞曾常春妻年二十五夫歿訓子普思貢生慕昌庠生卒年五十七請

准旌表

郭氏 曾約之妻年二十六夫卒無子氏痛哭不食而死

儒士王明典妻年二十三夫歿無子仰藥而死

監生劉令模繼妻年二十二夫歿無子飲藥而死

儒士雷忠顯妻年二十二夫歿兄弟俱無以孤身經理喪葬爲翁姑建立墓碑

事畢自縊而死請准旌表

彭氏 范之棠妻夫病篤氏先吞金而死是日夫亦同歿時年二十一請准旌表

湖北府經歷曾鴻之女年十六母病割股和藥以進母卒不起女哀痛過甚創發而卒請准旌表

高氏 程瑤妻年二十五夫歿遺一子一女紡織供子讀書入庠食餼卒年七十三請准旌表

鄔氏 程立朝妻年二十一而寡立夫兄子文治爲嗣娶婦吳氏三年文治卒遺一子章瑞姑媳同撫成立後生四子長恩中由附生報捐官直隸靜海縣知縣恩中子世謙由縣丞過班官河南西平縣知事鄔氏卒年九十六吳氏年九十一均請旌表

胡氏 程文林妻年二十一夫卒遺子章臺娶婦阮氏生一子章臺又卒氏教孤孫炳華成立入庠食餼炳華子世助孫雲耕均入泮胡氏卒年八十請准旌表

唐氏 彭太乙妻年二十三夫病氏割股以治夫卒遺二子撫之成立年六十六卒請
准旌表

廖氏 彭士杰妻年十八夫卒絕粒泣血至六日引繩自盡以殉

李富女 名良玉幼受張姓聘及長痛父母無嗣懇父辭聘矢志孝養至父母相繼卒女
以禮葬刊碑誌墓立姪續祀

李氏 魏有禮妻年二十三夫卒遺一子名潔娶媳李氏年二十四潔卒遺子元弼與
姑共撫之均請旌表

袁氏 儒士朱補妻年二十九夫卒撫遺腹子鼎銘成立手創田稞數百石卒年六十
五巡撫錢鼎銘題贈勸節撫孤匾額

孫氏 文作雍妻年二十四夫卒撫遺腹子依舅氏以居子復不祿媳何氏年二十六
與姑共撫遺孤兩世節操請准旌表曰寒谷回春孫氏卒年六十

王氏 文坤妻年二十七夫卒以遺孤託堂兄庠士紀之撫養時當雪窖冰天裹絮自
焚而死紀之取子功粉骨碎身全不顧要留清白在人間之句以輓之旌表入祠

陳氏 彭錫銀妻年二十二夫歿遺一子未週歲撫之成立卒年七十請准旌表

黃氏 陳義良妻年二十二夫卒誓不欲生適有遺腹方產絕口不食以殉請准旌表

周氏 羅于天妻年二十三夫卒遺子數歲撫之成立年六十卒夫二弟自天娶闕氏無嗣納妾王氏亦無嗣年俱二十四而寡闕氏卒年五十七張氏卒年七十三夫三弟受天娶曾氏年二十五而寡子數歲撫之成立一家四婦皆青年守節邑令敬禮之表其閭曰一門四節孫秉鉞恩貢生

恩貢生李豐培之曾祖母王氏祖母李氏母陳氏及其嬪相繼守志當時稱爲一門四節並受旌表邑令周炳璜題獎節孝匾額

闕氏 廩貢生文璧妻年二十七夫歿無子絕粒不食而死

羅氏 儒士文立妻年二十三夫卒撫遺孤成立請准旌表

文氏 葉道達妻年二十夫卒遺親隣積券六百餘串氏悉焚之概不索討撫遺孤成立壽七十餘

曹氏 劉漢臺妻年二十夫卒遺一子方周歲教之成立入邑庠卒年七十四請准旌

表

聞氏 陳廷杰妻年三十夫卒遺二子次子熙亦早卒媳劉氏年二十六遺孤方五歲同姑撫之成立請准旌表合建節孝坊

張氏 陳燁妻習書知禮年二十九夫歿遺二孤聖經聖膺皆襁褓氏節哀忍痛孝事姑孀撫孤成立其長子經出承夫仲兄祀其子膺又壯歲歿僅遺一孫寡婦傅氏年甫二十有七氏雖年老猶勤勞如初惟傅氏能先事承志曲盡孝道而喪子之痛爲之稍減故閭里交稱其賢而謂其婦亦大有姑氏風云張卒年八十五傅卒年八十九光緒年旌獎

劉氏 陳烜妻年十九于歸二十九夫歿遺孤金寬甫十齡持家教子備極勤勞而心慈好施與族黨交口稱賢卒年五十有八同治四年旌表建坊

曹氏 陳聖書妻年十九夫卒立姪祖溥爲嗣祖溥生父聖誥亦卒生母孔氏年二十二溥一身雙祧以母教入庠食餼曹氏卒年七十七孔氏卒年七十九均請旌表

謝氏 傅仁妻年二十七夫卒遺子八歲外家及隣近迭佔祖塋氏爭訴經官斷明歸

業教子書林入邑庠卒年七十二旌表建坊

吳氏 孝廉扶亮采祖母年二十九而寡撫孤成立卒年七十七旌表建坊

沈氏 邱信妻年二十四夫歿撫孤成立五世同居卒年八十八邑令耿育仁題旌冰

清霜潔匾額

張氏 胡澤孚妻年二十四夫歿誓以死殉乘隙閉戶自縊

周氏 陝西候補通判李廷祥妻年十九而寡氏翁方任鎮安縣知縣越二年翁姑相繼歿氏扶三櫬歸葬於鄉越二千餘里辛苦備嘗人多哀之立姪成嗣卒年七十旌表

建坊

齊氏 劉金模妻年二十三夫卒痛夫無子飲鳩以殉族人爲之立姪以承祀

張氏 胡宗玉妻年二十七夫歿遺二子俱殤立姪緒縉爲嗣卒年九十旌表入祠

鄒氏 胡應昌妻年二十夫卒無子日夜號泣不食數日飲毒而逝

李氏 吳蔭南妻年二十餘夫歿立嗣之泮甲子舉人卒年七十餘旌表入祠

劉氏 儒士孔慶中妻年二十二夫歿立夫姪照離爲嗣入邑庠娶媳傅氏年二十二

而寡遺一女立

李氏 姪祥至爲嗣娶媳年二十三而寡遺一子撫之成立劉氏卒年七十二傅氏卒年七十五李氏卒年六十一門三代苦節照離女適熊先第爲妻年二十一省母遇匪不屈被害四人並請旌表合建牌坊孔繁支妻傅氏年二十餘夫歿撫孤子祥臨入邑庠亦註名坊內

薛氏 彭善揚妻年二十餘夫卒無嗣親視入殮蓋棺後即自縊以殉

李氏 彭康國妻年十九夫歿立姪爲嗣痛不欲生因母家父母俱逝遺弟乙未翰林之釗尙未授室勉爲經理婚事畢歸家飲毒以殉

張氏 彭康治繼妻年二十二春季于歸及秋夫卒氏仰藥以殉

程氏 汪文燦妻年三十夫歿遺孤方百四十日撫之成立卒年八十旌表入祠

鄒氏 汪本茂妻年二十餘夫卒遺二子撫之成立卒年六十一河南督學何金壽題
獎節孝堪風匾額

文氏 儒士李錫祉妻年二十四夫卒遺子女各一氏爲人仁孝慈祥深明大義夫兄

錫齡無嗣氏以孤子兼祧撥私有財產以綿禮祀咸豐丙辰歲飢酌量賑濟得以全活者數十家族間貧不能娶藉給貲以成室者二十餘人村北劉義橋係南北通衢坍塌已久光州刺史孫公過此騎陷命地方重修紳董難之氏捐千餘金以成其事至今行人稱便鄉紳議建碑頌德氏力辭之卒年九十二邑令請旌褒獎命建專祠奉祀子德山候選州同

林氏 張之泉妻年二十七夫卒遺子三歲撫之成立氏有妹無依歲給谷五石以供之兩姪家中落氏爲之計出納畢婚嫁近村遭回祿百口待斃氏給薪火蔬菜俾被火者得所依倚光緒四年飢氏捐銀五十兩十四年河決鄭州流殍無算氏又捐銀二十兩至於隣里之沐其恩惠者指不勝屈卒年八十旌表建坊孫仁村入邑庠

林氏 張寶槐妻年二十八夫卒遺一子爲人傭工以完節守旌表入祠

駱氏 李鑰妻年二十九夫被溺死遺腹四月甫生卒年八十八旌表入祠

蔡禮女 幼字徐河爲妻年十一河病故禮擬另聘女截髮自誓私賦於歸前一年翁卒後三年姑卒又十年立堂姪爲嗣冰霜勵節卒年七十餘墓立烈女碑以表之

熊某女 幼字老崗保陽某爲妻及婚期聞夫卒時女方織神色不變至夜不食亦不下
機俟父母寢後割機布自縊以殉經官紳贊許合塚建碑立廟祀之進士熊起礪撰聯
云神真視死如歸想當年閉戶投繯浩氣已驚星斗落人莫貪生滅義看此日圖形塑
像墳泥猶帶麝蘭香廩貢晏兆平亦撰有祠聯云問婦德何如地有崇祠留正氣看人
情反覆天教女士愧男兒

黃氏 彭作煌妻年二十二夫卒無嗣氏親視含殮後自縊以殉

李紹秀 庠生李春耀女紹秀性柔志烈幼時見其姊嫁京官呂鍾三子遇人不淑後父
母及伯叔屢爲紹秀擇配紹秀決志不從父母故後三十餘年未出閨門一步其父易
篋時以薄產遺紹秀作贍養之需囑弟映長照料映長亦視紹秀如己出年逾七十卒
易楊氏 庠生賢良妻年二十五夫歿遺一子敬昂氏矢志守節撫孤光緒甲申經刑部
主事熊起礪爲請旌表卒年七十

易張氏 儒士敦重妻年二十四夫歿遺一子敬康氏守節撫孤卒年六十八光緒甲午
年旌

傅易氏 牢山敬恩妻年二十五夫歿遺三子事翁姑至孝卒年七十七光緒十五年旌
吳氏 金德楊妻年二十四而寡守節勤苦事姑至孝立姪士會爲嗣卒年八十一光
緒三十二年旌

殷氏 牢山熊述讓妻年二十五夫故無子苦志守節孝事翁姑立夫兄子承恭爲嗣
卒年八十三宣統二年旌

陳氏 牢山庚寅進士江蘇浦縣知縣熊兆姜繼室年二十五夫卒於任所氏親視含
殮後即一痛而絕

彭氏 牢山殷襄妻年十九於歸二十歲夫歿無子孝事翁姑立夫兄子元壽爲嗣逾
年送夫葬後即以身殉請准旌表

何氏 潑陂河毛翼三妻年二十二夫歿守節咸豐間旌

劉氏 潑陂河武生郭含愨妻年二十三夫歿守節卒年四十光緒辛丑年旌表有碑

彭氏 寨河里戴元善妻青年夫歿守節旌表節孝建坊於潑鎮南門外通衢

張氏 潑陂河韓元俊妻青年夫歿守節同治間立碑

劉氏 潑陂河王世興妻青年夫歿守節道光十六年旌

黃桐姐 寨河里黃榮炳第三女事實失考宣統元年旌表節烈入節孝祠

李氏 石尤壩保黃彩妻年二十夫歿孝事翁姑立姪爲嗣卒年六十九旌表有碑

裴氏 石尤壩保楊永美妻年二十二夫歿守節旌表有碑

鄒氏 石尤壩保李林儒妻年二十二夫歿氏以身殉遇救未遂終以憂疾卒時年二

十六歲旌表節烈有碑

李傅氏 清秤河保李敦富妻年十八于歸二十二夫歿無子氏以身殉

沈氏 庠生金士杰妻年二十五夫歿矢志守節孝事翁姑教養二子壽昌入邑庠漢

昌歲貢生曾經旌表

蔡程氏 羅程店儒士蔡宏連妻孝事翁姑年二十二夫歿無子苦守貞節請准旌表立

節孝碑於通衢

劉氏 興隆畝保夏德齡妻年十九於歸方一年德齡遘疾自知不起謂氏曰爾來日

淺又無子嗣我死毋鬱鬱居此誤爾終身氏慰且誓曰婦人之義從一而終強顏改節

此禽獸之行脫有不諱決不自穢以辱門戶未幾齡沒氏毀裝縞素思以身殉其姑窺知其意百端解勸且以翁姑年老無依相責氏於是強起理家務繼族子爲嗣事親教子盡孝盡慈茹蘗飲冰四十餘年鄉里稱爲眞節孝云

楊氏 山河保陳鳳翼妻年二十夫病故奉親撫孤以節孝終

胡曹氏 南關保儒士某之妻年二十餘而寡遺一子名希賢苦節撫之成立娶婦吳氏不數年希賢又卒僅一孫在襁褓吳氏亦苦節撫孤如其姑人稱雙節

李孔氏 張朱寺保李林峰妻早寡事姑以孝勤於教子動有禮法苦節四十年當時以爲女宗

夏詹氏 通稽保夏德仁妻年二十二夫歿家貧遺孤方稚以紡績自給撫之成立

許氏 通稽保易天保妻年二十三夫歿甘貧撫孤旌表入節孝祠子易圖歲貢

蔣氏 通稽保潘信楨妻於歸年餘夫歿遺一子纔逾月矢志守節撫孤成立

胡氏 下灣里胡心柏女年十八適千斤保邱輝蔭于歸僅四月夫歿無子立夫姪大

旺爲嗣奉姑教子苦節數十年以壽終

楊氏 牢山保曾立信妻年十八於歸逾年夫歿無子矢志守節立夫堂姪天柱以延

夫祀

詹楊氏 三里鎮保儒士詹鎮基妻年十八歸詹明年夫歿遺一子僅月餘守節終身撫

孤成立

何氏 任香山妻年二十而寡苦節教子鄉里稱賢

仲氏 向清城保周恒清妻適周兩月而寡無子立夫姪保仁為嗣為之娶婦數年而

保仁又歿遺孤孫世馨氏撫之成立以繼宗祧年七十五卒

楊氏 清科河保楊宜女年十八歸同保鄒雲山至二十二而雲山卒遺一子在襁褓

寡無次丁氏上事翁姑下撫孤子克勤婦道人無間言

李劉氏 儒士朝清妻年二十四清遭危疾當彌留時顧氏曰我無兄弟二親衰老不幸

不能事奉爾能代我終養吾目瞑矣氏曰此我應盡之責誓不以生死異行未幾清卒

歷三月始生遺腹子玉山氏事親撫孤倍極勤劬人有憫其勞者曰吾恐無以對吾夫

也卒年六十有六

尹氏通稽保民周宗保妻年二十六夫歿遺一子正身僅數歲家極貧仰事俯畜惟氏一人是賴及子長娶婦岳氏年二十而正身又歿無子岳感於其姑之苦節亦矢志共守立縱堂姪大德爲嗣皆稱周氏雙節婦

張氏清秤河保金益妻年二十三夫歿守貞終身請准旌獎

阮氏清秤河保金十敏妻年二十三夫歿矢志養親撫孤苦節數十年請准旌獎

無名女同治時遇捻匪於文殊寺匪執女手女毒罵之匪剖其腹而死

盧羅氏盧吳氏妯娌同避匪亂遇匪逼之同罵賊而死

朱建姑朱秀姑同時遇匪恐被污辱均投水而死

甘吳氏樸風里甘縉妻年十七于歸夫婦和好僅二年縉病歿氏痛不欲生其姑曰吾

老廢子死無依孤孫誰恃爾當勉爲其難毋徒以一死塞責氏聞姑言即節哀操家務

仰事俯畜曲盡其道終身自甘勤苦至今人恒稱道之

胡氏夏陵山保蘇國曉妻年二十三夫歿遺子廷楷僅數歲氏躬理家政午夜操勞

無間寒暑以政家道日興稱素封焉族黨無不高其節而頌其才

杜氏 張朱寺保鄒國仕妻年二十二夫歿苦節六十年請准旌獎

沈氏 向清城保魏元善妻年十七歸魏其姑以年老有肝火疾喜怒失常少不遂意輒肆詈罵或鞭打及之氏小心承順日惟負罪引慝無幾微怨恨之色見於顏面年二十夫歿遺孤豐泰又弱多病氏事姑撫子其拂逆痛苦有爲人所難堪者而氏卒能上格親心下全弱息迄今父老談其軼事聞者莫不爲之酸鼻

甘氏 三里鎮保民張瓌妻年二十夫歿遺一子天堂姑年衰病痺痿舉動需人氏不以有娣姒推委起居飲食獨力任之又娣姒往往以錢財細故相口角氏惟以家事爲重而房無私蓄以故一家感愧稱和睦焉同時瓌有族弟張琳妻朱氏年二十六夫歿姑老子幼氏奉姑盡禮教子有法苦節數十年與甘氏媲美至今人猶豔稱張氏雙節

胡氏 興隆畝保何家樂妻年二十二夫歿家貧親老子幼又值咸同時兵戈四起烽火頻驚氏以一婦人幹旋其間雖屢幾於危而節操益勵卒能化險爲夷莫不曰天佑善人焉後其子恒祥殿祥皆成立有時望請准旌表

曹氏 何小軒妻歸何未幾小軒歿無子矢志事翁姑一日姑遘疾勢極危氏剖股烹

以進姑旋愈其翁松滋縣知縣經軒爲之請旌建坊

張氏 上庠士張光泰女幼聰穎嫻母教工書算尤熟孝經論語女四書年二十一歸孔鼎臣二十七育子慶尊甫八月而鼎臣卒氏悼喪所天誓以身殉水漿不入口者累日親隣責以養親撫孤延祀大義始稍稍食息飲泣毀裝孝事翁姑翁姑爲減喪子之痛撫育遺孤雖視同拱璧及成童授學未嘗稍事姑息間一寒暴則相對垂泣輟飲食慶尊職此刻勵奮發弱冠補博士弟子員旋食廩領習法政供職湖北直隸河南政績卓著有聲法界皆氏所焦心嘔血以成之也光緒丙午題請旌表卒年七十有四

李氏 楊如樟妻年二十三夫歿無子遺一女僅周歲矢志守節翁某憐其齒稚無依諷使再醮氏曰貧苦命也烈女不更二夫議遂寢逾年其夫仲兄如栲將以強暴奪其節氏微有聞袖利剪有犯則刺喉以全志如栲悚息又欲秘死其女以絕氏望氏知不可久處寄居母家十餘載女及笄始返母女紡績自活女歸戴綬緜光緒戊戌其塔爲請旌表年七十五卒

詹氏 張映奎妻年二十夫歿無子痛不欲生既念翁姑無依忍死孝養越數年翁姑

相繼卒喪葬後氏曰吾事畢矣遂自經以殉

程氏 金翰林妻年二十二夫歿撫孤守節卒年七十六曾受旌表

饒氏 王家訓妻青年守節嘉慶間旌表

王氏 李謙妻青年守節道光九年旌

李氏 王澤長妻青年守節道光九年旌

羅氏 黃萬億妻青年守節道光十三年旌

徐氏 任多立妻年二十八夫歿無子立姪嗣夫後咸豐乙卯年旌

毛氏 任蕙芳妻年二十八夫歿守節事姑孝教子嚴以子貴封宜人同治甲子年旌

彭氏 任作立妻夫早卒立子雲芳方四歲氏守節教子雲芳英年入泮娶婦丁氏生

一子而雲芳卒越一載孫又夭姑婦二人形影相弔而守志彌堅邑宰爲請旌表

栗氏 任鼎立妻年二十夫歿遺孤矩芳甫六月氏教養成立苦節四十餘年邑教諭

李鶴山爲請旌表

彭氏 李鍾琦妻年二十夫歿無子繼夫兄子鴻臚爲嗣氏孝事翁姑延師教子嚴慈

交至以故鴻臚弱冠卽補博士弟子員光緒間旌表卒年九十有三

裴夏氏 年二十歸正安里士人裴思祥逾年生一子名本相未周歲思祥病歿時值捻匪肆虐廬舍爲墟乃攜孤依外家以居雖顛沛流離猶以紡績餘蓄送子入鄉塾令無墜先人門戶後子稍長攜返故里命之半讀半耕本相隨改業經商家計日裕氏常教之曰汝生而孤親近無可依宜勤奮謀自立講信義明愛敬是立身之本稍有餘力扶危濟急不可緩也子婦冷氏亦能尅盡孝道氏卒於清光緒十六年享年六十有四臨沒時猶諄諄教其子敦品行善勿喪民國五年會匪陷城大軍到奉上峯痛剿之令將有玉石俱焚之禍人爭逃避本相獨出身犯難支應大軍陳說匪情獲減死者極衆自以爲乘其母之遺教不敢不出於此也本相事見義行

雷氏 儒士熊啓復之妻夫早歿遺孤考祥嘉祥家道中落不絕如縷氏青年守志撫孤藝桃自活操持撙節家計漸裕子長訓以耕讀曾孫起礮宦京師請諸朝邀旌表如例迄今桃園之名尙存人比之古懷清臺云

熊氏 李上言之妻年二十二夫歿家貧氏茹苦守志撫子殿鈞殿益殿珊均成立卒

年八十有四計守節六十三年

熊氏 李承珠之妻年二十六夫歿家貧苦守撫子世珍成立卒年七十二

晏氏 儒士方錫纓妻年十八夫歿無子立子方淇未終養而死守節六十餘年族黨

稱頌光緒二十年旌

孔吳氏 癸卯副貢繁麟妻年二十四夫歿無子遺二女氏矢志守節年五十三卒

孔晏氏 儒士繁昶妻年二十一夫歿無子遺一女守節事姑及姑卒氏殉焉時年才三

十七

胡戴氏 太學生胡智元之妻湖南郴州知州禮箴長媳母氏同邑戴師木徵君第三孫

女也道光三十年於歸胡氏於郴州官解時二十一歲次年髮匪陷郴翁死難氏倉皇

遁歸家無長物越二年智元病故氏年二十四遺一孤周歲全賴氏十指爲生值匪難

流離受盡艱窘氏優文翰卒能教子信孚成立年五十八終

耿氏 李紹堂妻年廿七夫歿家貧勤苦自勵教子讀書成名光緒廿七年旌表節孝

民國九年大總統題褒志潔行芳卒年六十九子化材陸軍測量畢業授陸軍測量長

曾氏 邱士瑩之妻年二十五夫歿家貧子銘經甫二齡氏矢志撫孤成立卒年七十
七計守節五十三年

中華民國

姚氏 萬譜妻年二十五夫病數月氏割股療治未幾夫卒遺孤方三月並夫二弟三
弟皆無之成立二弟燹娶妻黃氏年二十五而寡三弟詒娶妻王氏年二十九而寡均
以苦節稱經部給褒揚姚氏經大總統獎給褒章題額節勵松筠

徐氏 馬鳳瑞妻年二十六夫歿撫子鳴題娶媳范氏年二十三而寡遺子秉鐸中校
畢業經大總統獎給褒章

馮氏 李乃嵩妻年十九而寡未一年哭泣以終其夫弟乃嶽妻馮氏年二十五而寡
均經大總統題獎褒揚

李氏 周世增妻好善樂施仁慈出自性天姪輩孤幼無依者撫養如已出凡親族有
貧不能舉火或婚喪無力者一經告貸雖典珥質衣亦盡力相助於是賴以全活者衆
民國九年大總統題褒任卹可風卒年四十二子寶忠法政畢業

祝氏 馮國均妻夫歿後撫孤苦守四十年如一日歿時年七十一歲鄉里爲之立碑

文曰賢孝可風

汪許氏 年十七歸汪百奎逾年舉一子名作炳方周歲百奎病故時值捻匪披猖上無翁姑又鮮兄弟於族惡及保甲土劣視孤寡爲可欺百方凌逼乃攜孤依外家避其兇焰鳴官伸理訟累至二十年之久得縣令周公明斷先後懲諸不法羣小始斂跡是時匪亂久平孤子已完昏慶抱孫矣子婦氏盛頗盡孝道方欣家道重興昊天不弔孫承助甫六歲而作炳又不幸物故氏忍痛慰子婦撫養弱孫又自傷命薄非飲食惡衣服節損衣食之餘資調濟貧苦之親鄰曰吾以是爲弱孫祈福聽耳子婦盛亦能體姑之心延師教承勛成立承勛後歷充里董財務局長家運熾昌氏卒於民國十年享年七十有六

譚氏 沙城里謝桃源謝天賜妻年二十六夫歿遺一子方三歲越三月亦殤又三月生遺腹女後適晏立夫兄子以嗣夫後氏性孝慈事親教子各盡其道至今鄉里稱之
民國二十年卒享壽六十五歲

邱氏 大學生熊先峻之妻事翁姑以孝聞年三十而寡撫子緒倫成立法政專門畢業卒年六十四

戴李氏 清儒士戴側齊之妻年二十三歲於歸戴氏二十五歲夫故無子後立其夫弟之子敦常嗣之戴故族中落貧無立錫地氏守節撫孤教養成立其茹苦含辛有非言語能盡者民十鄉人爲之請旌蒙大總統題節勳松筠匾額褒之年六十九終

列女傳 (下)

余嘗讀史至歷代亂亡之際痛人民橫遭慘禍竊疑天道之無憑及讀文文山正氣歌精神又爲之一振正氣者天地剛毅之氣也無道之世挽回世道人心全賴乎此當天下有道中和之氣彌綸天地百官得其職萬事得其理民安國泰正氣即寓於中和天下無道殘賊攪播荼毒生民泄泄沓沓如脂如膏之徒從而助之上無禮下無學賊民興而天下遂至於大亂然世愈亂而正氣益顯國特忠臣義士照耀簡冊往往閔閔婦女臨大節而不可奪視死如歸完松柏之貞機兒殘之魄光爭日月氣壯山河非乘乾坤之正氣而能若是乎然有此義烈凜凜之婦女而乾坤正氣賴以不墜百世之下聞者猶肅然起敬其有功於世道人心豈少也哉吾於列女傳中故別表而出之以告天下之有心世道者

明

盧氏 光山人適庠士東欽欽父旭以御史謫戍通海卒於途有司錄其家以往盧與欽奉姑行姑亦卒至通海欽從征和泥陣亡有張某者謀娶之盧以死自誓會欽之妹偕夫自海外來張厚賂妹求婚強致聘具盧棄諸門外號哭三日赴海死洪武戊寅七月二十八日也土人爲建祠祀之御史毛鳳詔記其事

孔秋香 白雀園民家女也正德七年流賊掠其鄉遇秋香迫之女怒罵奪刀刃賊賊怒

支解之邑令李昌祭其墓

霍氏女 年十四正德中遇流賊欲污之以爪挖賊目出其睛賊殺之有司爲請旌焉

余氏 順治戊戌進士闕碧霞母也夫隆雲卒教子碧霞尤嚴崇禎十年流寇入境氏被執憤罵賊怒殺之碧霞妻張氏十四年寇陷城亦自殺

呂氏 崇禎丙子舉人劉奇勳妻城陷遇寇罵不絕口入水死其妹適諸生李建元年二十夫卒聞寇急急運甃砌夫棺及城陷抱月餘孤入水死時稱雙節

胡氏 柴嵩山妻年二十五無子而寡矢節事姑惟謹無賴欲奪其節氏以死自誓適有白鴉悲鳴氏曰夫嵩山也當與同歸是夕飲鴆死無賴匿而委之壑隣進士陳闇然慟之白於知縣李謙亨爲塋立碣表之

扶氏女 生員其禎女弟也字繆郎女年十三繆妖詣弔哭以死自誓崇禎辛巳寇襲城不屈死之

董氏 進士廬永妻永知元氏縣卒於任氏像永於庭祀之垂老城陷罵賊不屈死

劉氏 廩生蔡剛中妻中丞學曾女弟也剛中周歲而孤兄毅中撫之成立氏事毅中

及姒程氏如舅姑剛中早卒氏守節撫孤三十年城陷遇寇不屈死於刃姒程氏亦縱火自焚死子璩嘉興教諭

萬氏 訓導幃女適諸生陳允中遭寇欲擁之行氏罵甚厲賊憤殺之

陳氏 儒士徐立妻年十九而寡無子苦節兩臺題獎年八十餘寇陷城死之

喻氏 諸生胡演妻早寡子之杞甫四歲苦節鞠之篝燈課書戶外絕形聲雖內戚不相往來歷二十餘載崇禎辛巳賊熾誠其子曰汝自高曾來五世一身承祧於汝是賴若有變吾義不受辱汝宜善圖之城陷閉樓自焚死及事平之杞每飲時憶前事淚滴杯水盡赤

柯氏 監生張拱妻賊至氏與其姒喻氏約曰有變我兩人義不受辱毋相離也城陷同赴火死

劉氏 舉人扶國鼎妻侍郎克儉子婦也年二十而寡孝翁姑撫孤子城陷自焚死

劉氏 推官胡虞胄妻崇禎辛巳城陷氏懼見辱語婢曰報汝主善撫吾子吾盡吾事

矣赴水死賊退覓其骸不可別識以其衣履樹碣葬之子坦睢州學正

胡氏 諸生吳珽妻訓導胡自清女崇禎辛巳寇至夫妻同被執氏獻貲求免賊刃其夫氏曰吾夫不免寧苟生哉遂觸刃死年二十二

清

萬氏 新椿阪保趙某妻年二十四而寡甘貧撫孤乾隆癸未里有富豪謀欲娶之氏懼其逼因與隣婦訣夜赴水死年二十六

段氏 清秤河保戴伏讓妻乾隆二十年夫歿氏年二十六無子有逼其改適者氏堅志不從遂不食死

黃氏 潘殷沖保林琦妻乾隆三十六年氏年十九有欲污之者氏堅志不從被害邑令汪槐詳請坊旌

馮氏 大河寺保鄭海妻乾隆四十七年歸海逾歲而寡氏年十九翁姑欲其改適氏潛歸母家自縊母覺救甦問之氏云生爲鄭婦死爲鄭鬼願與夫合塚竟卒

饒氏 羅以宏妻年十六于歸同治時有匪驟至氏與姑南走畢家店遇匪牽氏去姑強持氏手不釋氏泣請姑去竟罵賊而死一時文人學士哀輓連篇舉人文鶴鳴爲撰

碑銘稱其與常山秀實爭烈

羅氏 陳大勛妻咸同間氏年二十歸寧遇匪曳之去氏罵賊不從匪以鎗刺其腹時氏有孕腹破其胎猶動聞者憫之

陳氏 彭士某妻年十八於歸被匪捉去憤不受辱極口罵匪匪割其唇舌至死罵不絕口

鄒氏 趙子純妻年二十於歸被匪捉去義不受辱乘隙跳山岩下觸石而死

德姑 陳國政女遇匪於途逼之罵匪支解而死

羅李氏 同治時匪入其家女執刀殺匪知匪衆難免禍自刺而死

舒氏 李尙志妻及李承培母李祖培母廩生李映青祖母府經李選青祖母咸同間捻匪入境恐見辱均自縊而死

氏 楊玉和妻年二十二夫歿適捻匪入境投水死

氏 附貢王槐清母廩生王駿烈祖母及王玉珞妻王槐清妻同治間一路遇匪見逼近恐被辱均投水死

陳琨姑 花揚保陳鍾泮女同治時匪竄鄉村合室逃避女恐被辱赴附近之蕭家窪塘而歿邑人撰文刊石有七律云伯姬聞寇動猖狂無可如何赴水亡白玉恐污全大節紅塵不染別高堂魂歸天上星辰燦骨葬人間草木香不待龍章頒寵錫刊碑詩句自芬芳

閔氏 張寶稷妻張之宗妻高氏與媳李氏同治癸亥洪楊軍破虎頭關恐爲所辱悉投龍潭水死

唐氏 汪啓芝妻年三十值同治癸亥洪揚之變氏抱幼子隨姑與長子避之見逼近恐不免又恐遺幼子以累姑因抱幼子投水死夫堂兄汪啓傑妻彭氏年二十九亦同時自縊

盛余氏 余明盛之女也年二十適儒士盛文錦三年夫歿欲以身殉宗人爲之立嗣親戚勸之防之氏飲食如恒防者稍懈即仰藥而死清宣統元年請旌

夏余氏 余明盛之次女適同里夏拜善夫歿不欲生明盛迎至其家使家人環守女先匿毒於壁一日祈母淪茗匿毒茗中飲之而卒清宣統元年請旌

程氏 儒士盧光鼎妻年二十夫歿遺一子撫之成立民國二年白匪猝至死於亂

何氏 知縣王鍾海之次媳白匪破城被匪逼去罵匪而死

楊氏 陳量博妻年二十五陳量高妻李氏年二十三同時遇匪投水死

老姑 庠生程炳東女暨孫女少姑民國二年白匪至盧家河寨擄去老姑年十六罵

匪被鎗斃少姑年十二投水死事聞大總統題獎匪石心堅匾額建廟塑像於墓後曰

程氏二烈女祠

胡氏 石尤擋保盛運疇妻民國二年白匪破盧家河寨被匪執欲加無理氏毒罵匪

以鎗斃之

何氏 李世勛妻縣西官家岡何月樓之女也長適西門外破樓村李世勛夫耕婦饑

有相敬如賓之風岡里咸敬之民國十八年股匪王太攻城該村被蹂躪世勛被擄遇

害何氏聞變立投水死年二十七

李氏 清翰林李之釗女歸清度支部主事彭端之次子振璜育二子一女而振璜卒

氏代夫事親撫孤各盡其道民國二十年赤匪橫行氏隨翁姑避居大福寨夏四月初

匪率衆圍寨環攻其翁雖領導丁壯竭力守禦卒以城孤無援求救不應慘於二十七日辰七點被匪攻陷死數千人氏全家遇害僅其夫十齡弱姪由僕人化裝匿出匪留氏及其十三歲幼女禁閉暗室中氏念生不如死又念身死遺幼女何堪因呼女跪膝前同死完貞解紮腳帶纏女頸數匝女負痛曰死本情願不違死痛難挨氏聞之心傷手顫不能爲力鬆帶伏地飲泣竟夜暈而復甦者數次迨黎明日事急矣不速死恐無及乘女睡未醒復解裹足布再纏女頸以一端繫屋柱自執一端閉目猛拉移時女畢命氏不暇哀哭即另取一裹足布懸樑自經死嗚呼觀氏母女慷慨就義其節烈可風其慘悽可憫哀哉

余氏女 正安里余園子余國先之女生不茹葷矢志不嫁依母居數十年不出閨門一步民國二十年共匪陷光南女感於滔滔苦海誓不再生遂投水死年五十

胡管氏 管善堵女于歸逾年夫歿無子夫弟尙幼無可繼嗣者值共匪據縣南家人陷焉氏託浣衣赴水死

郭曾氏 郭家河郭永城之妻新集曾壽門之女也十九年携二子一女避匪亂居新集

十二月二十二日城陷凡舊家眷屬匪一律解回後防曾氏在押解中二十四晚抵胡子石村同時被解者百餘人共禁一室適該村有族姊家勢中落匪制無資產者有發言權乃姊說匪邀宿渠家進夜餐氏從容就食及夜涼人靜暗赴門外水塘投溺比天曙尸浮於水而匪始知匪去乃姊收葬於村傍

人物志

游寓傳

人之爲人或富貴顯榮而身死即與草木同腐或鸞泥鴻爪數千年之後猶修談爲鳳止麟遊誠不以富亦祇以異光之爲光曾宦於斯十而人不知其姓名者不知幾千百人若孟嘉蘇軾之流一釣一遊至今猶令人景慕不已則夫人之可傳於後世豈非在富貴功名之外耶從可知作志而紀游寓不僅爲山川生色也明矣

鄧

鄧

鄧 字君章汝南平人也年十二居喪過禮及長理韓詩嚴氏春秋天文曆數王莽時寇賊羣發鄧謂人曰方今鎮議熒惑並在漢分裂軫之域去而復來漢必再受命西至長安上書王莽曰漢歷久長上天垂戒今就臣位轉禍爲福若人怒收繫詔獄會赦得出建武三年平盧江遇將軍傅俊徇揚州禮爲將兵長史授以軍政鄧諫俊親率士卒收傷葬死哭所殘暴從之百姓悅服所向皆下

俊還京上論之鄧恥以軍功取位辭歸鄉里久之太守歐陽欽請爲功曹時臨享禮欽教西都督鄧繇延受賜鄧於下坐接延貪邪罔卜歛色慚不譏而罷鄧歸府稱病居數月乃去從鄭敬止弋陽山中漁釣自娛鄧志在從政旣乃喟然而嘆謂敬曰天生俊士以爲人也烏獸不可與同群子從我爲伊呂乎將爲巢許而父老堯舜也告別而去客居江夏教授郡舉孝廉爲上東城門候帝嘗出獵車駕夜還鄧拒關不開帝令從從者見而於門問鄧曰火明遠遠遂不受詔帝乃迴從東中門入明日鄧上書諫賜布百疋貶東中門侯爲參將封尉令鄧授皇太子韓詩侍講殿中再遷長沙太守（後漢書）

鄭

鄭

鄭 敬 字次都汝南人清志高世閉門不修人事新遷都尉逼爲功曹廳前樹有清汁以爲甘露敬曰明府政未能致甘露此青木

汁耳辭病去王莽時寇發與同郡鄧暉南遁蒼梧建武初歸里隱處精學蛾陂中陰就虞延並辟不行歐陽欽爲太守辟爲門下掾時

鄧暉於坐按繇延貪邪歛色慚敬進曰君明臣直功曹言切明府德也欽意少解敬素與暉厚見其言忤欽乃相招去曰子廷爭繇延

君猶不納延今避去其勢必還直心無諱三代之道然道不同者不相爲謀蓋去之乎俾不可敬乃獨隱於弋陽山中（水經注浮光山亦曰扶光山即弋山也今俗稱侯公山）居數月欽果復召延俾乃從敬止漁釣自娛俾在隱居心常慕從政敬曰吾足矣初從生弗重華於南野謂來歸爲松子今幸得全軀樹類遼奉墳墓盡同學道雖不從政施之有政是亦爲政也吾年老矣安得從子子勉正性命勿勞神以害生俾於是別去敬獨隱不出太守來訪敬因折芟爲坐以荷荐肉餽瓠盛酒言談彌日蓬廬草門琴書自娛光武公車速徵不行（纂苑前宗謝承兩後洪書）

孟嘉 字萬年晉江夏鄆人沖默有遠量名冠州里太尉庾亮領江州時部廬陵從事嘉遠都亮引問風俗得失對曰遠傳當問更亮笑謂弟翼曰孟嘉故是審德人也轉勸學從事褚裒時爲豫章太守正旦朝亮亮大旨州府人士嘉坐次甚遠翼問亮聞江州有孟嘉其人何在亮曰在坐卿但自覓冥歷觀指謂亮曰此君小異將無是耶亮忻然而笑後爲杜西桓温參軍温甚中之九日温燕龍山僚佐畢集有風吹嘉帽墮嘉不自覺温曰左右勿言欲觀其舉止嘉良久如側温令取返之令孫盛作文嘲嘉著其坐處嘉請筆作答了不容思文辭超卓西坐嗟嘆嘉好酣飲愈多不亂至於任懷得意融然遠寄傍若無人温嘗問酒有何好而卿嗜之嘉曰公但未得酒中趣耳轉從事中郎遷長史嘉行不苟合門無雜賓每神情獨得使超然命駕常游隣郡西陽縣臨流顧景西情漁釣久之乃歸年五十三卒於家

司馬光 字君實夏縣人父池知光山縣天禧三年十月十八日生於官舍因以光名自爲乳兒加以金銀華美之服輒羞服棄去之年五六歲弄青胡桃欲脫其皮不得一婢予以湯脫之女兒來問脫胡桃皮者光曰自脫也父適見訶之曰小子何得謾語自是不敢謾語凜然如成人開講左氏春秋愛之退爲家人講即了其大旨華兒戲於庭一兒登甕足跌沒水中衆驚棄去光持石擊甕破之水迸兒得活其後京洛開畫以爲圖寶元初中進士甲科年甫冠除奉理郎改大理評事補國子直講龐籍薦爲館閣校勘同知禮院改直祕閣開封府推官修起居注同知諫院英宗立論任守忠大姦乞斬於都市諸新州安置天下快之進龍圖閣直學士神宗即位擢翰

林學士兼侍讀學士光常嘗患歷代史繁人主不能遍覽遂爲通志八卷以獻英宗悅之命置局秘閣續其書至是神宗名之曰資治通鑑自製序授之俾日進讀王安石得政行新法光逆疏其利害拜樞密副使光辭抗章至七八以編明殿學士知永興軍徙許州請判西京御史臺歸洛自是絕口不論事資治通鑑未就帝尤重之以爲賢於荀悅漢紀促使終篇賜以穎邸舊書二千四百卷及書成加資政殿學士凡居洛陽十五年天下以爲真宰相田夫野老皆號爲司馬相公帝崩赴闕臨所至遮道聚觀馬至不得行曰公母歸洛留相天子活百姓哲宗幼沖太皇太后臨政遣問所當先留爲門下侍郎天下引領以觀新政而議者猶謂三年無改光曰安石惠卿所建爲天下害者改之當如揀焚拯溺況太皇太后以母改子非子改父衆議甫定元祐元年得疾詔朝會勿舞蹈拜尚書左僕射兼門下侍郎免朝報許乘肩輿三日一入省光自以言行計從欲以身殉社稷躬親庶務不啻晝夜是年九月薨年六十八贈太師溫國公諡曰文正賜碑曰忠清粹德四方皆畫像以祀飲食必祝

蘇軾 字子瞻眉山人嘉祐二年試禮部主司歐陽修欲以冠多士疑其門客曾鞏所爲宣第二中殿試乙科修語梅聖俞曰吾當避

此人出一頭地以才識兼茂荅對策入三等除大理評事資判鳳翔府治平二年入判登聞鼓院英宗欲詔知制誥韓琦曰軾才遠大要在朝廷培養之曠用適足以累之也乃詔試得直史館熙寧二年王安石執政惡其議論異己以判官告院命權開封府推官將困之以事軾決斷精敏聲聞益遠請外通判杭州徙知徐州湖州事有不便民者不敢言以詩託諷御史李定舒亶撫其表語並媒孽所爲詩以爲誹謗逮赴臺獄錮鍊久不決神宗憐之以黃州團練使安置自新息渡淮過光山遊覽山川所在題詩居久之乃至黃州黃輿光鄰嘗避暑於淨居山今尙有軾讀書堂遺址軾謫居四年量移汝州哲宗立召爲禮部郎中尋除翰林學士兼侍讀人稱便殿宣仁后言卿官遽至此非由大臣論荐軾驚曰臣雖無狀不敢自他途以進曰此先帝意也先帝每頌卿文章必嘆奇才軾不覺哭失聲已命坐賜茶撤御前金蓮燭送歸院三年權知貢舉拜龍圖閣學士知杭州召爲吏部尚書出知穎州徙揚州以兵部尚書召遷禮部兼端明殿侍讀兩學士紹聖初御史論軾譏斥先朝貶惠州安置再貶瓊州徽宗立更三大赦復朝奉郎提舉玉局觀卒年六十六高

宗時贈太師諡文忠

陳 慥 字季常眉州青神人太常少卿希亮之子也少使酒好劍慕朱家郭解爲人閭里之俠皆宗之嘗從兩騎挾二矢與蘇軾游西山鶴起於前怒馬獨出一發得之因與軾馬上論用兵及古今成敗自謂一世豪士稍壯折節讀書欲以馳騁當世然終不遇洛陽園宅壯麗與公侯等河北有田歲得帛千匹晚年皆棄不取遷於光黃間庵居蔬食徒步往來山中妻子奴婢皆有自得之意不與世相聞人莫識也見其所著帽方屋而高曰此豈古方山冠之遺乎因謂之方山子及蘇軾謫赴黃州遇之於岐亭曰此吾故人陳季常也人始知爲慥與軾備游光山黃麻之境名山勝蹟屢幾遍戶部尙書李常欲薦於上爲乞一處士號懇却之以終

費 袞 字甫之無錫人紹熙間國子免解進士有志用世而仕不顯遂因以述作自見嘗客游浮光往來光固間訪古蒐軼有所獲則書之著有梁谿漫志十卷所紀多前言往行而於典章制度尤詳開禧二年國史實錄院牒請徵其書以備參修云

焦 竑 字弱侯江寧人爲諸生有盛名從督學御史耿定向學復質疑於羅汝芳渠嘉靖四十三年鄉試下第還定向邀十四郡名士讀書崇正書院以竑爲之長及定向里居竑復從之居天臺山與定向兄弟汲汲以講學爲務萬曆十七年始以殿試第一官翰林修撰大學士陳於陟建議修國史欲竑專領其事皇長子出閣竑爲講官謁誠啓迪嘗講次羣鳥飛鳴皇長子仰視竑輟講立皇長子欲容聽乃復講如初竑負重名性復疎直時事有不可輒形之言論政府惡之以主順天鄉試文有險誕語錮秩遂不出鉅博極羣書善古文章然名家講學以羅汝芳爲宗而善定向兄弟從之於天臺甚久天臺山在光山南境（今劃歸經扶縣）與黃安錯壤今山中尙多其題詠遺蹟云

楊震生 字勇菴湖廣黃安人幼慧知名年十三即以文詞爲督學秋向壽太史所賞錄補學官弟子試必高第老於場屋范不被舉康熙二十七年僅循歲例充貢生震生天才瞻逸博學嗜古文詞尤工於詩寓家光山之郭家河（今劃歸經扶縣）閉居城邑中與文士唱酬光山令劉愚藻稱好士慕震生名欲數見之不能得也有靳汝楨者山西人亦工於詩儒家光山與震生爲唱和友震生贈之

詩云表吳山河有聲弦陽踪跡史蟬縹緲黃姓氏稱人傑巢許衣冠薄世榮
酒每來人問字看花時共客彈枰森森玉樹非凡種
却勝當年五柳生有郭家河山居詩云百里真山郭人家小市屯田禾方
拆甲巖戶正當黃髮訴無疆久鄰嫌借殺頻亭亭堂下竹直
欲人青曼自是人無事翻疑日太長學仙成汗漫說鬼聽荒唐喜對僧棋
負驚聞米價昂朝來雲雨靈快得滿芳塘葺屋終朝補新成
再復墜風微偏透噓水大徑穿離館菜鄰家婢催茶放學兒閒雞今翅起
不似少年時不是頭成雪如何作野人老藤爲壽杖柔草疊
文尚客謝車騎赫詩媛字句陳幾朝不得酒散步過東隣就園寧有福習
靜本無才担水分魚種連泥擘刻亥家值詩札去喜鳥報人
來賴有披裘子時時潑善醅圓圓五畝菡萏屋即河康水確衝波急花牆亂
石欹無編多遇雨噉粥亦吟詩此意何能解惟應達者知
自愛松庭寂遠添竹徑幽苔環深巷石雪滿傍山樓客醉驚雞犬人閒狎
水鷗偶因挑野菜緩步屋西頭行徧天涯路誅草賦遂初看
雲衝鹿徑聽水到僧廬有地皆栽竹無錢美買書前途都不識好似漆園
居宸生既高才落拓好游歷山川宵北抵居庸西陟華陽東
循河岱南泛松要宜虎邱漫錢塘江入曾稽登禹穴訪四明歷亦在城宿
諸山足迹遍四方所至輒有賦人逸士連篇贈答其詩神
骨寒瘦而抒懷寫景悚目關心如有郊島之風借未遇昌黎其人推而挽
之故身沒而世罕有稱其詩者

錢時雍 字寄圃清江歲貢生學問淵博文章典雅清乾隆四十九年邑
分楊殿梓東修邑志聘請時雍充任編纂比到光邑備稽檔案
廣咨耆舊博求先達之撰著又復親歷四境訪古蹟采幽芳剔腐搜嚴網
羅放佚尋久淹之堅結發潛德之幽光歷三載書成爲圖經
二卷表五志十六卷列傳八卷雜記一共卷三十二卷體法嚴正不愧史才
脫無是書而光邑之文獻湮沒久矣

張錦珩 字如亭湖北黃安縣人瀟灑出塵脫落略於形骸之外雅愛光山
山水清嘉殿中假館於清流里管氏數年斯時民安國泰管
氏爲弦南甲旆尊師儒重文藝供奉畫圖春秋佳日時備良朋高弟縱觀
山水凡關津險要崇山峻嶺以及幽深奇絕之邱壑展幽無
不到嘗謂諸生曰太史公之文所以多軼薄奇氣者得之於名山大川也
讀書人不知山川趣味便是俗士曠不可與言文章夫山之
時水之流鳥之鳴花之放雲之舒卷石之崎嶇喬木之參差野竹之蒼翠
清風斜日牧唱樵歌皆有無窮之妙趣其最妙者爲秋深氣

原书缺页212-末